

庫文有萬

種百七集二第

編主五雲王

集公正文范

(四)

撰淹仲范

行發館書印務商



范正文集  
(四)  
撰淹仲范

書叢本基學國

中華民國二十六年三月初版

七三四上

平

撰者范仲淹

發行人王雲淹

上海河南路五

印刷所商務印書館

上海及各埠

發行所商務印書館

(本書校對者董雲霆  
沈抱秋謝雨東  
王模)

集公正文范  
册四

編主五雲王  
庫文有萬  
種百七集二第

# 言行拾遺事錄卷第一

公丁母憂，寓居南都，晏丞相殊請掌府學。公常宿學中，訓督有法度，勤勞恭謹，以身先之。夜課諸生讀書，寢食皆立時刻，往往潛至齋舍調之。見有先寢者，詰之，其人給云：適疲倦，暫就枕耳。問未寢之時，觀何書？其人妄對，則取書問之，不能對，罰之。出題使諸生作賦，必先自爲之，欲知其難易，及所當用意，亦使學者準以爲法。由是四方從學者輻輳，宋人以文學有聲名於場屋朝廷者，多其所教也。

公在淄州長白山僧舍，今醴泉寺，讀書一夕，見白鼠入穴中探之，乃銀一甕，遂密掩覆。後公貴顯，寺僧修造，遣人欲求於公，但以空書復之。初，僧快然失所望，及開藏，使於某處取此藏，僧如公言，果得白銀一甕。

今人往往談此事。

公遣子堯夫到姑蘇，般麥五百斛。堯夫時尚少，既還，舟次丹陽，見石曼卿問寄此久，何如？曼卿曰：兩月矣。三喪在淺土，欲葬之而北歸，無可謀者。堯夫以所載舟麥付之，單騎自長蘆捷徑而歸，到家拜起侍立。久之，文正曰：東吳見故舊乎？曰：曼卿爲三喪未舉，留滯丹陽，時無郭元振，莫可告者。文正曰：何不以麥舟與之？堯夫曰：已付之矣。

公以朱氏長育有恩，常思厚報之。及貴，用南郊所加恩，乞贈朱氏父太常博士，暨朱氏諸兄弟，皆公爲葬之。歲別爲饗祭，朱氏子弟以公蔭得補官者三人。

公旣貴，常以儉約率家人，且戒諸子曰：吾貧時，與汝母養吾親，汝母躬執爨，而吾親甘旨未嘗充也。今而

得厚祿。欲以養親。親不在矣。汝母又已蚤世。吾所恨者。忍令若曹享富貴之樂也。

公子純仁娶婦將歸。或傳婦以羅爲帷幔。公聞之不悅曰。羅綺豈帷幔之物耶。吾家素清儉。安得亂吾家法。敢持歸吾家。當火於庭。

公遇夜就寢。卽自計一日食飲奉養之費。及所爲之事。果自奉之費。與所爲之事相稱。則鼾鼻熟寐。或不然。則終夕不能安眠。明日必求所以稱之者。

公自政府出歸。焚黃搜外庫。惟有絹三千疋。令掌吏錄親戚及閭里知舊。自大及小。散之皆盡。曰。宗族鄉黨見我生長。幼學壯仕。爲我助喜。我何以報之哉。

公與南都朱某相善。朱且病。公視之。謂公曰。某常遇異人。得變水銀爲白金術。吾子幼不足傳。今以傳君。遂以其方并藥贈公。公不納。強之乃受。未嘗啓封。後其子案長公教之。義均子弟。及案登第。乃以所封藥并其術還之。

公爲人作銘文。未嘗受遺。後作范忠獻銘。其子欲以金帛謝。拒之。乃獻以所蓄書畫。公悉不收。獨留道德經。而還戒之曰。此先君所藏。世之所寶。某竊以爲宗家惜之。毋爲人得也。

公以晏元獻薦入館。終身以門生事之後。雖名位相亞。亦不敢少變。慶曆末。晏公守宛丘。文正過南陽道。過特留歡飲數日。其書題門狀。猶稱門生。將別。投詩云。曾入黃扉陪國論。卻來絳帳受師資。之句。聞者皆歎伏。

守饒州日。有書生甚貧。自言平生未嘗一飽。時盛行歐陽率更書。薦福寺碑墨本。直千錢。爲具紙墨。打千

本使售于京師紙墨已具一夕雷擊碎其碑時語曰有客打碑來薦福無人騎鶴上揚州東坡作窮措大詩曰一夕雷轟薦福碑向使不擊碎書生享用其有窮乎於此益知吉慶避者非吉慶避之其福德淺薄自不能與吉慶會也讚曰淑慝以類吉凶在人譬如儀鳳不棲棘荆虺蜴之窟豈產珠珍冰雪凝冱寒谷不春一氣所感當識其因韓魏公客有郭注者行年五十未有室家公以侍兒與之未及門而注死

公爲吏部員外郎出守時及官歷二府以至于薨凡十年不增一人未嘗易也

公言幕府賓客可爲己師者乃辟之雖朋友亦不可辟蓋爲我敬之爲師則心懷尊奉每事取法於我有益耳

公守越戶曹孫居中卒子幼家貧公助之俸錢百緡治巨舟差老衙校送歸作一絕句戒其吏曰關津但以吾詩示之詩云十口相將泛巨川來時暖熱去淒然關津若要知名姓定是孤兒寡婦船

公守邠州暇日帥僚屬登樓置酒未舉觴見衰絰數人乃營理喪具者公亟令詢之乃寄居士人卒於邠州將出殯近郊贈斂棺槨皆未具慚然卽撤宴席厚賙給之使畢其事坐客感歎有泣下者

公守杭州蘇鱗爲屬縣巡檢城中兵官往往獲薦書獨鱗在外邑未見收錄因公事入府獻詩曰近水樓臺先得月向陽花木易逢春

公過淮境遇風賦詩云一棹危於葉傍觀亦損神他時在平地無忽險中人雖弄翰戲語卒然而作其濟險固得之心未嘗忘也

公守桐廬郡始於釣臺建嚴先生祠自爲記以示南豐李泰伯泰伯讀之三嘆起而言曰某妄意輒改易

一字。公瞿然扣之。曰。雲山江水之語。於義甚大。於詞甚博。而德字承之。乃似碌碌擬換作風字。如何。公凝坐。領首。殆欲下拜。

公守饒州。創慶朔堂。既去。以詩寄魏介。曰。慶朔堂前花自栽。便移官去未曾開。年年長有別離恨。只托春風管幹來。舊州治有石刻。

公與韓魏公爲經略安撫招討副使。約公進兵。公曰。當自謹守。以觀其變。未可輕兵深入。尹洙歎曰。公於此。乃不及韓公也。韓公嘗云。大凡用兵。當先置勝敗於度外。今公乃區區過慎。此所以不及韓公也。公曰。大軍一動。萬命所懸。而乃置於度外。其未見其可。魏公舉兵入界。次好水。以全師陷沒。魏公遽還。至半途。陣亡父兄妻子數千人。號於馬首。皆持故衣紙錢招魂哭曰。汝昔從招討出征。今招討歸。而汝死。汝魂識能從招討歸乎。哀慟聲動天地。魏公悲憤掩泣。駐馬不能前者數刻。公聞而歎曰。當是時。難置勝敗於度外也。

公尹京日。有內侍怙勢作威。傾動中外。公抗疏列其罪。疏上。家所藏書。有言兵者。悉焚之。仍戒其子曰。我上疏言斥君側小人。必得罪以死。我既死。汝輩勿復仕宦。但於墳側教授爲業。疏奏嘉納。其言罷黜內侍。公知慶州。兼經略招討使。未幾。賊兵三萬叩城。公麾兵血戰。賊奔西北。遂戒諸將無追奔。旣而果有伏兵。又奪爲大順城。久之。世衡不利於定川。公晝夜爲領兵援。初。關輔人心搖動。及見公耀兵。號令嚴兵威震戎落。人心遂安。相賀曰。邊上自有龍圖公爲長城。吾屬何憂。公與呂申公論人物。申公曰。吾見人多矣。無有節行者。公曰。天下固有人。但相公不知耳。若以此意待天

下士宜乎節行者之不至也。

公言息盜賊誅奸雄浩然無憂乃所以爲身謀若未能如是雖州里不可保七尺之軀無所容於天地之間矣公在慶曆中議弛茶鹽之禁及減商稅公以爲不可茶鹽商稅之入但分減商賈之利耳行之商賈未甚有害也今國用未減歲入不可闕既不取於山澤及商賈須取之於農與其害農孰若取之於商賈今爲計莫若先省國用有餘當先寬賦役然後及商賈弛禁非所當先也其議遂寢

公爲參知政事日兗州守梁適乞以廂兵代廂戶又裁減人數是時章得象爲宰相執政欲從梁適之請獨公云此事與尋常利害不同而此人可減吾輩雖行他人必復之尋有中書劄子令差足人數當時天下無賢不肖莫不稱之

公爲參知政事日歐陽脩余靖蔡襄王素爲諫官時謂之四諫四人力引石介執政從之公獨曰介剛正天下所聞然性亦好異使爲諫官必以難行之事責人君必行少咈其意則引裾折檻叩頭流血無所不爲主上富春秋無失德朝廷政事亦自脩舉安用如此諫官也諸公服其言而罷

公與韓魏公富彥國慶曆中同在西府上前爭事議論各別下殿各不失和氣如未嘗爭也當時相善三人如推車子蓋其心主於車可行而已不爲己也

慶曆初上厭西兵之久出而民弊亟用公與富鄭公韓魏公而三人者遂欲盡革衆事以脩紀綱而小人權倖皆不悅獨公與相佐佑而公尤抑絕僥倖凡內降與恩澤者一切不與每積至十數則連封而面還之或詰責其人至慚恨涕泣而去上嘗諭諫官歐陽脩曰外人知杜衍封還內降耶吾居禁中有求恩澤

者每以杜衍不可告之而止者多於所封還也其助我多矣此外人及杜衍皆不知也然公與三人者卒皆以此罷去

公與相國韓公爲西帥狄武襄青隸其節下爲人器度深遠咸奇之曰此國器也公嘗以左氏春秋授狄武襄曰熟此可以斷大事將不知古今乃匹夫之勇青於是晚節益喜書史旣明見時事成敗尤好節義公與韓公杜公多知本朝故實善決大事初邊將議欲大舉以擊夏人雖韓公亦以爲可舉公爭以爲不可大臣至有欲以沮軍事罪公然兵後果不得出契丹與夏人爭銀巒族大戰黃河外而鴈門麟府皆警公安撫河東欲以兵從公以爲契丹必不來兵不可妄出公怒以語侵公公不爲恨後契丹卒不來二公皆世俗指公朋黨者其論議之際蓋如此及三人者將罷去公獨以爲不可遂亦罷

公知開封府獻百官圖指宰相差除不公而陰薦韓忠獻公億可用文正旣貶仁宗以諭公公曰若仲淹舉臣以公則臣之拙直陛下所知舉臣以私則臣委質以來未嘗交托於人遂除參知政事公與韓琦自陝而來朝石守道作慶曆聖德詩忠邪太明白道中得之公撫股謂韓公曰爲此怪鬼輩壞之也韓公曰天下事不可如此必壞其後果然

公慶曆中與富弼韓琦杜衍章得象賈昌朝晏殊同時執政呂夷簡罷相夏竦罷樞密使歐陽脩余靖王素蔡襄並爲諫官徂徠先生喜曰此盛事也歌頌吾職其可已乎乃作慶曆聖德詩其略曰衆賢之進如茅斯拔大姦之去如距斯脫衆賢謂衍等大奸斥竦也詩且出泰山先生見之曰子禍始於此矣先生不自安求出通判濮州

吳遵路丁母喪廬墓側蔬食終制既歿家無長物公分俸賙其家

錢尚書適爲洪州職官緣事過鄱陽見彭器資值月朔有衣冠數十輩來見彭公設拜各人進問起居而退錢在書齋中窺見甚訝之因問公此輩何人公曰皆鄉里後進子弟也錢曰今他處後進必居於位或與先生並行何以有此彭公曰昔范希文自京尹謫守是邦其爲政以名教厚風俗敦尚風義爲先州人仰慕咸傾嚮之遂以弟自任而不敢忽久之不變也此大賢臨政之效可以爲法

公知慶州日有人以碑銘托公者公爲譏述夤緣及一貴人陰事一夜夢貴人告曰某此事實有之然未有人知者今因公之文暴露矣願公易之公夢中謝曰隱公此事則某人當受惡名公實有此我非誣人者不可改也貴人卽以語公曰公若不改當奪公子公曰死生命也未幾次子純仁病旣而又夢貴人曰公子我豈能奪今告公爲我改之公子安矣卒不改公之剛正是可見也

公爲江淮體量安撫所至賑乏絕又陳八事其四曰國家重兵悉在京師而軍食仰於度支則所養之兵不可不精也禁軍代回五十以上不任披帶者降於畿內及陳許等處近下禁軍一卒之費歲不下百千萬人則百萬緡矣至七十歲乃放停且人方五十之時或有鄉園骨肉懷土之情猶樂舊里及七十後鄉園改易骨肉淪謝羸老者歸復何托是未停之前大蠹國計廢之後復傷物情咸平中揀鄉兵人無歸望號怨之聲動於四野祥符中選退冗兵無歸之人大至失所此近事之鑒也請下殿前軍馬司禁軍選不堪披帶者與本鄉州軍別立就糧指揮至彼有田園骨肉者許之歸農則羸老之人亦不至失所矣神文時慶曆淮南有王倫者嘯聚其黨頗擾郡縣承平日久守令或有棄城而出者請論如法公參預大

政爭以爲不可。今淮南<sub>五</sub>郡縣徒有名耳。其城壁非如邊塞。難責城守。神文睿德寬仁。故棄城者得以減死。論既退。鄭公忽謂文正公曰。六丈當欲作佛耶。范公曰。主上富於春秋。吾輩輔導當以德。若使人主輕於殺人。則吾輩亦不得容矣。鄭公歎伏。

# 言行拾遺事錄卷第二

公用人多取氣節閑略細故如孫威敏滕達道之徒皆深所厚者爲帥府辟置多謫籍未牽敍人或以問公公曰人之有材能無瑕類者自應用於宰相惟實有可用不幸陷於過失者不因事起之則遂爲廢人世咸多公此意凡軍伍以雜犯降黜者皆改刺龍騎軍石林燕語

韓魏公章得象在中書時方天下多弊事且有西鄙之患每與希文彥國以文字至兩府章公輒閉目不答彥國憤惋欲悖之希文惜大體不許也魏公別錄

公常言史稱諸葛亮能用度外人用人者莫不欲盡天下之材當思近己之好惡而自不知也能用度外人然後能周大事沈括筆談

公與韓魏公召爲樞密副使天下聞之士大夫皆酌酒相賀曰上用韓某范某非惟社稷幸乃天下生民之幸公知開封府明敏通決照事若神每上殿奏事多陳治亂以開人主歷詆大臣不法者長編

慶曆二年仁宗以涇原傷夷欲令范某與文潞公對易遣內侍王懷德喻旨公謝曰涇原地重臣恐不足以獨當願與韓琦同經略涇原並駐涇州琦兼秦鳳臣兼環慶一則夷夏相安事不亟易二則涇原有警臣與韓琦可合秦鳳環慶之兵掎角而進若秦鳳環慶有警亦可以率涇原之師以相應援三則通脩環州鎮戎諸砦藉此兩路事力必能速有成功四則臣與韓琦日夜建議選練兵士漸復橫山以斷賊臂不數年間可期平定願詔龐籍兼領環慶以成首尾之勢秦州委文彥博慶州用滕宗諒總之孫沔亦可辦

集渭州一武臣足矣。朝廷皆從其請。實錄。

公言沿邊逐寨雖有險固只有三二百人何以施爲又城池中多無井水若不量事勢但令堅守徒陷一城軍民性命自挫軍威無益邊事其在環慶路相度二十三寨內有美泥虐泥大拔城等小砦但只量兵士差百十人把截道路如探得賊馬大段入寇便令歸側近大城砦內一處防守所貴不致枉陷軍民人心遂安。奏議。

慶曆二年南郊赦書應因公事受到諸處行軍司馬副使司士文學參軍仰逐處並具到任月日負犯因依分析聞奏候到令刑部子細勘會元犯因依申奏委中書門下別取進止者公因奏言懷才抱藝之人一落散地終身不齒獸窮則變人窮則詐古人之所慎也况今邊事未寧尤宜使過欲乞朝廷催促逐處依赦文分析聞奏乞差近上臣寮就中書定奪元犯情理分作等第又委長吏密切體量上件人或有材質或有節行亦具申奏所貴負犯之人各期自新不懷幽憤唐張說薦負犯之人充將帥之用其表云活人於死者必舍生而報恩榮人於辱者必盡節而雪恥古猶今也乞朝廷留意。實錄。

元昊寇鎮戎軍葛懷敏入保定川砦涇原鈴轄曹英又敗於砦之東北隅懷敏所部人奔駭懷敏爲衆所擁幾躁踐死輿至靈城乃蘇賊遂圍城懷敏與諸將謀赴鎮戎軍賊斷其歸路與諸將皆遇害賊遂長驅至渭州初懷敏之除鄜延也范仲淹言其不知兵而又怯懦不可用遂徙涇原卒敗事東都事略。

張亢築清塞百勝中候建寧鎮川五砦而麟府之路始通亢復奏以所通特一逕請更築並邊諸柵以安河外議未下會契丹渝盟徙知瀛州遷果州團練使夏人與契丹戰河外范公宣撫河東因奏使亢知代

州就令總前議增築事不閱月諸砦成蕃漢歸者數千戶歲減戍卒萬人張亢本傳

公薦舉處士有徐復履尙高潔衍卦氣之法公過潤州問復以衍卦占之今夷無動乎復爲占西邊用兵日月無少差又有郭京者好言兵公數薦之由是二人同召東都事略

張俞上言謂今能詭制北虜散其陰謀使與叛醜疑貳有結國家之心間誘西涼羣夷勿與賊結則虜首可得而天下定矣范仲淹以諫爭而遭擅斥若外狗物望內惟邦本宜委重柄而授之苟能行此是謂失之東隅收之桑榆也呂夷簡甚重其言張俞傳

公以西賊攻塞門砦其寨城池未備兵甲又少部署司不與救應砦主高延德爲賊所擒後放歸漢界遂配遠方公言漢家將率有數人陷在賊庭俱是苦戰力屈爲賊所擒卽非背叛如朝廷貸高延德被以寬恩仍與近邊任使使陷蕃將率聞之必願昊賊歸順望再見其家或卽懷本朝之恩不助賊計如朝廷責其不死來者遠竄其陷蕃將率更無歸路必懷怨望其中或有助賊爲孽其患不細昔漢中行說傅公主入匈奴說不欲行怨漢乃教單于大爲漢患此人情之可見也乞朝廷留意

康定元年九月辛未公以任福等出師攻賊白豹城破之冬十一月又出師出歸娘谷與夏人戰大敗之四夏本末

公以孫明復居泰山之陽著春秋尊王發微得經之本義爲多學者皆以弟子事之公言其道德經術宜在朝廷召拜國子監直講東都事略

韓魏公與公在兵間最久名重一時人心歸之朝廷倚以爲重故天下稱爲韓范初京師歲遣戍兵脆弱

不習勞苦。賊常輕之。目曰東軍。而士兵勁悍善戰。琦奏增土兵以抗賊。而稍減屯戍。內實京師。又以籠竿城據衝要。乞建爲德順軍。以蔽蕭關鳴沙之道。又建請於鄜延渭三州。各以土兵三萬爲一軍。軍雖別屯。而耳目相通爲一。視虜所不備。互出擣之。破其和市。屠其種落。因以招橫山之人度橫山。墮則平夏。兵素弱。必不能支我下。視興靈穴中兔耳。章旣上。遂與范公定謀。益堅。而元昊知不可敵。斂兵不敢近塞矣。東都事略。

石水川之失利。韓魏公降知秦州。公亦以檀答元昊書降知耀州。王堯臣言。此兩人天下之選。其忠義智勇。名動夷狄。不宜以小故置之。明年。葛懷敏敗涇邠以東。皆閉壘自守。公自將慶州兵捍賊。賊始引去。仁宗思其言。乃以魏公與公爲招討使。堯臣曰。陛下復用韓某。范某。幸甚。然將不中御兵法也。願許以便宜從事。仁宗以爲然。從之。九朝通略

仁宗嘗語張士遜曰。人言仲淹嘗欲乞廢朕。朕但未見其章疏耳。士遜曰。陛下旣未見其章疏。不可以空言加罪。望陛下訪之。積十數請。仁宗曰。竟未之見也。然爲朕言之多矣。士遜力爲辯其不然。仁宗意乃解。其後士遜歸老。啓國于鄧。范公適守鄧州。士遜還鄉。范公置酒高會。明日。士遜復置會。揮金甚盛。時人榮之。張鄧公傳

韓魏公曰。呂申公以進賢自佐。恩歸於己。時士皆出其門。獨范公歐公尹公。旋收旋失之。終不受其籠絡也。魏公別錄

原州屬羌。明珠滅臧二族。兵數萬。與元昊隔絕隣道。公聞涇原欲襲討之。公奏言。二族道險不可攻。前日

高繼嵩已嘗喪師。平時猶懷反側。今討之必與賊爲表裏。南入原州。西擾鎮戎。東侵環州。邊患未艾也。宜因元昊別路大入之際。卽并兵北取細腰蘆泉爲堡。鄣以斷賊路。則二族自安矣。而環州鎮戎等處徑道通徹。可以忘憂矣。後二歲。遂築細腰葫蘆諸砦。屬羌歸服。長編

慶曆五年三月。歐陽公上疏言。公與杜公富公不當罷其略曰。昔年范仲淹初以忠言讜論。聞於中外。天下賢士爭相稱慕。當時奸臣誣以朋黨。尤難辯明。近日陛下擢此數人。並在兩府。察其臨事可以辯也。此四人者可謂公正之賢。今范仲淹四路之任亦不輕矣。願陛下拒絕羣謗。委信不疑。使盡其所爲。猶有裨補長編。

慶曆四年八月辛卯。初命參政賈昌朝領天下農田。范仲淹領刑法事。有利害。其悉條上。初公建議。請以三司司農審官流內銓。三班院。國子監。太常刑院。審刑。大理。羣牧。殿前馬步軍司。各委輔臣兼判。臣願自領兵賦之職。如其無補。請先黜降。章得象等皆以爲不可。久之乃降。是命九朝通略。

慶曆元年春正月。朝廷旣用韓琦所畫攻策。先戒師期。知延州范仲淹言。正月內起兵塞外。雨雪大寒。暴露僵仆。使賊乘之所傷必衆。賊界春煖。則馬瘦人饑。其勢易制。及可擾其耕種之務。縱出師無大獲。亦不至有他虞。又言鄜延是舊日進貢之路。蕃漢之人頗相接近。願朝廷存此一路。令諸將勒兵嚴備。賊至則擊。未行討伐。容臣示以恩信。歲時之間。或可招納。苟歲月無效。遂舉重兵。取綏宥二州。擇其要害而據之。屯兵營田。作持久之計。如此。則茶山橫山蕃漢人戶。可以招降。則是去西賊之一臂也。戊午詔從仲淹所請。宋朝通鑑。

公在延州言鄜延路入界北諸路最遠若先修復城寨即是遠圖乞遣使命令臣督諸將出兵先修復廢砦別置戍守既通近蕃界彼或點集人馬朝夕便知大至則閉壘以待隙小至則扼險以制勝公前後凡六奏卒城永平等十二寨蕃漢之民相踵復業宋朝通鑑

慶曆間江淮歲漕不給京師乏軍儲樞密副使范仲淹言國子博士許元可獨倚辦遂擢元淮江兩浙荆湖制置發運判官元曰以六路七十二州之粟不能足京師吾不信也至則命瀕江州縣留三月糧悉發之遠近以次相補引千餘艘轉漕而西未幾京師足食長編

諫官歐陽脩言韓琦范仲淹久在陝西備諳邊事是朝廷親信委任之人况二臣材識不類常人其所見所言之事不同常式言事者下陞最宜加意訪問使其盡陳西邊事宜合如何處置余靖亦奏言范仲淹號爲最曉邊事實錄

給事中參知政事王舉正爲禮部侍郎知許州初諫官歐陽脩余靖蔡襄咸言范仲淹有宰輔材不宜局在兵府願以仲淹代之上從其請遂以范仲淹爲參知政事仲淹曰執政可由諫官而得乎固辭不拜公在陝西戒約諸寨若是賊馬大段入來更不得出兵迎賊鬪敵但且堅守一面供報部署司并策應官員候逐處軍馬到來方得設謀掩殺如輕易出兵致有輸折其本處官員並行軍法既而准樞密院劄子若賊寇深入應外城砦除留定防守城池外並須領兵先據險要覓便攻擊如敢以防守爲名端坐不出具狀申奏乞行軍法奉聖旨依奏公言自古用兵本無常勢非可畫一而制也相度本路諸砦之兵多者千人少者五六百人或二三百人只令防守城池尙慮不足若有蕃賊入寇其寨主監押等縱有勇敢往

往見小利便出兵與之追逐如西賊以羸兵誘致離砦稍遠別出精兵斷其歸路砦中無兵卽見危陼假有一將在外去州或遠應援未至如遇賊衆大至多選精銳并攻一處謂之奪險非有曉將血戰勢不能支若外兵先敗則州城之兵望風挫氣必難爲用臣謂應變之機拘以條貫非其利也其所降指揮不敢行下奏議

西賊寇鎮戎軍官軍不利公牒知原州景泰等令六頭項下軍馬會合相度揀選精兵三二千人夜擊蕃砦探候山外賊馬迴時卽多出奇兵夜間或侵曉伏截衝擊收救人民仍戒約不得脫剝被虜人戶人物公又恐諸將貪功一向急去追襲被西賊設伏兵更落姦便又牒景泰等火急多差人搜山探候如探得西賊先有伏兵卽便就高駐劄別選敢死之士多作頭項先去掩擊只以收救人民不得貪小功小利再有踈虞以副朝廷之意公又到邠州略示兵勢又出榜永興軍諸州以安關中人心奏議

陝西新刺保捷兵士多將本家贍軍田土并已分物業典賣破貨公言上件兵士並是鄉民若向去稍似年高披帶不得卽須揀放歸農如今來破貨了莊產將來無可歸投便見失所遂出遍榜曉示諸州軍應新刺保捷兵士如今後乞將本家贍軍田土已分物業典賣破貨者不得施行其典賣人嚴行斷遣如將來殘患不堪征役及有年高不任披帶放令歸農者卽給與已分莊田養種并劄與逐處令指揮諸縣依此出榜常切覺察施行奏議

皇祐元年春上御便殿訪近臣以備禦之策權三司使葉清臣對曰今輔翊之臣抱忠義之深者莫如富弼爲社稷之固者莫如范仲淹又曰諳古今故事者莫如夏竦議論之敏者莫如鄭戩方面人才方重有

范文正公集 言行拾遺事錄卷二

四八〇

紀律者莫如韓琦。臨大事能斷者莫如田况。剛果無顧避者莫如劉渢。宏遠有方略者莫如孫沔。至於帥領偏裨。貴能坐運籌策。不必親當矢石。王德用素有威名。范仲淹素練軍政。龐籍久經邊任。皆其選也。長編。

# 言行拾遺事錄卷第三

公知開封府每進見輒論時政得失宰相呂夷簡惡之斥守饒州諫官高若訥詆謂公與歐陽脩爲黨歐陽公以書責若訥謂其不復知人間有羞恥事若訥以聞謫夷陵令徙乾德復爲武成軍節度判官公帥陝西辟脩掌書記脩曰吾論范公豈以爲利哉同其退不同其進可也辭不就

張昇改轉運使知鄧州昇以親老辭或以爲避事范仲淹曰張昇非避事者乃聽侍養通鑑

富彥國幼篤學有大度范公見而識之曰此王佐才也懷其文以示王曾晏殊殊卽以女妻之談藝

河東轉運司指揮諸州軍場務更不得收納大鐵錢爲民間漸多私鑄要得止絕欺弊遂有百姓經并州告訴各是交易到大鐵錢無處使用公遂出榜并州街市且令依舊行用公又恐諸處軍民疑惑各已入急遽發下榜示逐處曉示軍民其官鑄大錢並依舊行使諸場務亦仍舊行用鐵錢

麟州元無酒務至慶曆二年十二月官中剏置酒務後據百姓劉遷狀申公勘會麟州元管三縣六番落蕃漢戶二千五百餘家朝廷以河東極邊不榷酒利今來殘破之後四面並無居民入城交易只有城中主客二百餘戶別無經營從去年十二月官自開沽在市居民更無營利之地今算出官本并官員兵士請受外只有淨利二百餘貫兼城中居民逐旋離去久遠不成州郡遂出榜並劄與麟州指揮本務據見在酒貨賣盡日住行醞造令百姓依舊任便開沽

陝西側峻瘠薄逃田地土自來勒地分隣人分認空納租錢人戶不願送納陝府申乞除放公劄與陝府

據諸縣逃田官地勒地分隣人空納租錢者并見欠錢數並與除放今後不得抱認送納慶曆四年十二月上差入內供奉官衛克勤押賜醫藥至公處并傳宣令公探候北界事宜公上言見各訓練選奇兵準備戰敵惟難得經歷將帥如北戎兵馬未放散間臣不敢便離河東北邊或有緩急與明鎬商量指揮將佐料敵使人庶幾分朝廷萬一之憂公言諸軍頭等遺文帖宋舊勅文應有軍頭等補署文帖誤被水火損壞或賊人偷盜者許申本管人員勘會詣實給與公據如自失墜卽勒充長行者公言軍頭失了文帖降充長行其中甚有能部轄勾當人因累次功勞方得遷補被手下軍士憎嫌多方窺算藏毀文帖便降充長行情實可憫以此苟且和同不敢鈐轄覺察手下兵士違犯作過成弊愈深乞朝廷特降宣命指揮今後失去補署文帖有因故事失去勘驗不虛卽依舊職名重給公據收掌別無因依稱失去者如勘會得委不因酒醉及不是典解錢物卽於舊職名止降一等別給文帖安排所貴兵級安心無致誤犯

公禁義軍搔擾樞密院劄子與安撫司行移都部署司依准朝旨施行仍指揮本路州軍縣鎮出榜及鄉村粉壁曉示人戶嚴行覺察如替名人及諸色人等起動搔擾卽收捉赴官勘斷施行

公言天下郡邑事朝廷從之降勅署琦仲淹等奏請公又言若署臣等奏請於理未便只乞作朝廷憂勞之意特選臣僚舉官則事體甚重也通鑑

慶曆四年六月己丑省河南府潁陽壽安偃師緜氏河清五縣並爲鎮逐鎮令轉運司舉幕職州縣官兩員監酒稅仍管勾煙火公事又析王屋縣隸河南府始因參政范仲淹之請也類苑

康定元年春正月丙子經略安撫判官尹洙至延州與范仲淹謀出兵越三日仲淹徐言已得旨聽兵勿出洙留延州幾兩旬仲淹堅持不可辛丑洙還至慶州乃知任福等敗績長編

慶曆四年七月丙戌詔諸路轉運使副提點刑獄察所部知軍知縣有治狀者以名聞議旌擢之或不如所舉御史劾奏並坐上書不實之罪從參政范仲淹奏請也類苑

公奏言西人請和有不可許者三有大可防者三又言臣等已議於一二年間訓兵三四萬使號令齊一陣伍精熟我軍鼓行山界每歲三五出元昊諸廂之兵頻來應敵疲於奔命則山東蕃部勢窮援弱自求內附足以斷元昊之手足矣臣等早蒙聖獎擢與清班西事以來三年塞下日勞月憂豈不願少圖休息非樂職矢石之間蓋見西戎強梗未衰挾以變詐臣等是以不敢念身世之安忘國家之憂須罄芻蕘少期補助其元昊來人到闕伏望聖慈於納和禦侮之間慎於處置爲聖朝長久之慮則天下幸甚實錄

公牒逐州相度新兵未有營房欲配買木植則大費官錢兼搔擾人戶又卒難了當其自來等第戶各有莊園宅舍及將家入營僅得一間營房難爲存濟新兵內貧窮之家卽給與係官木植其稍有家力情願自於本家搬到材植要蓋舍屋者聽如中等已下苦無事力除自有舊材料情願將來蓋造外或買到新瓦木者估價給與解鹽交引大省官錢又逐家自蓋屋宇早得了當并等第之家乍住營房不致迫窄可以存濟

公累奏薦种世衡知環州未用又上言環州勾當一郡十三寨當此危地須在得人朝廷以臣不才而輕此一路臣恐將有麟府之禍雖加罪於臣無益邊事臣今乞將新授左司郎中一官迴授种世衡轉諸司

使知環州。權鈐轄司。或朝廷從臣所請。使邊臣知推讓之風。亦非細事。如終不允從。則乞差臣帶本路一將軍馬。權知環州支備。如朝廷體量臣稍涉虛妄。甘受上書詐僞不實之罪。又奏云。臣前乞將一官保舉本人。非欲鼓激。蓋爲環州可憂。後朝廷竟從公請。果得世衡之用。奏議及長編

公出巡邊至環州。點檢環州管界熟戶。蕃官共一千七十二人。與酒食管設作聖恩等第。支與綵絹。角茶。銀椀。紫綾襖。黃花襖。銀腰帶。銀裹頭杖。帽子。旗槍。銀交椅。紅纓。紫綾袋。全錦襖子等物。重立約束四件。對衆告諭。尋令蕃部望闕謝恩。率皆喜躍。名臣傳

公言禁青鹽。欲以困西賊。非因賊之要。卻有所害。會淮安砦捉到買青鹽兵士二人。勘得本指揮火隊掠錢買鹽入衆喫用。公言竊見諸軍常令聲樂。蓋欲悅其衆心。不至愁苦。今兵士處於窮邊。冒矢石。負星霜。若飲食失所。更禁絕鹽味。何以聊生。未能困賊。先因我師其買鹽兵士是本部衆人之罪。實不敢盡法。恐傷士心。只決二人杖二十。押送本部。仍奏朝廷乞更參詳青鹽條貫。名臣事實

河東諸處坊郭村鄉人戶甚有差配。頻併貧困。祇當等第。不得各拋下產業。逃移在外。大段失所。公出榜曉諭諸州軍應坊郭村鄉人戶。今日以前。帶卻配賣物色。或抱二稅逃移者。並令與放罪。各令歸業。其元拋下產業。不得納官。疾速差能幹官吏比附見在人戶。物產定奪。合該減放等第。招誘歸業者。不得更依元本等第。其元欠二稅。並與放除。仍劄與都轉運司施行。

陝府有稅戶朱士成等八百九戶。各爲送納秋稅不前。全家逃走延州。延長等七縣逃移。卻稅戶三百七十一戶。公牒陝府逐縣鄉村拘管。上件逃移人戶。屋業桑產。不得燒毀斫伐。其逃走人戶。權與倚閣。去年

秋稅其見在第五等秋稅只於本處送納其第四等戶亦於隣州送納免致逃移毀卻桑產將來歸業不得所有諸州軍人戶慮恐亦有似此逃移并牒逐州亦請相度安恤類苑

任福破白豹寨捉虜到僞首領李家妹在慶州官員充奴婢公恐蕃界首領聞及轉生怨毒別起奸弊遂差指使侍禁石斌往慶州取同延州通判馬端及本路都監朱青問得所說事文狀一紙及稱於慶州淮安鎮有投來軍是親叔公卽差石斌押送慶州分付與親叔歲奴收管令嫁事人爲妻後石斌回稱到彼歲奴骨肉並來覲當號哭

延州東路青澗城承平砦并保安軍北巡檢劉化基手下熟戶蕃部遭西賊打虜驚移傷殘戶數并投來蕃部並在逐寨及本軍側近住坐未曾歸業公慮恐其失所卻逃入蕃界遂牒種世衡等勘會驚移熟戶蕃部有未敢歸業卽便相度隣近官私空閑地土權撥與耕種如無牛具者官與量借糧收買又勘會驚移人戶并投來蕃部其中甚有缺乏糧食存濟不得卻恐致有逃走又牒種世衡相度逐戶口數目每十口已上量支借貸祿粟各一石十口以下支借五斗嘗切照管安撫無令失所又金明砦蕃戶三百二十八戶雖給與田土緣經討虜後無力耕耘公又牒延州通判高延夫將蕃部每家十口已下各支斛斗二石十口以上支三石並令於本處砦倉支給西夏本末

公常言官人之法人主當知其遲速升降之序其進退近臣不宜全委宰相實錄

康定二年五月十四日中書省劄子陝西軍州如有因修展城郭倉庫草場營房等但係侵占人戶地主去處並令將係官空閑地許人戶請願指射官司給還若無地土卽取索本主元買契比類隣近地段買

置價例支還本錢。公到邠州據人戶王昭瑋等陳狀稱官中修營占卻園地拆了屋舍乞估計合支價錢。公體問得邠州稱邊城側近並無空閑官地給還公遂委安平知縣李仲昌訪地所估到王昭瑋等合支價錢牒邠州請依上項條貫支給逐人價錢去訖又據後邠州申准轉運司牒修營占卻人戶地基卻令兌換係官空閑地土撥還卻勾收已支價錢赴軍資庫送納公言諸州自來修造營房只是踏逐官地不許毀人戶見宅邸舍物業其邠州便將人戶見住物業毀拆逐起人戶無處存活旣無官地兌還卽合給還價錢買屋當司支與錢物其人戶當已破費雖准轉運司指揮今將空閑官地兌還旣無官地卽合回申轉運司豈得便卻例行催納已支價錢侵害人戶遂勾到本州元行典級王益等勘杖一百斷遣所有人戶地土價錢牒邠州依條支還名臣事實

公體量河東州軍人戶近年徭役科配頻併例各貧困遂免放今年秋稅稍得休息又恐陝西州軍人戶亦自兵興以來祇應差科不易尋劄與陝西轉運司依河東例減放人戶支移奏議

麟府州岢嵐軍極邊之地人戶稀少其色役公人並差主戶答戶祇應輸差出入應副軍期多致陪備破卻家產又邊人日見貧困祇應不前公劄與轉運司并府州岢嵐軍據見今衙前使院人吏並仰依鎮戎軍條例支撥與係官荒閑田土仍免送納二稅租課名臣事實

西夏曩宵之叛其謀皆出於華州士人張元與吳昊而其事本末國史不書比得田畫承君集實紀其事云張元吳昊姚嗣宗皆關中人負氣倜儻有縱橫才相與友善嘗薄遊塞上觀視山川風俗有經略西鄙意姚題詩崆峒山寺壁在兩界間云南粵干戈未息肩五原金鼓又轟天崆峒山叟笑無語飽聽松聲春

晝眠公巡邊見之大驚又有踏破賀蘭石掃西海清塵之句張爲鸚鵡詩卒章曰好著金籠收拾取莫教飛去別人家吳亦有詩將謁韓范二帥恥自屈不肯往乃鑿大石刻詩其上使壯夫拽之於通衢三人從而哭之欲以鼓動二帥旣而果召與相見躊躇未用間張吳徑走西夏公以急騎追之不及乃表姚入幕府張吳旣至夏國夏人倚爲謀主以抗朝廷連兵十餘年西方至爲疲弊職此二人爲之時二人家屬羈縻隨州間使譟者矯中國詔釋之人未有知者後乃聞西人臨境作樂迎此二家而去自此邊帥始待士矣姚又有述懷詩曰大開雙白眼只見一青天張有雪詩曰五丁仗劍決雲霓直取銀河下帝畿戰死玉龍三十萬敗鱗風卷滿天飛吳詩獨不傳觀此數聯可想見其人非池中物也容齋三筆

延州都監周美言于范公曰賊新得志其勢必復來金明當邊衝我之蔽也今不亟完將遂失之公因屬美復城如故數日賊果來其衆數萬薄金明陣于延州城北三十里美領衆二千力戰會暮援兵不至乃徙軍山北多設疑兵賊望見以爲救至卽引去旣而賊出艾蒿砦遂至郭北平夜鬪不解美悉衆使人持一炬從間道上山益張旗幟四面大譟賊懼走獲牛羊馬橐駝鎧甲數千計遂募兵守其地東都事略

嵐石都巡檢司接應到西界蕃部敵移團練使十三戶奉勅於海州住坐敵移願殺其妻子自刎死公差人往石州勾喚到敵移問當深不願海州居住公言敵移歸投新來其心未安若必遣住海州安泊不惟遠去鄉土全失蕃情又其人不測朝廷意旨卻自刑害今來西事未寧邊上蕃部聞之絕其向化之意則皆爲怨敵邊害愈深遂發遣敵移住府州與田土耕種準備緩急使喚及令招喚本族未來蕃部公節制諸將勘會自來漢家兵馬先出只排作一陣被賊奔衝便見輸折遂牒東路朱吉任守信等候賊

奔衝未得出兵。但堅守城池。放令深入。卽計會多著頭項。衝突掩殺。不得先出軍馬。只作一陣排布。依然無功。如是被賊守門。出兵不得。卻多寅索梯。從城上夜出。奇兵掩擊。賊砦以資勝捷。如違者。當行軍法施行。西夏本末

公門客滕達道龍圖布衣時。公尹京。而滕年少頗不羈。往往潛出狎邪縱飲。公病之一夕。至書室中。滕已出。公因明燭觀書以俟。意將媿之。至夜分。乃大醉而歸。公陽不視。以觀其所爲。滕略無慚懼。長揖而問曰。公所讀者何書也。曰。高祖傳。滕曰。漢高祖何如人。公逡巡而入。東軒筆錄

公言關中民苦轉輸。請建鄜州之鄜城縣爲軍。以河中同華中下戶稅租就輸之。春夏徙邊兵就食。可省糴價什之三。他所減不與。詔名其軍曰康定。實錄

公知慶州。兼管勾環慶路部署司。兵馬至部。卽奏行邊。以詔書犒賞諸羌。閱其人馬。立條約爲信。凡讐已和斷。輒私報之。及傷人者。罰羊百馬二。已殺者。斬負債。爭訟聽告官爲理。輒質縛平人者。罰羊五十馬一。賊馬入界。追集不起。隨本族每戶罰羊二。質其首領。賊大入。老幼入保本砦。官爲給食。卽不入寨。本家罰羊二。全族不至者。質其首領。諸羌受命悅服。自是始爲漢用。長編

慶曆元年三月。任福等旣敗。朝議因欲悉罷諸路行營之號。明示招納。使賊驕怠。仍密收兵。深入討擊。詔公體量士氣勇怯。如不至畏懦。即可驅策前去。乘機立功。公言任福已下。勇於戰鬪。賊退便追。不依韓琦指蹤。因致陷敗。此皆邊上有名之將。尙不能料賊。今之所選。往往不及。更令深入。禍未可量。臣非不能督主兵官員。須令討擊。不管疎虞。敗事之後。誅之何濟。惟聖慈念之。其鄜延路罷行營文字。臣且令所部許

懷德收掌別聽朝旨臣一面依此聞報夏竦韓琦商量申奏如所議未合乞朝廷取捨臣方待罪不敢久冒此職妨誤大事從之於是行營之號卒不能兵亦不復出實錄

慶曆詔諸路轉運使副提點刑獄察所部知軍知縣有治狀者以名聞議旌擢之或不知所舉令御史臺勅奏並坐上書不實之罪從范仲淹所請也通鑑

和魯公有觀畫鷹獵兔詩云雖是丹青物沉吟亦可傷君誇鷹眼疾我憫兔心忙豈動騷人興惟憎獵客狂鮫綃百餘尺爭似製衣裳文正公觀之歎曰真仁人之言也筆錄

宣和五年經略宇文虛中奏故參知政事范仲淹知慶州築大順城爲一路扞蔽辟洛苑副使种世衡知環州至今諸路戰守之備多二人規畫今慶陽府有仲淹廟環州有世衡廟合古者有功於民以死勤事之法乞各賜廟額詔賜廟爲忠烈世衡威靖東都事略



# 言行拾遺事錄卷第四

此以下係監簿忠宣諸公遺事。忠宣遺事極多。其已見於言行錄行狀者。茲不復載。

宣仁寢疾。宰輔入問。后留忠宣曰。卿父仲淹可謂忠臣。在章獻朝勸后盡母道。在仁宗朝勸帝盡子道。卿當似之。言行錄。

諫受金帶。康定間。元昊寇邊。韓魏公領四路招討。駐延安。忽夜有人攜匕首至臥內。遽褰帷帳。魏公起坐。問誰何。曰。某來殺諫議。某不忍。願得諫議金帶足矣。遂取帶而出。明日。魏公亦不治此事。俄有守陴卒報。城上得金帶。乃納之。時范兄純佑在延安。謂韓魏公曰。不治此事爲得體。蓋行之。則沮國威。今乃受其帶。是墮賊計中矣。魏公握其手。再三歎服曰。非琦所及也。談叢。

文正長子監簿純佑。幼有智略。在洛與富彥國家子游。富氏引壘陳設。從壘器用甚盛。觀者如堵。器用蓋錫造者。監簿在側。取一器璧而示衆。曰。此錫器爾。等謂何物耶。富氏子大怒。以爲笑已。監簿徐謂曰。爾何所見。吾正恐愚民致疑。害爾先瑩耳。富子歎服。時始十餘歲。過庭錄。

赴官只三檐。忠宣公孫直方。初仕平恩主簿。啓行拜辭。叔翁右丞平居寡言。端坐如木偶人。終日未嘗移。起。至於塵印跡無倦意。家中不見喜慍之色。至是問姪主簿曰。爾行擔幾檐。主簿是時新娶。實應之曰。有十檐。右丞曰。爾初仕已如此。若久宦何。我昔赴遂州守時。只有三檐。罷官仍舊。不惟緩急易於去就。亦免張外醜也。過庭錄。

忠宣公元祐間當國。一時科舉取人多得豪傑之士。忠宣公亦病夫公卿家子弟或不知書言於朝乃於有無出身人銜位上帶左右字以分優劣。忠宣公之意非有它也。蓋欲公卿子弟知向學故爲是以獎勸焉。趙挺之奏議

哲宗親政。呂汲公欲遷殿中侍御史楊畏爲諫議大夫。忠宣曰。天子諫官當用正人。楊畏不可用。汲公方約畏爲助。謂忠宣曰。豈以楊畏嘗言公耶。忠宣曰。不知也。蓋上初召忠宣。畏嘗有言。上不行。忠宣故不知也。忠宣因乞罷政。上不許。後楊畏首叛汲公。凡可以害汲公者。無所不至。聞見錄

忠宣貶永州。命下。公欣然而往。每諸子怨章惇。忠宣必怒止之。江行赴貶所。舟覆。扶忠宣出。衣盡溼。顧諸子曰。此豈章惇爲之哉。至永州。公之諸子聞韓維少師謫均州。其子告惇以少師執政日與司馬公議論多不合。得免行。欲以忠宣與司馬公議役法不同爲言求歸白公。公曰。吾用君實薦以至宰相。同朝論事不合即可。汝輩以爲今日之言不可也。有愧而生者。不若無愧而死。諸子遂止。聞見錄

公疾革精識不亂。諸子侍側。口占遺表。凡八事。命門生李之儀次第之。諸子以其所言皆朝廷大事。且防後患。以公口占。畫一繳申。潁昌府用府印寄軍資庫及將葬之儀。又作行狀。論公平生立朝行己大節。蔡京用事。小人附會。言公之子正平等撰造。中使至永州。傳宣聖語。以爲遺表非公意也。正平與之儀皆下御史獄。捶楚甚苦。正平之儀欲誣服其傳宣。中使獨不服。曰。舊制。凡傳聖語受本於御前。請寶印出。注籍於內東門。遣使受聖語籍。中使從其家得永州傳宣聖語本。有御寶。如所言。又驗內東門受聖語籍亦同。又下潁昌府。取繳納遺表八事。皆實。獄遂解。正平猶羈管象州之儀。羈管太平州。正平之家死於嶺外者。

十餘人獨正平遇赦得歸不出仕終身爲選人蔡京者紹聖初爲戶部尙書欲結后戚向氏故奏展向氏墳寺事下開封府正平爲縣尉往按視其地曰向氏寺地步已足民田不可奪府以其言聞哲宗怒京贖銅二十斤京由此恨正平故欲誣殺之嗚呼使忠宣公無恙相上皇於初載天下豈復有今日之禍公旣病不能朝上皇始命相曰曾布與蔡京云聞見錄

治平二年以范純仁爲殿中侍御史呂大防爲監察御史裏行近制御史有闕則命翰林學士御史中丞迭舉二人而上自擇取一人爲之至是闕兩員舉者未上內出純仁大防姓名而命之實錄

熙寧元年司馬光登對上曰召還韓維如何光曰韓維陳薦忠厚方正者也呂誨與傅堯俞范純仁呂大防皆忠直之臣也願陛下常識其名

熙寧中公知諫院言侍從官實古九卿職是宜朝夕論思同國休戚今只主判司存或有時政得失惟能退有後言願降詔督責凡朝廷闕失並須陳列其所上章疏付政府銓定量加賞罰上與執政議之以爲當然丙辰詔曰侍從官員今視朕過失與朝廷政事之闕無有巨細各具章極言無隱長編

忠宣嘗言薛向不可爲發運使或致民心別生事變上曰今令發運使兼制置六路財賦務在均適有無何由乃至百姓人情怨駭純仁曰人主不當言利但當務農桑節用而已上曰欲務農桑如何措置純仁曰但當脩風教上曰有風教而無政事如何人肯務農桑純仁曰當擇守令上曰以何法擇守令曰當令近臣薦舉上曰朕卽位以來屢勑近臣舉士然初不知所舉之當否欲知所舉之當否當以何術曰當責執政長編

蘇轍既再具劄子上固不悅李清臣鄧伯溫又先媒孽之及面諭上益怒遂責轍曰人臣言事何所害但卿昨奏謂機事不可宣于外請祕而不出今乃對衆開陳且以漢武帝上比先帝引論甚失當轍復曰漢武帝明主也上曰卿所奏稱漢武帝外事四夷內興宮室立鹽鐵榷酤均輸之法其意謂武帝窮兵黩武末年下哀痛之詔此豈明主乎轍恐動趨下殿待罪上聲甚厲范純仁獨進曰史稱武帝雄才大略爲漢七制之主轍果以比先帝非謗陛下親政之初進退大臣當以禮不宜如此急暴上怒稍霽轍退舉笏謝純仁曰公佛地位人也長編

熙寧中朝廷有生老病死苦之語時王荊公改新法自爲生事曾魯公以年老依違其間富韓公稱病不出唐質肅與荆公爭按問欲舉理直不勝疽發背死趙清獻唯聲苦時忠宣爲諫官皆劾之言荊公志在近功忘其舊學富公謀身過於謀國曾公趙公依違不斷可否忠宣每曰以王介甫比莽卓過矣但急於功利遂忘素守耳邵氏聞見錄

公攝帥成都程子將告歸別焉公曰願少留純仁將別子曰旣別矣何必復輿衛遂行公使人要於路曰願一見也旣見曰先生何以教我子曰公嘗言爲將帥當使士卒視己如父母然後可用然乎公曰如何子曰公言是也然公爲政不若是何也公曰可得聞與子曰舊帥新亡而公張樂大饗將校於府門是教之視帥如父母乎曰亦疑其不可故使屬官攝主之也子曰是尤不可也公與舊帥同僚也失同僚之義其過小屬官於主帥其義重曰廢饗而頒之酒食如何曰無頒也武夫視酒食爲重事弗頒則必思其所以事帥之義乃因事而教也公曰若從先生言而不來則不聞矣其喜聞義如此程氏遺書

徽宗卽位之初欽聖皇太后同聽政忠宣公自永州先以光祿卿分司南京鄧州居住蓋二聖欲用公矣遣中使至永州賜茶藥密諭曰皇帝與太皇太后甚知相公在先朝言事忠直今虛位以待相公不知目疾如何用何人醫治只爲左右有不是當人阻隔相公公頓首謝又曰太后問相公官家卽位行事如何天下人何說公曰老臣與遠方之人惟知鼓舞聖德又曰天下有不便事但奏來公曰敢不奉詔又曰鄧州且去否公曰已出望外如歸鄉里又曰離闕下日二聖再三言太后在宮中皇帝在藩邸甚知相公是直臣公感泣不已俄復觀文殿大學士中太一宮使召赴闕供職而公病詔書有云豈惟尊德尚齒昭示寵優之光庶幾鍾論嘉謀日聞忠告之語公捧詔泣曰上果用我矣目明全失風痹不隨恩重命輕死有餘責上又遣中使賜銀合茶藥促公入覲仍宣渴見之意公曰老臣命薄虛蒙聖眷乞歸潁昌養疾上不得已許之每見輔臣問安否乃曰范純仁得一識面足矣公復告老不允詔至公已薨矣上與皇太后震悼出涕邵氏聞見錄

元祐元年詔著作郎范祖禹宣德郎游師雄朝請郎朱勃並令中書省記姓名以同知樞密院事范純仁薦故也實錄

遣長編

元祐八年八月丁卯呂大防范純仁蘇轍鄭雍韓忠彥劉奉世入崇慶殿後閣問太皇太后聖體太皇太

后諭大防等曰。今疾勢有加。與相公等必不相見。且善輔佐官家。爲朝廷社稷。初大防等欲退。太皇太后獨留純仁。意欲有所屬也。上令大防已下皆住。太皇太后曰。老身受神宗顧託。同官家御殿聽斷公事。試言九年之間。曾施私恩與高氏否。大防對曰。陛下以至公御天下。何嘗以私恩及外家。太皇太后曰。固然。只爲至公一兒一女。病且死。皆不得見。言訖泣下。大防曰。近聞聖體向安。乞稍寬聖慮。服藥太皇太后曰。不然。政欲對官家說破。老身沒後。多有調戲官家者。宜勿聽。公等亦宜早求退。令官家別用一番人。乃呼左右曰。曾賜出社飯否。因謂大防曰。公等各去喫一匙社飯。明年時思量老身也。長編

忠宣公謫居永州。客至必見之。對設兩榻。多自稱老病。不能久坐。徑就枕。亦授客一枕。便與對臥。數語之外。往往鼻息如雷。客待其覺。有至終日不得交一談者。能改齋漫錄

元祐元年蘇轍言。今日廟堂之上。司馬光未出。只有呂公著一人。忠朴可倚。其餘皆姦邪備位者也。伏望聖慈早進范純仁。庶得賢者在位。同心一德。以輔聖政。實錄

忠宣晚年。益以天下自任。尤留意人才。或問其所儲蓄人才。可爲今日用者。答曰。陳瓘。又問其次。曰。陳瓘自好也。言瓘可以獨當天下之重也。宣和末。人憂大廈之將傾。或問游酢。以濟世之人。酢曰。陳了翁。其人也。劉安世亦嘗因瓘病。勉以醫藥自輔云。天下將有賴於公。當加保養。以待用也。長編

范忠宣公再入相。子正平博學能文。行義甚高。竟死。選調朱勝非云。二府表則之地。不阿其親。

公在相。凡薦引人才。必以天下公議所薦。士未嘗知。公未嘗示恩意於人。本傳

左正言朱光庭奏。臣嘗論奸邪。則指蔡確。章惇。韓縝爲之先。論忠賢。則以司馬光。范純仁。韓維爲之先。去

姦邪任忠賢。唯先者爲急。蔡確旣去。乞以司馬光補其闕。韓縝旣去。乞以韓維補其闕。蓋此天下大任。唯天下大賢可以當之。非張璪已下備位之臣所堪任也。朱公掞集

公元豐八年爲左諫議大夫。司馬光以公親嫌爲言。惇曰：臺諫所以糾繩執政之不法。故事執政初除親戚及所舉之人。見爲臺諫官者皆徙他官。今皇帝幼冲。太皇太后同聽萬機。當動循故事。不可違祖宗法。光曰：純仁祖禹作諫官。誠協衆望。不可以臣故。防賢者進臣寧避位。九朝通略

紹聖元年夏四月。范純仁充觀文殿大學士。知潁昌府。上親臨政。言者爭論垂簾時。公乞依明道二年故事。下詔禁約。并錄以進。不從。公數稱疾求罷。最後出居慈孝寺。再錄詔以進。且言今妄爲詆訐者既多。陛下從之。則妨聖孝。懲之。則恐不忍。不若以詔禁約。庶得兩便。訖不從。純仁固求罷。而有是命。通鑑

東都曹生言。范右丞旣貴。接親舊情禮如故。他亦不改。世未有也。然體面肥。百潔澤。豈其胸中亦以爲樂耶。談叢

元豐八年十月。韓維言。今聞已召知慶州。范純仁。純仁父子。世爲帥臣。熟知虜情邊事。伏望聖慈。更促純仁入朝。面賜詢問。庶爲詳審。十一月癸亥。以京東轉運使。范純粹知慶州。代其兄純仁也。長編

司馬朴丞相光之兄里之孫也。少喪母。育于外祖范忠宣公。紹聖初。黨議起。父宏坐中書論辯得罪。忠宣亦坐救黨人責永州。目疾失明。客至必令朴導以見。時方七歲。進揖應對如成人。客皆驚歎。以公遺恩補官。後死節於靖康之變。事略

右丞純禮在政府。宦者閻守忠恃寵。勢傾廊廟。一日至堂宣諭。辭意甚傲。諸公拱手而已。右丞作色叱曰。

老奴何敢爾。守忠退步連應曰。守忠不敢。在堂諸公皆爲寒心。曰。范君必不久居此矣。右丞蓋自如也。未幾虜使至。選右丞館伴虜使。忽自中批出。范某言犯御辭落職知許。尋乞宮祠去。名臣傳

元符三年秋己亥。范純禮爲龍圖閣直學士。知開封府。先是吳居厚尹京。專任察視。以刻深爲治。純禮一切寬之。或以爲言。純禮曰。寬猛相濟。聖人之訓。今處深刻之後。若益以猛。是以火濟火也。方務去前政之苛。猶慮未盡。何寬之患耶。

元符三年夏四月。是日會布再對。因言自蔡京復留中外。人情無不惶惑。及黜劉極。收用葉濤。范純禮。王右輩。人情方少安。長編

純禮以光祿卿召。遷刑部侍郎。給事中。凡所封駁。正名分紀綱。皆國體之大者。起居舍人張來。先在病告。中書省錄黃。不候參假令供職。純禮批勅。謂來旣能供職。豈不能朝見。壞禮亂法。所不當爲。一時爲之聳動。東都事略

公拜尙書右丞。侍御史陳次升。乞除罷言者。並自內批。不由三省進擬。右相曾布力爭不能得。乞降黜。純禮徐進曰。次升所陳。不過防執政引用親黨。及罷黜不附己者耳。言之者無罪。聞之者足以戒。何用深責之也。本傳

呂惠卿告老。徽宗以問執政。執政請許之。純禮謂惠卿前在二府。位節鉞。豈不存朝廷體貌。雖其人不足留。所重者國體也。本傳

戶部侍郎竇文閣待制范純粹。知延安府。先是樞密院聞趙高死。韓忠彥與王巖叟議。所以代高者。惟純

粹可及都堂聚議。呂大防亦以爲莫若純粹。他日樞密院又言差純粹極當。乞以恩意慰遣都堂。又召純粹面諭。純粹猶不受命。三省樞密院言朝廷恩意如此。若固辭免。朝廷何以使人。欲限五日朝辭。如不行。則須與行遣。純粹乞八月初赴任。從之。大防又曰。延安雖去。終恐心不安。萬一厥母道病卒。不如易之。岩叟又與忠彥論不可易之理。謂同列曰。塞上數十萬生靈性命。繫一主帥。惻隱此一人。不若惻隱及數十萬人也。

大觀中。又有虞仙姑者。年八十餘。狀貌如少艾。行大洞法。一日徽廟誦大洞經。舉首見有仙官侍立者。蔡京嘗具飯招仙姑。見大猫。指而問京曰。識之否。此章惇也。意以諷京。京大不樂。徽宗又嘗問仙姑致太平之期。答曰。當用賢臣。上曰。賢人謂誰。答曰。范純粹也。上以語京。京曰。此元祐臣僚使之。遂逐。於是士大夫爭言虞仙姑亦入元祐黨矣。澠水燕談

純粹元豐末爲陝西轉運判官。當五路大舉後。財用匱乏。屢請於朝。吳樞密居厚。時爲京東轉運使。方以治鐵鼓鑄有寵。卽上羨餘三百萬緡。以佐關輔。神宗遂以賜范純粹。得報。愀然謂其屬曰。吾部雖窘。豈忍受此膏血之餘耶。力辭訖。不納。石林燕語

章惇貶安置潭州。上諭三省言惇之惡。曾布方對。范純禮曰。惇如丁謂不爲過。詞色甚厲。布曰。如此。卽須過海上。大笑曰。只教這下。遂以雷州司戶處之。

純粹知慶州時。夏人不庭。純粹謂諸路策應舊制也。自徐禧罷。策應若虜兵大舉。一路攻圍。力有不勝。而鄰路拱手坐觀。其不拔者幸爾。謂宜脩明戰守救援之法。朝廷是之。本傳

元祐中神宗問罪夏人取其安強葭蘆浮圖朱脂四寨又取蘭州至是議分畫疆界趙高在延州純粹在慶州以爲得之無益於中國純粹請以虜所陷官吏丁夫歸朝廷以所削之地給賜之於是還以四砦而夏人服東都事略

純粹聰明下不能欺在京東時會蘇軾自登州召還與軾同建募役之議軾謂純粹講此事尤爲精詳侍郎爲帥端重有體間諜明功罪當恩威兼用邊人畏服焉本傳

高遵裕攻靈州與劉昌祚爭功欲以軍法斬昌祚昌祚憤恚成疾轉運判官范純粹謂遵裕曰兩軍不叶恐有他變力勸遵裕詣昌祚營問疾以和解之遵裕不從後果敗長編

# 范文正公鄱陽遺事錄序

漢孝宣帝常曰與我共治者其惟良二千石乎天下之廣郡有太守能用良稱者幾人哉且鄱陽禹貢揚州之域春秋時爲楚東境後屬吳史記言昭王十二年吳伐楚取番蓋其事也秦并天下曰番陽縣屬九江漢更爲鄱陽縣係豫章後漢建安十五年吳大帝時張昭等議以豫章土廣人夥請分置廬陵番陽二郡初治部故城後徙吳芮卽今之所治也梁天監中置吳州陳廢爲郡隋平陳罷郡爲饒州大業仍爲郡唐武德四年平江左乃復置州則饒之爲州殆四五百矣推諸牧守無慮近千人然摭於廳壁記自開寶八年僞唐歸朝有鐵林軍主張仁忠權知焉迄元祐壬申朝奉大夫鄒軻凡六十有八人而比閔州圖經序賢牧內史者止吳周飭晉虞溥隋梁文謙柳莊梁陸襄唐馬植李復七人焉求之州圃間有周虞梁柳陸馬李七公與顏魯公并文正公畫像以千百歲而守者近千人而其著於圖記繪像者陸虞二內史梁周二太守柳儀同馬常侍李刺史顏范二公九人云二千石之良不幾於難有耶余猝於饒見魯公雪程小娘被寇事特道其始末而圖其像以附文正公之祠堂是賢太守不可得而多也噫鄱陽之守近千人著於圖記繪像九人而公之德尤不泯饒人爲之立祠班春堂天慶觀州學之講堂凡三所繇景祐距此僅六十載香火不絕牲牢日盛較以千人間流澤之遠惠愛之被獨公一人而已矣然公之遺風餘美實浹於物每於民之去思又豈止夫祠堂而已乎公視政日所以制作修創之跡游賞吟詠之舊莫不敬而念之余因采其所敬念者命曰范公鄱陽遺事錄非敢徵名於世庶其垂誥于後而不事於召棠之歌

詠也。且公始通判河中府，徙宛丘，壓延慶、杭、越、蘇、潤、青、潁、鄧、永興，一十二郡純猷茂蹟，燦在國史家集，奏議間何假於是歟。如公所至有恩，鄧、慶二州民與屬羌畫像而生祠之，御篆以褒賢碑額，青史傳載，四方千載固已聞之矣。竊疑饒之遺事或有所未聞者，安得而棄乎。紹聖乙亥六月丁卯天台陳貽範序。

# 范文正公鄱陽遺事錄

## 慶朔堂

慶朔堂公之所剏也。在州圃之北偏左瞰蜀錦右連流杯前古春香虛靜傍對湖光四望直見清心退思以正設廳儀門之道基平而棟隆勢巍而氣壯公之意非所以示游玩也將以承宣天子風教而發施於政令儀乎古諸侯藏朔焉所以題之曰慶朔而且親植花卉欄爲二壇公旣移潤是以作詩而紀之云慶朔堂前花自栽便移官去未曾開公景祐三年八月三日到任五年正月十三日移潤州年年憶着成離恨祇託春風管勾來後之人觀公之堂思公之政及公詩之來而爭和之以刊于石壁度支員外郎提點鑄錢魏兼使君去後堪思處慶朔堂前獨到來桃李無言爭不怨滿園紅白爲誰開職方員外郎知饒州畢京花木還依舊徑栽春園不惜爲時開幾多民俗熙熙樂似到老聯臺上來詞部郎中提點江東路刑獄公事陳希亮弱柳奇花遞間栽紅芳綠翠對時開主人當日辜真賞魂夢還應屢到來供備庫副使同提點江東刑獄公事曹涇池館名花舊日栽幾番零落又春開誰人解識紅芳意猶有多情五馬來噫世人常以絳之園亭爲最而鄧之百花洲抑爲其冠若錢塘有美烏程碧瀾瑯琊醉翁貴池弄水率爲士大夫之所矜愛者然以公之慶朔名著乎建康廣信雖愚夫稚子莫不知尙頌念之非公之仁德惠澤流播于風俗間安及於此哉

## 蜀錦海棠

公慶朔堂詩云：慶朔堂前花自栽。今堂之東南隅，有海棠二樹，東西各一，夾植於小徑兩傍。說者皆曰：公之所栽也。得無詩之謂哉？公去饒殆六十載，度其高已丈餘，而蟠結之陰復四五尋。春陽之布如錦綉然，元祐末太守鄒公軻惜其無臨賞休息之所，遂築亭其後，題曰蜀錦蓋海棠本蜀植也。而花開猶錦綉推而名焉，殆非愛公之流風遺澤而充擴自栽之句耶？

郡齋

公守饒凡十有八月移潤而饒爲繁劇之郡，民頑好鬪，吏狡多梗。公下車興庠序，曉教令，待賢愛物，壹以愷悌，終日無事故。常留題曰：三出專城鬢似絲。公自河中府通判移陳州，後爲右司諫，出知睦州，後徙蘇，又知饒。是三專城也。齋中蕭灑過禪師，齋之存今有養正堂及默軒，養正默軒之名得非過禪師云？每疎歌酒緣多病，公守饒飲宴有節，然寄居過客無不得其歡心。不負雲山賴有詩。公守饒多歌詠，今之所有者有郡齋即事慶朔堂芝山寺五老亭及題昇上人碧雲軒，并贈御賜名道士鍾惟靜傳神道士程用之二絕句。凡六篇半雨黃花秋賞健，郡有提點鑄錢司廡宇，廳之傍有一亭，盡種菊，時提點魏兼與公劇相得，其亭名菊香。公爲之作秋香亭賦黃花之句，得無意於是乎？一江明月夜歸遲，人間禍福何須道。塞上衰翁也自知，後之爲守者以饒之繁劇，雖窮日力，常懼其不治。公處之有方，而民樂於愷悌，每閱公郡齋即事之詩，必跂仰而談公之優游於政也。

春香虛靜亭

春香虛靜分峙慶朔之前，與二花檻並列。傳云：乃公之所建也。慶朔之舊，常爲宴賓之憩焉。樂旣作於庭。

而卉木環抱得二亭掩映真娛樂之趣也求公之措置豈獨政事而已哉雖應接細務必有法度而爲後人之矜式良足書也

### 九賢堂

州之後圃有堂焉四壁間圖陸裏虞溥二內史梁文謙周鈞二太守并柳莊儀同馬植常侍李復刺史與顏魯公暨公凡九人因致郡圖經若陸裏虞溥梁文謙周鈞柳莊馬植李復俱以賢牧稱魯公止載於樂平縣乾元初被中丞唐晏誣劾降知饒而雪程小娘遭寇屠害父兄事不廁於賢牧之列何賢者難得如此耶國家自開寶迄紹聖六十有八人而在九賢之序者惟公一人已矣信夫人才不世出而公之仁德惠澤非尋常侔也惜乎基隘而屋庳土墮而像泯余逼於受代不得從容而新之也且命之曰九賢復錄其始末爲記云噫建康古名郡府之後圃有瞻儀堂繪像者近百人人率爲之讚然明其新舊年月而已猶饒之廳壁記焉安如九賢之必以德乎

### 五老亭

五老峯廬山之勝也饒去江殆數百里而州北芝山院危坡屹起晴霽間可以瞰焉公下車憐其可觀乃作題芝山寺詩云樓殿冠崔嵬靈芝安在哉雲飛過江去花落入城來寺去州城止三里得食鴉朝聚聞經虎夜迴偶臨西閣望五老在寺之西五老夕陽開寺僧遂作五老亭于危坡之頂饒之人寒食以芝山爲踏青所至者必曰范公五老亭也

### 碧雲軒

碧雲軒芝山寺海會堂後之小軒也。外瞰危石中鑠幽檻。軒簷之庭栽列花木蘭蘆諸藥似有高人達士趣嚮。公守饒時有昇上人占居此軒。公每到寺必適其處愛其閑寂蕭灑常爲之留題曰愛此詩家好幽軒絕世紛澄霄半牀月淡曉數峯雲遠意經年就微吟並舍聞只應虛靜處所得自蘭芬。公移潤而饒人矜公之詩有以二南名者蓋見公之辭騷雅且名重當世足以爲後人稱想有以然也。今之人纔遊芝山莫不尋僂其所以閱公之詩榜焉噫鄱陽境上如德興之聚遠餘干之于越興薦福之澄心開福之寒林幾二千首獨公之詩爲士大夫所膾炙而饒人惇尚之非公之名重當世而政著於去思何以臻此耶。

寶福侯禱雨

寶福侯乃漢之樊噲也。舊廟于芝山之頂曰鹿頭大王。公守饒凡民間旱卽禱於此神頗有驗應。今之廟地公之所徙也。且州之民邵都院者卜其地置生墳。公一日入院詰其故乃曰五十年後當出侯伯不得鬻於人於是令移鹿頭廟屋於此復移文于僧寺暨元豐庚申太守馬淵以久不雨因禱於神而霧霑沾足遂狀其感應而奏之乞加旌獎朝廷下太常封爲寶福侯淵之奏陳且道公之請雨有功修飾廟貌迄今血食以景祐迄元豐恰五十年公之先知誠可尚也後之人凡入寺見其廟必指之曰范文正公之遷而五十年出侯伯處也。

文筆峯硯池

饒之山水大率秀拔有豪傑者出焉。公之至識其形勝一日乃曰妙果禪院一塔高峙當城之東南屹起千餘尺饒之文章應也。城之下枕瞰數湖水脈連秀抑爲儒者滋顯也於是名其塔爲文筆峯目其湖爲

硯池且曰二十年後當出狀元逮治平乙巳州人彭尚書汝礪果第一人及第公之沉幾遠識良足書也。州學基

公所謂妙果浮圖爲文筆峯東湖爲硯池而郡學之基乃占文筆硯池之中而公指之也然其當州城之異地周環枕湖水長堤數里林木掩映坡麓森爽學旣建而生徒日盛榜榜有登第者多巍科異等信夫公之興剏非唯示法於一時能爲典刑於後世者也噫饒之學自晉虞溥作教諭以招誘士子數歲間聚徒幾二三千爾後零散儒風挑撻由公遷指基址今殆四千人公之德惠豈尋常之比哉惜乎公去之速未及建立而規模不甚宏齋宇不甚整迄今見者之歎惜而學者之歎念焉堂之上所以置公之祠而朝夕瞻敬者蓋不忘公之指揮也。

秋香亭

鄭公之後兮宜其百祿使于南國兮鏗金粹玉倚大旆於江干揭高亭於山麓江無煙而煉回山有嵐而屏矗一朝賞心千里在目時也秋風起兮寥寥寒林脫兮蕭蕭有翠皆歇無紅可凋獨有佳菊弗冶弗夭采采亭際可以卒歲畜金行之勁性賦土爰之甘味氣驕松筠香滅蘭蕙露溥溥以見滋霜肅肅而敢避其芳其好胡然不早歲寒後知殊小人之草黃中通理得君子之道飲者忘醉而餌者忘老公曰時哉時哉我賓我來緩汎遲歌如春登臺歌曰賦高亭兮盤桓美秋香而酡顏望飛鴻兮冥冥愛白雲之閑閑又歌曰曾不知吾曹者將與夫謝安不可盡歡而聿去乎東山又不知將與夫劉伶不可復醒而蔑聞乎雷霆豈無可而不可兮一道遙以皆寧范文正景祐間罷天章閣待制守鄱陽爲提點鑄錢魏侯作此賦公

賦之就攷其景趣求其意思宛在目下公之製作信非苟成也必其成法以矜後世古人云賦體物而瀏亮者乃公之所能賦也今其舊址雖易爲征官所居而提點之別廡於大廳之東偏傍猶以秋香名是不忘公之所愛也元祐癸酉太守鄒軻閱公之舊址而看經院之南芟剗蕪穢修平坡壠砌以廊宇以發公之所用心不幸鳩工而亡得無公之遺事在人而不衰乎

三祠堂

漢晉而降迄于聖朝守饒者無慮千餘人今之立祠祭享者止公一人而已矣信乎公之德澤惠愛遠出今古而爲民去思也且饒之所立祠班春堂天慶觀州學講堂凡三處春秋祭賽禱晴雨及州官之到罷皆修敬不絕若講學堂每遇上下釋奠亦具禮祝公之功德豈數百歲而泯耶愚以召棠歌頌比焉者蓋適於此也

長沙王廟記

長沙王迺吳王芮也東漢建安十五年吳大帝時張昭等議以豫章土廣人繁請分置廬陵鄱陽二郡初治部故城後徙吳芮卽今所治立長沙廟貌得非緣於此哉且饒之爲國殆千餘年而廟不立公之守饒始建焉然公之窮古尚德好賢樂善之心豈尋常人也今攷諸碑而刻其傳贊以歲月列公之名銜復命提點鑄錢魏兼篆額且使賢令嗣監簿純佑書公之遺跡尤足矜後人也

# 遺跡

詩曰蔽芾甘棠勿翦勿伐召伯所茇是雖召公之德教明於南國亦足見人心天理之所在盛德至善果能使民之不能忘也文正公之勳德被於海宇凡平生所至之地後人皆爲立名號建祠宇以示不忘迄今三百餘年敬慕猶昔是豈人力之所致哉於此見窮天地亘萬古斯民好善之心猶一日窮患在上者不能以善政感發之耳是故勢力非所以服人貴富不足以傳久惟盛德大業可以服人心而垂後世觀者其亦有省於斯

百花洲在南陽公集有答王叔源憶百花洲詩洲上有文正祠黃山谷先生嘗游百花洲謁文正公祠有詩

東溪書院在澧州初公幼時侍其父朱文翰宰安鄉縣讀書此地後爲文正公讀書堂寶慶丙戌知州董與幾建東溪書院

西溪書院在泰州海陵縣西溪鎮初公監西溪鹽倉築捍海隄二百餘里人懷其惠旣爲立廟邑士姜國英復請于官中書送禮部議舊有祠堂委係前賢合設書院宜從所請

忠烈廟在慶州宣和中宇文虛中爲慶帥建與种世衡同祀公廟號忠烈世衡廟號威靖

景范樓在鄧州古牙城公嘗知鄧州邦人思之建景范樓

思范亭在廣德司理廳詳見孫莘老詩及汪浮溪樓鑰祠堂記

清風橋在潤州公知潤州時所建。

范公柏在番陽郡學凡十八株俗傳公遺言柏及地則吾再出今柏枝去地不及二尺。

嚴子陵祠堂公知睦州日建以祠子陵今爲釣臺書院內有公祠堂。

讀山在池州青陽縣東十五里長山公幼讀書之地人名之曰讀山後建文正祠堂池人以公隨所養父淄州長史朱文翰之長白山非讀書於長白山所謂長山者乃在此而非淄州之長山也紹定二年池州郡守丁黼記之有辨甚詳亦未暇考。

平江府文正公祠宋咸淳間太守潛說友建撥官田以供祠事既成以聞于省依所請其東爲范文正公坊其西則文正公故宅喬木森蔚歸然故家其南則爲范家園有石刻太守李大異書國朝至元初平江路學官銜中皆帶提督范祠祠設教諭至今每歲春秋二丁郡官致祭臺省諸司官因事按吳者皆與祭凡達官顯人過吳必拜謁祠下其題名具在。

吳郡學本文正公南園也公以南園爲郡學後公仲子持節按吳復加增廣至今郡學爲浙中之最學有文正公祠以范氏子孫一人爲主祠。

褒賢寺在洛陽文正公忠宣公墓在其地是寺爲奉祠之所內有仁宗所篆褒賢碑吳中子孫亦常遣人至洛陽致祭其寺僧亦常來吳。

褒賢顯忠禪院重修法堂記

奉議大夫前同知歸德尹事賜紫金魚袋蔡如撰并書

昔佛成道坐於菩提樹下化力風行峯象頭山入王舍大城瓶沙王御于郊野因以迦蘭陀竹園爲佛寶舍伽藍之興自此始也漢明帝夢金人項佩日光飛于殿庭乃遣蔡愔秦景使大月氏與攝摩騰竺蘭遇焉二沙門入于洛獻釋迦圖像并諸經於是肇有寺於洛城佛法入中國自此始也由漢至唐由唐至宋悉加崇奉故此禪院創自李唐初名法會宋元祐間范文正相公得請于朝改號褒賢顯忠經靖康亂法堂火災有慧照大師福渙來住斯刹四方敬信徒衆歸依時河南初定人烟稀少師乃振錫渡大河登太行抵金臺勸化鄉黨仁彥智夫得金以歸命工伐木造瓦重建法堂一所水磨兩盤修葺弊漏煥然鼎新招來客所廣闢田疇倉廩實矣齋粥衍矣梵香芬藹法喜禪悅嗚呼無慈悲之德者昧於苦樂不能興是事無喜捨之心者著於慳貪不能結此緣無穎悟之識者樂於小法不能成此大惟師脩行四無量法惟師參悟佛光真諦是以名達天庭禮納使相住持向太后功德寺太觀宣和間聲名籍甚今行年八十有七而能辨此一大事因緣可以見其平昔之志丁卯仲冬師來訪知足居士曰本院修造於皇統乙丑至丙寅仲夏畢功未有爲我記者敢請居士爲記其事以示後人居士唯然願樂書之皇統七年十一月十三日記

住持傳法慧照大師福渙立裴卞刊

尙書禮部牒准元祐三年月日辰時到部

門下省送下中書禮部奏准都省批下太中大夫尙書右僕射兼中書侍郎上柱國范純仁狀近奉旨授尙書右僕射合依例置度僧追薦先祖純仁先祖母及父塋在河南府河南縣有功德褒賢禪院今欲乞

兩遇節於本院添剃度行者一名。□祖以上並葬蘇州天平山白雲寺亦乞兩遇□節添剃度行者一名其兩處。□每一年度一名申尙書省伏乞依例施行狀前批送禮部奉乞請一依指揮施行者右下褒賢院仰一依前項禮部牒內旨指揮施行元祐三年七月初三日范文正公既葬而墓隧之碑乃立嘉祐元年仲兄右丞相時爲著作郎以國朝故事大臣塋所恩許置寺度僧遂請于朝願以彭婆鎮舊法會院改賜名額間歲聽度一僧以嚴崇奉朝廷從之元祐元年仲兄進貳樞府三年乃登相位兩以例恩皆得增度僧數它日院之度僧道因請以始末詔旨刻諸石余旣許之又爲書其所以然者元祐四年。□月六日左朝請郎充寶文閣待制環慶路經略安撫使兼馬步軍都總管兼知慶州軍州事范純粹記。

至大二年四月七世孫邦瑞遣八世孫國雋宗俊宗是資江浙行省咨河南行省河南省劄付河南府路委自同知徐景儒率屬僚詣墓加禮致祭

先文正公墓下祭文

昔吾范氏始於陶唐根本深固奕葉流芳漢有清詔郡國流行唐有春官鳳闕平章世家河南譜係甚詳咸通以後一枝渡江爰居度處闔閭舊邦麗水峨松誥牒猶藏子孫保之爲今甘棠四世而後文正挺生少長北地卽家穎昌學問淵海聞望珪璋條奏十事嘉謀孔彰昭陵注倚國之棟梁四子顯貴悉稱元良監簿忠宣恭獻侍郎封胡羯末華萼相光父子勳業巍巍煌煌具載信史代曰無雙化窮數盡玉藏洛陽佳城鬱鬱拱木蒼蒼炎運中微紐解皇綱地維云絕南北異疆市無寧居後昆彷徨離湯沐之故邑不復敬止於梓桑別祖父之先塋不克時奉於烝嘗孤兔得以出沒荆榛從而蕪荒多歷年所幾易星霜丘壠

寥聞風悲白楊瞻望弗及念切羹牆坤軸旋轉咸歸職方車同軌轍衢出康莊展敬松楸匍匐跼蹐恭拜墓下我心則降目想英靈如侍其旁有肴在俎有酒在觴幽冥感格歆予馨香福我後人地久天長


歸拜辭墓文


某等自高祖曾祖祖父不獲拜省始祖祖禰墓域者又四世矣抱恨終天齋志而歿勢使然也時使然也奈之何哉今則天道好還地軸旋轉南北坦塗離而復合機會之來間不容髮某等匍匐至此恭拜墓下翦其荆棘上以慰祖宗屬望之靈下以盡子孫追遠之責先憂後樂不墜成訓至若徼福後人悃愞已露不敢再犯瀆告之戒祀事告畢言還言歸回塗寧止不能無望吾祖宗之默相也敢告



吳中遺跡

夷山圖





天平山在吳縣西去吳郡城二十七里。其山峯巒峭拔。石皆卓立。與他山絕異。其山上有龍門頭陀巖。五丈石蟾蜍石。龍頭石穿山洞。卓筆峯飛來峯。半山亭小石屋。大石屋烏龜石釣魚石。臥龍石照湖鏡等石。

白雲泉在天平半山間。泉色如乳。四時不竭。以烹茗甚佳。泉側有石刻白樂天詩。文正公及蘇子美俱有詩。泉之上今爲白雲亭。喬木環合。高據重崖。俯見平野數十里間。如指諸掌。橫山諸峯羅列面拱。誠佳致也。

白雲寺在天平山下。右石刻刺史白居易詩。慶曆四年。文正公奏本家松楸在此。實籍此寺照管。請賜額爲白雲寺。蓋以白雲泉而名也。寺有無量壽佛閣。住山僧遠禪師嘗與忠宣公登其上講經。

乾道丁亥汎舟遊山錄

周益公

五月丁亥早范至能。顏休文相別於閭門外。唐致遠聯舟遶城望姑蘇館。而過八里。至橫塘。又數里。至黃山。又數里。過木瀆。遂至靈巖院。至能走价送薰香松黃新茶。其簡云。來日登天平頂攀援至遠公亭。及諸石屏處。白雲泉泉在水品。其色凝白。蓋乳泉也。張又新以虎丘石井松江。在第三第六而下。此泉未知如何。試一別之。向壽老欲作亭泉上。及別築遠公亭。寺右上山路傍有石龜。極形似。向亦有名。近無知者。忠烈廟具有文正已下畫像挂壁。謁之丙辰早升小車。過天平下嶺。甚峻。約數里。至白雲寺。圖經云。唐寶曆二年置在縣西南二十五里。本遠錄公道場。今爲范文正公功德院。文正父祖葬山下。寺有白樂天蘇子美王君玉蔣希魯詩刻。欲同致遠登山。而腳力頓疲。難之。然思至能簡中語。恐遺恨它年。遂奮衣右轉而

上酌白雲泉甚白而甘。躡石磴至卓筆峯。峯高數丈。截然立雙石之上。附著甚覩。疑其將墜。餘如屏如壘。或插或倚。備極奇怪。行十六七石。愈衆而力愈憊。迺循左徑訪石屋。三面壁立。覆以二大石。少休其中。下至小石屋。一石覆之。又下至飛來峯。高二丈。上銳下侈。微附磐石。前臨崖谷。茲其異也。又東下遠公菴。一名望湖臺。正直寺後。又下至五丈石。亦閣石上。次至頭陀巖。有蓋斜蔽之。次至龜石。脊勢隱起。名不虛得。此山大抵皆石也。瑰形詭狀可喜可愕。今日適疲倦。又當暑。不能窮其巔。然郡人能至予之所至者寡矣。況游客乎。歸寺欲拜文正及四子畫像。坐待魚鑰。移時乃至。明日蓋文正忌辰也。

跋龍門二大字

天平之龍門卓筆。殆似造物者特爲范文正公而設。淵西提刑盱江包恢請史校勘桐江楊德藻作。

游天平山記

中吳之西山。天平山爲之長。實爲吳鎮原隰環之。江河絡之。其上多怪石。如漸冰。如瓊木。或立或僵。或如介夫。或如奔馬。不可名狀。其木多松檜。有泉出焉。曰白雲之泉。瀉於蒼崖。激於巨石。注於絕澗。其聲如鳴玉。其味甘冽。是山也。范魏公之祠在焉。其祀用中牢。魏公吳人。有施於鄉黨。德義至厚。旣死而不歿。故鉅公名卿高人韵士。經由是邦。莫不肅拜祠下。顧瞻遺像。而仰其休風。夫玉蘊石而山輝珠藏。淵而川媚。况德義所加。丘陵林麓。有不增其高而發其耀者乎。故茲山之勝。抑其亦以其人也。至元再元之歲。冬十有二月。江淵行省參政李木魯公徵拜翰林侍講學士。於是郡守濟南張公亦拜吏部尙書。趨朝有日。適相遇也。班荆語舊。偕遊是山。謁魏公之像。臨白雲之泉。翰林各賦詩七言四韵。九思等屬而和之。新除教授

紹興路儒學范文英靜翁魏公八世孫也。主奉祠事。奉觴爲壽。而請曰。翰林擅詞宗於當代。尙書被遺愛於中。吳雅道允叶嘉會。難逢不載以文。何以示後。請爲之記。將刻諸祠。翰林以命九思。固辭不獲。因道先生遺德。山林勝概。而附以茲游之歲月焉。翰林名翀。字子翬。尙書名基。字淵仲。同遊者。平江路總管府判官楊時。舉思明推官王大有。廷秀經歷王諫。仲正知事伯都彥實。儒學教授蔣伯昇。進之玄明通道虛一先生趙嗣祺。住持白雲寺沙門淨標。爲文者奎章閣學士院參書文林郎柯九思。

義學去天平山一里餘外。有孔子廟。內有文正公祠。左右設敬身知本兩齋。中爲清白堂。詳見陵陽牟先生義學記。

太師墳。文正公祖父唐國公周國公所葬。在天平山之下。其穴主天平正峯。以秦臺山爲外門。以橫山爲遠。按環抱拱掘。形勢甚奇。按王氏語錄。徐忠翊嘗遇一好山水。心期爲公相之地。意謂我方以術求售於時。待其克應於幾十年之後。孰若待應於不數年之間。則人信向我方。身享其利。故必擇人與之。不肯輕畀。且如公相之材。非里巷所有。必於輦轂之下。四方賢英畢集之地。求之寓京師七年。始遇范文正公。以品官詣禮部。徐識大貴也。欣然以地圖授之。范謝徐以相見之晚。適先柩已塋四年矣。慕徐名術。發圖視之。則形勢向背全類其所葬之地。其地名又合。范遣介約徐同往觀之。其穴法之高下向背。皆與術契。惟窖堂太深。猶是俗術規爲。卽斷曰。公相當自此生已。生者去公相一間耳。歸而與范曰。足下優游致身於參樞之地歟。然范嘗吟中秋月詩曰。已知千里共。猶訝一分虧。事皆默契。後范子果拜相。卽堯夫也。

秦臺山在天平山之右。大石巉峯上刻秦臺二字。俗傳秦始皇游會稽嘗到此。

太師墳公曾祖徐國公所葬在天平山之南。正與靈巖山相對。

無外居士墳在白雲寺前。居士亦文正諸孫。卽作元夕寶鼎現詞者。

范文穆公石湖先生墓在天平山之西南。有覺巖寺爲奉祠之所。文穆公居石湖而葬於此。意欲自附於天平之范者歟。


吳縣忠烈廟在白雲寺之右。宋南渡慶州隔絕。置忠烈廟於此。至今每歲郡官致祭。凡名公鉅卿之來吳者。多詣天平謁拜廟下。


臥雲書院在天平南三里。有怪松屈盤於地。偃蹇數畝。極爲奇古。俗名眠松。旁有石刻盤松二大字。篆文

字畫甚古。上有臥雲書院范氏建。內有文正公及狄武襄公遺像。

白山遺跡

長白山圖





醴泉寺在長白山麓文正公未第時讀書此山大德癸卯寺僧德榮始塑公像寺中中菴劉敏中有詩遺德榮刻諸石

懷范樓在城東南南望羣山如畫至元癸巳春縣尹濟南安承務重建刻其詩及移名人詩石於其上  
齋堂嶺在會仙山之南以公嘗讀書於其上故名其有上書堂

下書堂在齋堂嶺南十里許按劉仲元記云傍鄒邑山也齋堂處其東長白峙其南聖王諸山連峰委會於其西聖王之南有山曰會仙其峯壁立特起蒼翠可愛其中有堂故基曰書堂世傳以爲文正范公之別墅也又按魯昌祖創修祠堂記齋堂嶺徑北十里許會仙峯之巖公之下書堂遺龕在焉工部侍郎賈侯之莊在茲山之下仰公之德意欲創起祠堂於山之麓先出楮幣三十七貫文以助工役之需監縣房侯唐卿未登仕版時慕公之爲人常有慷慨感歎之心斯任之來斯事正符宿昔之願勇於爲義體勉從事無時或怠鳩工貿材經營之際縣尹石侯縣丞成侯主簿丘侯典史王國昌同心合助之或曰山麓荒蕪祠堂雖就恐爲野火焚毀樵牧戲踐祠成乏香火之供反爲不敬何以勸善盍若少北二里許醴泉寺之巽隅高平爽壇興蓋若何侯曰善仍以都目趙鑑弟趙銓孫克敬督其役興功於大德庚子秋七月至大德辛丑夏四月落成堂宇壯麗儀形儼然


范公泉在青州洋溪皇祐中文正公帥青社有德於民而州之乾方洋溪醴泉出焉後人目之曰范公泉詳見任城王所撰記


文正公祠堂在長山縣治平三年知縣韓澤建撰記



洛陽志

萬安山圖





至正七年八月辛未朔越四日甲辰奉議大夫河南府路達魯花赤也先不花奉議大夫河南府路同知郭文鼐承直郎河南府路判官董鉉將仕佐郎河南府路知事劉臣源河南府路照磨胡欽祖茲以故宋

太師魏國文正范公八世孫文英謹遣男廷方不遠數千里省墓洛陽且復侵地某等仰公德澤之深遠感公裔孫之不忘其祖而媿吾有司弗克戒約毗隸之無知者因以潔牲清酌之奠爲文以祭曰

惟公學貫天人材兼文武濟貧活族德澤過於晏嬰出將入相勳業擬於伊呂惟昭代之尚賢嘉不茹而不吐爰肇崇於祀典實名教之有補何毗隸之無知卽丘墳而敢侮壞樹暴於斧斤域兆鞠爲禾黍犯葬憲而不卹徒昏頑之是怙屬裔孫之來斯增有司之媿負認異代之松楸復侵犯於強禦戒樵牧於晨昏謹封藏於終古倘彼毗之不悔其斯言之是睹致薄奠以陳詞覺汗下之如雨尚饗

祭丞相忠宣公

維公世濟忠直名昭日星眷茲洛土有崇其塋彼毗蚩蚩恣爲盜賊旣伐松楸又滋稼穡神雖未殛法實難容裔孫戾止爰復故封凡百丘壠莫之敢廢引公父子有功於世戒飭禁約責在有司繼今以往孰敢弗祇崇酒於觴登肴於俎神其監之永安終古

范氏復祖塋記

天台陳基譏奉訓大夫江南諸道行御史臺監察御史幹勤海壽書中奉大夫陝西諸道行御史  
臺侍御史丁元篆額

故宋太師魏國范文正公以上三世墳墓在吳縣之天平山至公之薨始葬洛陽萬安山母夫人謝氏之

兆。其子監簿忠宣恭獻侍郎以下三世皆祔焉。中更靖康之亂。子孫之在吳者弗獲以時展墓。唯顧瞻山河北嚮流涕而已。我世祖皇帝混一四海。列聖相承。誕敷文德。而尤惓惓焉致意於古今忠臣烈士。有功於名教者。故公克與天下之名山大川。前代之聖帝明王。並登祀典。每歲仲丁。有司祇奉中牢。致祭惟謹。可謂盛矣。然亦不過卽天平之白雲。以寓其高山仰止之意。而萬安之原。至大中八世孫國俊僅一至其處。同知徐君景孺爲復侵地。亦存什一於千百。自是又三十九年。爲至正七年。國俊從弟將仕佐郎文英。謂其子崑山州教授廷方曰。嗚呼。自陵谷變遷以來。故家喬木。零落殆盡。吾子孫幸生聖明。以孝治天下。之時。憑藉餘澤。食有義田。居有義宅。教有義塾。凡養生送死。可以無憾。而祖宗二三百年之丘壠。所恃以爲藏者。鞠爲芻牧之區。徐君所封。亦已侵削。尙安在其爲子孫哉。洛陽土風。號爲近古。豪民無知。可以德化。不可以力勝。吾聞御史幹勒君允。常居里第。日以吾先文正公濟貧活族之仁自勉。而僉事李君公平。分應於洛。又傳執筆而爲公之傳者。誠以狀白之。必有以矜吾之志也。廷方卽日具資糧扉屨不遠數千里。致其父之命。於是李君首出俸金。爲之倡。幹勒君率鄉黨與同知郭君文鼎。判官董君鉉。奉牲幣爲文以祭於墓下。所謂豪民之無知者。觀感而化。卒復徐君所封之舊。而其地以畝計者若干焉。旣繚以周垣。益以樹壘。又築室六楹。俾其甥趙氏廬其上。甫竣事。以基嘗與觀籩豆玉帛之盛。使書之於石。竊惟文正公以間生之氣。王佐之才。致位將相。爲宋宗臣。百世之下。誦其詩。讀其書者。可以立忠信。而尊君父。興王道。而致太平。故其少而肄業。長而從政。所至之地。遺愛不忘。率繪像以爲祠。刻銘以頌德。顧是寃在。其父子平生宦居衣冠禮樂之鄉。而使斧斤未耜。日相尋於其中。豈國家尸而祝之。以待先賢之意乎。繼

自今茲爲子孫者如文英之不忘其本處里閭者如幹勒君之推尚古道居風紀者如李君之知所勸相爲有司者如郭君董君之克恭所事則萬安之松楸將人人爲之封殖益久而不廢尙何斧斤未耜之患乎哉公父子世濟忠直太史有傳神道有碑家乘有載茲不敢以瀆書書其復塋歲月以爲方來告云是歲丁亥十月丙子謹記嘉議大夫河南府路總管兼本路諸軍奧魯總管管內勸農事知河防事張明遠奉議大夫同知河南府路總管府事郭文鼐承直郎河南府路總管府判官董鉉將仕佐郎河南府路總管府知事劉巨源河南府路總管府照磨胡欽祖昭勇大將軍河南淮北蒙古軍都萬戶府副都萬戶失里伯吉從仕郎河南淮北蒙古軍都萬戶察罕帖穆爾昭毅大將軍河南淮北蒙古軍都萬戶府副都萬戶失里伯吉從仕郎河南淮北蒙古軍都萬戶府經歷兀納罕知事郭仲禮提控按贖趙璋儒學教授丁士恆學錄蔡世責等立石



西夏堡寨

陝西五路之圖





蓮花堡在鎮戎軍西南與德勝堡相連又定川砦諸葛亮城皆在鎮戎界嘗有蕃賊至此公遣張建侯往救應

長武寨在涇州西賊寇邊公與都監張肇部領軍馬離邠州取長武路往涇州策應後又聞賊分軍回奔保安軍上面公又差巡檢宋良蕃部巡檢趙明部領蕃漢軍馬往長武把隘

萬安鎮去保軍八十里初延州有一將軍馬在保安軍駐劄費用糧草供應不辦公乞將保安軍所駐軍馬抽退於萬安鎮就食糧草却將萬安鎮一將軍馬抽退延州亦只八里

馬鋪寨通近後橋白豹寨每有賊馬出來公脩此砦時兵馬不多只是據河西山坡特重下砦不與追逐其砦城十日內泥築并泥飾了當

木波寨在環州正當賊來大川路惟賴諸寨蕃部熟戶同共防托公恐熟戶二心未可倚仗遂保舉种世衡知環州以牢籠蕃部

定邊砦在環州公嘗令劉貽孫至此相度葫蘆泉一帶立寨接連鎮戎軍去處

明珠滅臧二族在環州之西鎮戎之東二族之北有葫蘆泉公併兵於其地修起城砦招撫二族

華池鳳川平戎三寨皆在慶州東平戎去延州德靜砦七十里華池去德靜一百一十里鳳川去德靜一百二十里公指揮慶州并諸寨並權住入中白米却告示客旅並令於東路延州接界平戎鎮添價入

中白米

慶州路有美泥虐泥大拔城等處小砦公只差兵士百十人防托如賊馬大段入寇便令歸側近大城寨

內一處防守所貴不致枉陷軍民人心稍安。

薄家莊在岢嵐軍火山軍之間。公以火山軍城中無水兼地窄狹難守。奏乞於中路薄家莊擇地共脩城砦。

東關城在岢嵐軍水砦外。公以岢嵐城小將東關城築作大城。檢計到土工五十二萬七千九百四十五工。

神堂堡銀城寨在麟南五十里。公令經略司相度興修。令人戶耕種住坐續修神樹寨并堡子。府州於鞋斜谷端正平等要害處置大寨兩坐。又置堡子三坐。

篳篥城在秦州田况嘗請修築。公奏乞依田况所奏早賜指揮佛空平明珠等族所居。公嘗令蔣偕燒蕩其地族帳。

金明城在延州。公奏議近重修金明城且托得北面又東北廢却承平南安長寧白草等寨後東西四百里更無藩籬可以禦寇。候金明城了方修寬州以禦東北。

鳳川寨在慶州東城被山坡直下臨注或可西賊圍閉矢石入城禦捍不下。公牒李不諒宋良同往鳳川相度得本寨東烽火臺山上四面牢固及山脚下有好水泉可以置砦。令弓箭手兵士等寅夜興工山上只築女牆四面削崖近下低處築城圍入水泉續又牒本州通判范祥相度令新修砦城分擘街巷修蓋軍營倉房草場解署及城上皆安置敵樓。

唐龍鎮與契丹對岸在府州之北豐州之東其東南火山軍對岸公奏乞招誘唐龍鎮七族人口。

故寬州在延州東北三程。公言昨廢却承平塞門等砦。惟此一處最爲控扼。蕃賊牒監修官相度一併下手修築後。又奏乞以寬州城爲青澗城。

鄜城縣在鄜州南至同州河中府各四程。北至鄜州兩程。至延州五程。公乞朝廷建鄜城縣爲軍。以康定爲名管鄜城縣。并於同州割一縣爲之屬。建倉敖營房。所有同華河府苗稅。於此送納。後公又令知鄜州李丕諒相度。丕諒差劉襲禮將帶匠人往鄜修展城牆。高一丈。底闊四尺五寸。面收一尺五寸。蓋馬棚瓦舍三百間。繫得馬二百疋。安下得兵士四千五百人。兼修露圈二十八箇。計度到二萬九百九十五工。

延州城在寬州東南四十里。公嘗請於朝。乞以延川縣爲延川城云。彼中人烟不少。更有井泉勝於寬州城。肅遠馬嶺定邊永和安塞等砦在環州界。初諸寨城牆低下。壕塹淺狹。公牒環州那廂兵軍士及和雇人夫修築。

細腰城。公令蔣偕等所築。公又勘會本城至環州定邊砦三十七里。西至鎮戎軍乾興寨六十里。南至原州柳原鎮七十里。量其地界遠近。所修城寨地主并側近蕃部。元屬環州。兼本是環慶路擘畫修建。兼細腰城東北板井川。是西賊來路。在細腰城定邊寨之間。係屬環州地分。緩急若有奔衝。卽須定邊砦與細腰城互相救援。就環州節制甚順。奏乞朝廷撥屬環州。

萬安寨在延州西北。往保軍路中路。舊無城砦。公差周美郭慶楊麟部領延州虜施兩縣人戶并廂軍修

築計度到六萬一千六百五十七工。并修築敵樓戰棚。

豐林縣地在延州東二十五里。就崖爲城。青化鎮在延州東六十里。公差陳永圖部領臨真豐林兩縣人戶修築。計二萬六千五百五十二工。

甘泉縣城在延州南八十里。公差任世京部坊州丹州人夫修築。計六萬五千三百四十五工。  
承平砦在延州東北二百里。在青澗城西八十里。把截得承平川大路。寨北大里河。約六十里。自來蕃族。在大里河北居住。公嘗請復修此砦。以遏蕃賊。不使過河云。初修之時。則部署司那兵馬大爲之備。畢工之後。只銷得二十人駐劄。

南安寨在延州東北二百七十里。在青澗城正北七十里。北至綏州四十里。去無定河二十里。公嘗欲修之。以其去水泉稍遠。朱吉种世衡欲於青澗城北四十里。商館鋪南安寨中路。創修一山寨。榜榜砦在延州北八十里。嘗爲賊所破。公相度舊砦南五里。地名龍平口。興置一寨。把截安遠塞門龍口川賊馬來路。

胡家川寨在延州。初胡繼謗乞修鶴子城。公差殿直楊麟興工。麟州申稱。計七萬四千工。恐難了當。公遂差推官何涉與胡繼謗相度。於胡家川莊北面書按山上修築一砦。計三萬三千餘工。下面川口是德靖砦。保安軍來路。地勢委是要害。只差本族熟戶人工。官給口食。并差庸軍三百人往彼助工。三關城在延州。公牒招討那撥諸州。差到兵士五千人興修。義蓮鋪在延州。康定二年四月。公差使臣趕殺西賊。抵此奪得人馬駱駝牛驛。

牢山驛新店驛在麟州至延州一百六十里間嘗因朝臣上言減廢公嘗與明鎬至此軍馬疲乏無支請草料去處公言鄜延路最爲屯兵去處日有軍馬及使命過往遂牒延州卽補二驛每有過往使命軍馬或遇晴明直到中路甘泉縣卽支給一日口糧等物若遇雨雪及山河水漲卽於新店牢山止宿公嘗言能進兵據葫蘆泉爲城壘北斷賊路則二族自安宜無異志後竟於此地築城招服明珠滅臧二族

永洛城在朝那之西秦庭之東公嘗奏言策應軍馬由儀隴二州十程始到如能進修永洛城斷西賊入秦庭之路其利甚大非徒通諸路之勢因以張三軍之威者也



# 建立義莊規矩

范忠宣公奏

知開封府襄邑縣范純仁切念臣父仲淹先任資政殿學士日於蘇州吳長兩縣置田十餘頃其所得租米自遠祖而下諸房宗族計其口數供給衣食及婚嫁喪葬之用謂之義莊見於諸房選擇子弟一名管勾亦逐旋立定規矩令諸房遵守今諸房子弟有不遵規矩之人州縣既無勑條本家難爲仲理五七年間漸至廢壞遂使飢寒無依伏望朝廷特降指揮下蘇州應係諸房子弟有違犯規矩之人許令官司受理伏候勅旨右奉聖旨宜令蘇州依所奏施行

劄付蘇州准此

治平元年四月十一日

押

文正位

勘會先文正公於平江府興置義莊賙給宗族德澤至厚其始定規矩雖有版榜不足久傳及有治平元年所得朝旨亦未揭示族人兼有後來接續指置可爲永式者未曾刊定深慮歲久漸至隳廢今盡以編類刻石置于天平山白雲寺先公祠堂之側子子孫孫遵承勿替今具如後

## 文正公初定規矩

一、逐房計口給米每口一升並支白米如支糙米卽臨時加折支糙米每斗折白八升逐月實支每口

白米三斗。

一、男女五歲以上入數。

一、女使有兒女在家及十五年年五十歲以上聽給米。

一、冬衣每口一疋十歲以下五歲以上各半疋。

一、每房許給奴婢米一口卽不支衣。

一、有吉凶增減口數畫時上簿。

一、逐房各置請米曆子一道每月末於掌管人處批請不得預先隔跨月分支請掌管人亦置簿拘轄。簿頭錄諸房口數爲額掌管人自行破用或探支與人許諸房覺察勒陪填。

一、嫁女支錢三十貫七十七陌下並准此再嫁二十貫。

一、娶婦支錢二十貫再娶不支。

一、子弟出官人每還家待闕守選丁憂或任川廣福建官留家鄉里者並依諸房例給米絹并吉凶錢數雖近官實有故居家者亦依此例支給。

一、逐房喪葬尊長有喪先支一十貫至葬事又支一十五貫次長五貫葬事支十貫卑幼十九歲以下。

一、喪葬通支七貫十五歲以下支三貫十歲以下支二貫七歲以下及婢僕皆不支。

一、鄉里外姻親戚如貧窘中非次急難或遇年飢不能度日諸房同共相度詣實卽於義田米內量行濟助。

一、所管逐年米斛。自皇祐二年十月支給逐月餚糧，并冬衣絹約。自皇祐三年以後，每一年豐熟椿留二年之糧。若遇凶荒，除給餚糧外，一切不支。或二年糧外有餘，却先支喪葬次及嫁娶。如更有餘，方支冬衣。或所餘不多，卽凶吉等事，衆議分數，均勻支給。或又不給，卽先凶後吉，或凶事同時，卽先尊口後卑口。如尊卑又同，卽以所亡所葬，先後支給。如支上件餚糧，吉凶事外，更有餘羨數目，不得耀貨。椿充三年以上糧儲，或慮陳損，卽至秋成日，方得耀貨，回換新米椿管。

右仰諸房院，依此同共遵守。

皇祐二年十月  
日

資政殿學士尙書禮部侍郎知杭州事范  
押

### 續定規矩

- 一、諸位子弟得大比試者，每人支錢一十貫文，七十七陌下皆准此。再貢者減半，並須實赴大比試。乃給卽已給，而無故不試者，追納。
- 一、諸位子弟縱人採取近墳竹木，掌管人申官理斷。
- 一、諸位子弟內選會得解，或預貢有士行者二人，充諸位教授。月給糙米五石。若遇米價每石及一貫以上，卽每石卽支錢一貫文。雖不曾得解，預貢而文行爲衆所知者，亦聽選，仍諸位共議。本位無子弟入學者，不得與議。若生徒不及六人，止給三石及八人，給四石及十人全給。諸房量力出錢。

以助束脩者聽。

右三項以熙寧六年六月 日二相公指揮修定。

一掌管人侵欺及諸位輒假貸義莊錢斛之類並申官理斷償納不得以月給米折除。

一族人不得租佃義田詐立名字同。

一掌管子弟若年終當年諸位月給米不闕支糙米二十石雖闕而能支及半年以上而侵隱者給一

半已上並令諸位保明後支若不可保明各具不可保明實狀申文正位。

一義莊勾當人催租米不足隨所欠分數尅除請受謂如欠米及一分即只支九分請受之類至納米足日全給已尅數更不支有情弊者申官決斷。

右四項以元豐六年七月十九日二相公指揮修定。

一身不在平江府者其米絹錢並勿給。

一兄弟同居雖衆其奴婢月米通不得累過五人謂如七人或八人同居止共支奴婢米五人之類。

一未娶不給奴婢米雖未娶而有女使生子在家及十五年年五十歲以上者自依規給米。

一義莊不得典買族人田土。

右四項以紹聖二年二月初八日二相公指揮修定。

一義莊費用雖闕不得取有利債負。

一義莊事惟聽掌管人依規處置其族人雖是尊長不得侵擾干預違者許掌管人申官理斷卽掌管

人有欺弊者聽諸位具實狀同申文正位。

右三項以紹聖二年四月二十九日二相公指揮修定。

一、義倉內族人不得占居會聚非出納勿開。

一、因出外住支月米者其歸在初五日以前取諸位保明詣實聽給當月米。

一、義宅有疎漏惟聽居者自修完卽拆移舍屋者禁之違者掌管人申官理斷若義宅地內自添修者聽之本位實貧乏無力修完而屋舍疎漏實不可居者聽諸位同相視保明詣實申文正位量支錢完補卽不得乞添展舍屋。

一、諸位請米曆子各令諸位簽字圓備方許給給訖請人親書交領卽去失曆子者住給勒令根尋候及一年許諸位及掌管人保明申文正位候得報別給曆頭起支。

一、積留月米併請者勿給。

一、諸位不得於規矩外妄乞特支雖得文正位指揮與支亦仰諸位及掌管人執守勿給。

一、義莊人力船車器用之類諸位不得借用。

一、諸位子弟官已陞朝願不請米絹錢助贍衆者聽。

一、諸位生男女限兩月其母或所生母姓氏及男女行第小名報義莊義莊限當日再取諸位保明訖。

一、遇有規矩所載不盡事理掌管人與諸位共議定保明同申文正位本位有妨嫌者不同申雖已申註籍卽過限不報後雖年長不理爲口數給米。

一、遇有規矩所載不盡事理掌管人與諸位共議定保明同申文正位本位有妨嫌者不同申雖已申註籍卽過限不報後雖年長不理爲口數給米。

而未得文正位報不得止憑諸位文字施行。

右十項以元符元年六月 日二相公三右丞五侍郎指揮參定。

一、諸位關報義莊事雖尊長並於文書內著名仍不得竹紙及色牋違者義莊勿受。  
右一項以元符二年正月十七日三右丞指揮修定。

一、義莊遇有人贖田其價錢不得支費限當月內以元錢典買田土輒將他用勒掌管人償納。  
右一項以崇寧五年十月十二日五侍郎指揮修定。

一、諸位輒取外姓以爲己子冒請月米者勿給許諸位覺察報義莊不爲受理許諸位徑申文正  
位公議移文平江府理斷其大觀元年七月以前已收養給米者不得追訟。

右以大觀元年七月初十日五侍郎及二相公指揮參定。

一、諸位子弟在外不檢生子冒請月米掌管人及諸位覺察勿給卽不伏掌管人及諸位申文正位移  
文平江府理斷。

右以政和三年正月二十一日五侍郎指揮修定。

一、族人不得以義宅舍屋私相兌賃質當。

右一項以政和五年正月二十九日五侍郎指揮修定。

右仰義莊及諸位遵守施行內文意前後相妨窒礙者從後規若有違犯仰掌管人或諸位備錄治平元  
年中書劄子所坐聖旨申官理斷各令知委。

政和七年正月十三日

朝散大夫充徽猷閣待制提舉亳州太清宮范

續定規矩

清憲公奏

朝散郎左司諫兼侍講范之柔奏臣不避誅夷輒瀝誠悃仰干天聽伏念臣五世祖故參知政事謚文正臣仲淹奮身孤藐遭世休明深念保族之難欲爲傳遠之計自慶曆皇祐以來節次於蘇州吳長兩縣置田畝立義莊贍同姓創定規矩刻之板榜以貽後人已而臣高叔祖故尙書右僕射謚忠宣臣純仁於治平元年知開封府襄邑縣日慮板榜不足久傳且諸房子弟有不遵規矩之人州縣旣無勑條本家難爲伸理必將漸致廢壞卽嘗具奏乞降聖旨下本州許令官司受理繼蒙朝廷依所奏施行遂得憑藉保守伏自南渡之後雖田畝僅存而莊宅焚毀寄廩墳寺遷寓民舍蠹弊百出盡失初意慶元初臣與兄弟始協謀同力盡復故基漸還舊觀參定約束加備於前固嘗經本州鏤給板榜揭示義宅然非更得朝廷行下本州申明受理元降指揮恐無以善後懷此日久無路自伸今臣幸蒙公朝軫念故家擢綴班列若不於此時控告君父則何以副先人屬望子孫之意用敢冒昧以聞伏望聖慈俯鑒微衷特頒睿旨劄下平江府令將續添規約常切照應治平元年已降指揮受理庶幾足以勑厲來者增固舊規臣與閩族實均戴天地施生之造所有治平元年指揮并慶元二年續添條約謹繳連在前瀆犯宸嚴臣無任惶懼俯伏俟命之至謹錄奏聞伏候勅旨前連治平元年已降規約指揮十一月五日奉聖旨依右併錄連

送范司諫。

嘉定三年十一月七日。

一、文正公曾祖徐國公。祖唐國公。父周國公。墳塋並在天平山坐落間。有族人輒敢於上牧羊及偷斫林木柴薪。近雖行下義莊專一責令墓客看守外。今後如有違犯之人。諸房覺察。申文正位罰全房月米一年。全房謂照本房請米。曆內口數。並行住罰。下皆准此。義莊輒令墓客充他役者。罰掌莊子弟。本名月米一季。

一、天平功德寺乃文正公奏請追福祖先之地。爲子孫者所當相與扶持。不廢香火。今則不然。多有疎遠不肖子弟。請過義米歸已。却返蠶食於寺中。至有欺詐住持。逼逐僧行借。借舟船役使人僕。亞托私酒。偷伐林木柴薪。強占常住田地布種。或作園圃。不還租米。以致常住空虛。住持數易。日漸敗壞。今後探聞有違犯之人。罰全房月俸兩月。欺詐住持及占種田地者。罰全房月米一年。詐過錢物。經官乞行根究。從條施行。田地退還常住爲業。畢日申文正位候回報起支。雖已退業。而故作阻障。不容常住耕種者。亦行前罰。

一、義莊及白雲功德寺差役。并應于非泛科敷。並蒙官司蠲免。近來縣道胥吏。多因乞覓不從。故意搔擾。今後如有似此之人。許從本家經府陳理。嚴行斷理。

一、舊規諸房不得租種義莊田土。詭名者同。近來有恃強公然於租戶名下奪種者。及有壘捺義莊田。渭涇浜車漕種菱。不容租戶車水上下者。爲害甚大。今後探聞有違犯之人。罰全房月米半年。

一、義莊租戶所當優卹使之安業。聞有無賴族人將物貨高價亞賣。顯屬不便。今後輒有違犯。罰全房月米兩月。仍經官陳理。

一、舊規。義莊事務。惟聽掌莊子弟自行處置。雖是尊長。不得侵擾干預。緣違犯者。未曾有罰。是以近來多有族人專爲貨賂。不顧義莊利害。或爲攬戶兜納。苗米必要多增貼耗。或主張不逞之徒。充應腳力及墓客之類。甚至鼓誘外郡族人。挾長前來。擅開倉廩。妄用米斛。恣行侵擾。意在破壞。今後如有違犯。許掌莊指實申文正位。自行體訪知覺。罰全房月米一年。外仍經官乞行根究懲治。內有乞覓過錢物之人。卽合從條施行。

一、舊規。掌莊子弟侵欺徑行申官理斷。勒令陪填。近自移建倉宇。遴選主計。此弊稍革。深慮日久玩習。合行關諸房。今後掌莊子弟。如有違犯。許諸房覺察。申文正位。委請公當子弟。對衆點算。取見實侵數目。以全房月米填還。足日起支。仍控告官府。乞行懲治。以爲掌莊侵欺者之戒。諸房子弟。卽不得專擅興詞。紊煩官府。

一、諸房間有不肖子弟。因犯私罪聽贖者。罰本名月米一年。再犯者除籍。永不支米。姦盜賭博。鬪毆陪涉及欺騙善良之類。若戶門不測者非。除籍之後。長惡不悛。爲宗族鄉黨善良之害者。諸房具申文正位。當斟酌情理。控告官府。乞與移鄉。以爲子弟玷辱門戶者之戒。

一、舊規。諸位輒取異姓。以爲己子。冒請月米者勿給。今乃有將己子與人破蕩他人家業。却欲歸宗請米。如有似此之人。仰掌莊申文正位。不得支行。

一、義宅地基久爲外人占據今來復業甚爲艱難宜體文正公之意專爲聚族之地卽不許族人占造私宅等用如有違罰全房月米一年仍勒還元地

一、舊規諸房子弟得貢大比者義莊支裏足錢十千今物價翔貴難拘此數如有子弟得解赴省義莊支官會一伯千其錢於諸房月米內依時直均尅其免舉人及補入太學者支官會五十千庶使諸房子弟知讀書之美有以激勸

一、歲寒堂除科舉年分諸位子弟暫託肄業餘時不得於內飲宴安泊如違罰全房月米一月。

# 褒賢集

褒賢之碑宋仁宗皇帝篆額觀文殿學士光祿大夫行禮部尙書知河南府兼西京留守事畿內勸農使上柱國臣王舉正題宋推誠保德功臣資政殿學士金紫光祿大夫尙書戶部侍郎護軍汝南郡開國公食邑二千三伯戶食實封六伯戶贈兵部尙書謚文正公范公神道碑銘并序

皇祐四年五月甲子資政殿學士尙書戶部侍郎汝南文正公薨于徐州以其年十有二月葬于河南尹樊里之萬安山下公諱仲淹字希文五代之際世家蘇州事吳越太宗皇帝時吳越獻其地公之皇考從錢俶朝京師後爲武寧軍掌書記以卒公生二歲而孤母夫人貧無依再適長山朱氏旣長知其世家感泣去之南都入學舍掃一室晝夜講誦其起居飲食人所不堪而公自刻益苦居五年大通六經之旨爲文章論說必本於仁義祥符八年舉進士禮部選第一遂中乙科爲廣德軍司理參軍始歸迎其母以養及公旣貴天子贈公曾祖蘇州糧料判官諱夢齡爲太保祖祕書監諱贊時爲太傅考諱鏞爲太師妣謝氏爲吳國夫人公少有大節其於富貴貧賤毀譽歡戚不一動其心而慨然有志於天下常自誦曰士當先天下之憂而憂後天下之樂而樂也其事上遇人一以自信不擇利害爲趨捨其有所爲必盡其力曰爲之自我者當如是其成與否有不在我者雖聖賢不能必吾豈苟哉天聖中晏丞相薦公文學以大理寺丞爲祕閣校理以言忤章獻太后旨通判河中府陳州久之上記其忠召拜右司諫當太后臨朝聽政時以至日大會前殿上將率百官爲壽有司已具公上疏言天子無北面且開後世弱人主以彊母號之

漸其事遂已。又上疏請還政天子不報。及太后崩。言事者希旨多非。太后時事欲寢治之。公獨以謂太后受托先帝。保佑聖躬。始終十年。未見過失。宜掩其小故。以全其大德。初。太后有遺命。立楊太妃代爲太后。公諫曰。太后母號也。自古無代立者。繇是罷其冊命。是歲大旱蝗。奉使安撫東南。使還。會郭皇后廢。率諫官御史伏閣爭。不能得。貶知睦州。又徙蘇州。歲餘。卽拜禮部員外郎。天章閣待制。召還。益論時政闕失。而大臣權倖多忌惡之。居數月。以公知開封府。開封素號難治。公治有聲。事日益簡暇。則益取古今治亂安危。爲上開說。又爲百官圖以獻。曰。任人各以其材。而百職脩堯舜之治。不過此也。因指其遷進遲速次序。曰。如此而可以爲公。可以爲私。亦不可以不察。由是呂丞相怒。至交論上前。公求對辨語切。坐落職。知饒州。徙潤州。又徙越州。而趙元昊反河西。乃以公爲陝西經略安撫副使。遷龍圖閣直學士。是時新拜大將。延州危。公請自守。鄜延捍賊。乃知延州。元昊遣人遺書以求和。公以謂無事請和。難信。且書有僭號。不可以聞。乃自爲書。告以逆順成敗之說。甚辨。坐擅復書。奪一官。知耀州。未逾月。徙知慶州。旣而四路置帥。以公爲環慶路經略安撫招討使。兵馬都部署。累遷諫議大夫。樞密直學士。公爲將務持重。不急近功小利。於延州築素澗城。墾營田。復承平永平廢寨。屬羌歸業者數萬戶。於慶州城大順。以據要害。奪賊地而耕之。又城細腰胡盧。於是明珠滅減等大族皆去。賊爲中國用。自邊利久墮。至兵與將常不相識。公始分延州兵爲六將。訓練齊整。諸路皆用以爲法。公之所在。賊不敢犯。人或疑公見敵應變爲如何。至其城大順也。一旦引兵出。諸將不知所向。軍至柔遠。始號令告其地處。使往築城。至於版築之用。大小畢具。而軍中初不知。賊以騎三萬來爭。公戒諸將。戰而賊走。追勿過河。已而賊果走。追者不渡。而河外果有伏賊。旣失。

計乃引去於是諸將皆服公爲不可及公待將吏必使畏法而愛己所得賜賚皆以上意分賜諸將使自爲謝諸蕃質子縱其出入無一人逃者蕃酋來見召之臥內屏人徹衛與語不疑公居三歲士勇邊實恩信大治乃決策謀取橫山復靈武而元昊數遣使稱臣請和上亦召公歸矣初西人籍爲鄉兵者十數萬既而黥以爲軍惟公所部但刺其手公去兵罷獨得復爲民其於兩路既得熟羌爲用使以守邊因徙屯兵就食內地而紓西人饋輶之勞其所設施去而人德之與守其法不敢變者至今尤在慶曆三年春召爲樞密副使五讓不許乃就道旣至數月以爲參知政事每進見必以太平責之公歎曰上之用我者至矣然事有先後而革弊於久安非朝夕可也旣而上再賜手詔趣使條天下事又闡天章閣召見賜坐授以紙筆使疏於前公惶恐避席始得而條列時所宜先者十數事上之其詔天下興學取士先德行不專文辭革磨勘例遷以別能否減任子之數而除濫官用農桑考課守宰等事方施行而磨勘任子之法僥倖之人皆不便因相與騰口而嫉公者亦幸外有言喜爲之佐佑會邊奏有警公卽請行乃以公爲河東陝西宣撫使至則上書願復守邊卽拜資政殿學士知邠州兼陝西四路安撫使其知政事纔一歲而罷有司悉幸罷公前所施行而復其故言者遂以危事中之賴上察其忠不聽是時夏人已稱臣公因以疾請鄧州守鄧三歲求知杭州又徙青州公益病又求知潁州肩界至徐遂不起享年六十有四方公之病上賜藥存問旣薨輟朝一日以其遺表無所請使就問其家所欲爲贈以兵部尙書所以哀卹之甚厚公子僅給衣食其爲政所至民多立祠畫像其行已臨事自摺紳處士里閭田野之人外至夷狄莫不知其

名字而樂道其事者甚衆。及其世次官爵誌于墓譜于家藏于有司者皆不論著。著其繫天下國家之大者亦公之志也歟。銘曰。

范於吳越世實陪臣。倣納山川。及其士民。范始來此。中間幾息。公奮自躬。與時偕。逢事有罪功。言有違從。豈公必能。天子用公。其難其勞。一其初終。夏童跳邊。乘吏怠安。帝命公往。問彼驕頑。有不聽順。鉏其穴根。公居三年。怯勇墮完。見憐獸擾。卒俾來臣。夏人在廷。其事方議。帝趣公來。以就予治。公拜稽首。茲惟難哉。初匪其難。其在終之。羣言營營。卒壞于成。匪惡其成。惟公是傾。不傾不危。天子之明。存有顯榮。歿有贈謚。藏其子孫。寵及後世。惟百有位。可勸無怠。翰林學士。尚書吏部郎中知制誥。充史館修撰。歐陽修文。翰林學士兼侍講。尚書吏部郎中知制誥。充史館修撰。王洙書。

墓誌銘

富弼撰

皇祐四年夏五月二十日甲子資政殿學士戶部侍郎范仲淹以疾薨于徐。吏走驛馬以公喪聞。天子感慨不一御。垂拱殿朝。特贈兵部尚書。太常考行。諡文正。錄孤贖物。悉用加等。中外士大夫駭然相吊以泣。至於巖壑處逸。無不痛惜之。其孤護帷幘還洛。卜以是年十二月一日壬申。葬于河南縣萬安山尹樊里。先隴之側。孤馳使來求銘。將納于囊。曰。公之先。始居河內。後徙長安。唐垂拱中。履冰相則天。以文章稱。實公之遠祖也。四代祖隋。唐末爲幽州良鄉縣主簿。遭亂奔二淵。家於蘇之吳縣。自爾遂爲吳人。時中原多故。王澤不能逮遠。於是世食錢氏之祿。蘇州糧料判官。夢齡以才德雄江右。卽公之曾王父也。判官生贊。時幼聰警。嘗舉神童。任祕書監。集春秋泊歷朝史。爲資談錄六十卷。行於時。祕監生塘。博學善屬文。累佐

諸王幙府端拱初隨錢俶納國終武寧軍節度掌書記公卽掌記之第三子也朝廷以公費用太保太傅太師追贈三代又擇徐許越吳四大國追封王妣陳氏妣陳氏謝氏爲太夫人公諱仲淹字希文不幸二歲而孤吳國太夫人以北歸之初亡親戚故舊貧而無依再適長山朱氏公旣長未欲與朱氏子異姓懼傷吳國之心姑姓朱後從事於亳吳國始命奏而復焉公少舉進士祥符八年中第調廣德軍司理椽權集慶軍節度推官制置使舉監泰州西溪鹽廩以勞進大理丞又舉知興化縣建州關隸以吳國老疾辭監楚州糧料院丁憂去官服除晏丞相以文學薦公于朝試可署祕閣校理時章獻皇太后臨政己巳歲冬至上欲率百僚爲壽詔下草儀注搢紳失色相視雖切切口語而畏憚無一敢論者上又專欲躬孝德以勵天下而未遑餘恤公獨抗疏曰人主北面是首顧居下矧爲后族強倨之階不可以爲法或宮中用是爲家人禮權而卒於正斯亦庶乎其可也疏奏遂罷上壽儀然后頗不憚尋出爲河中府通判轉殿中丞謀壅吳國再請通判陳州遷太常博士聞京師多不關有司而署官賞者訪焉出於中旨迺附驛奏疏甚懇至願以上官賀婁事爲戒明年章獻后棄長樂擢爲右司諫屬朝廷用章后遺令策太妃楊氏爲皇太后與政制出都下諮詢公上疏極諫古者立太后所以尊親也不容冀幸於其間武武相躡一二而數教之大者累月還朝適議廢郭后上書曰后者君稱以天子之配至尊故稱后后所以長養陰教而母萬國也故繫如此之重未宜以過失輕廢立且人孰無過陛下當面諭后失放之別館揀妃嬪之老而仁者

朝夕勸導俟其悔而復其宮則上有常尊而下無輕議矣書奏不納明日又率其屬及羣御史伏閣門論列如前日語上遣中貴人揮之令詣中書省宰相窘取漢唐廢后事爲解時呂夷簡爲相公曰陛下天資如堯舜公宜因而輔成之柰何欲以前世弊法累盛德耶中丞孔道輔名骨鲠亦扶公議論甚切直又明日晨率道輔將留百辟班揖宰相廷辨抵漏舍會降知睦州臺吏促上道在郡歲餘知蘇州朝廷知清議屬公就拜禮部員外郎天章閣待制召還有入內都知閣文應者專恣不恪事多矯旨以付外執政知而不敢違公聞知而不食將入辨謂若不勝必不與之俱生卽以家事屬長子明日盡條其罪惡聞於上上始知遽命竄文應嶺南尋死于道公自還闕論事益急宰相陰使人諷公待制主侍從非口舌任也公曰論思者正侍臣之事予敢不勉宰相知不可誘乃命知開封府欲撓以劇煩而不暇他議亦幸其有失卽罷去公處之彌月威斷如神吏縮手不敢侮其奸京邑肅然稱治于時官方無紀每對未嘗不爲上力陳治亂之道皆由用人得失此實宰相之職也天子日擁萬幾非所宜專然不可以不察因取職局官品以類選次至於超遷序進附見其下爲圖以獻庶上易覽宰相益不悅嗾其黨短公於上前公亦連詆宰相坐是去閣職貶知饒州是日上封贈書論公以忠義獲譖極道所不可者皆當世英豪宰相指爲朋黨相學士吏部員外郎以寵之至部首按鄜延時延安始困兵火障成掃地城外卽寇壤歸然孤壘人心危恐廢食待竄凡朝廷遣守皆以事避免旣遷延不時往公遂留不行騎奏願兼領延州事以待寇之復來上

嘉而從之屬忘戰日久兵無紀律猝有外警蕩然不支公於是大閱州兵得萬八千析爲六將分命裨佐訓飭不數月舉爲精銳士氣大振莫不思戰而寇知我有備卽引去朝廷推其畫諸路皆以爲法成青澗城復散亡屬羌萬餘帳開營田數千頃以收軍實人視邊塞其完固如山立不可動謂宜討賊不可坐守老吾師朝廷下其議將從之公執猶以爲未無幾涇原師出敗于好水川天子由是益信公智謀過人遠甚前此賊以書署僭號遣公請和公不忍俾朝廷報賊乃自占答黜其僭署爲陳逆順禍福立遣使者還未出境聞好水川敗始悟賊書謫而非誠益自信立報爲是執政以公擅報罪當誅上知公其責止命削一官降知耀州幾月拜戶部郎中起知慶州尋遷左司郎中本路經略安撫招討使兼兵馬部署有馬砦者素爲賊衝然地與境相衝久不能城公至自領牙兵出不意駐柔遠砦別遣蕃將取其地得之先命長子入據以率衆公亦親往勞士有頃賊三萬騎叩城下公麾兵血戰則遽北戒諸將勿追已而果有伏兵夜遁城旣立詔名大順徐又城細腰復胡蘆等寨招明珠滅臧二強族各萬餘人及並環千餘帳內附自此環慶屬羌悉爲吾用先是卒驕難使主將咸務姑息公築延慶諸城堡募民不足乃雜使禁旅蓋素服公威惠勞苦雖且死不怨久之涇原師再喪定川關輔復震而虞變生公知親率垓下兵連夜赴援且將邀賊歸路擊之會已出塞遂班師因移其兵耀于關輔人心由是大定初定川事聞上頗駭謂侍臣曰得范仲淹出援吾無憂矣數日公奏至上大喜懷其章示執政曰吾知范仲淹可用加樞密直學士右諫議大夫時朝廷以戍卒屢衄議黥鄉人懼甚竄匿不願黥公改命但刺其手非校戰請農于家後罷兵獨環慶路鄉軍得復爲民民德公至于今不忘朝廷尋盡以西路委公置府於涇州授陝西四路經略安撫

招討使方謀取橫山故地漸復靈夏然後可以誅賊賊知亡無日懼不克當因遣使講和明年春召公爲樞密副使凡五讓不從乃拜之輿議謂公有經綸之才不宜局於兵府是秋改參知政事上倚公右於諸臣公亦務盡所蘊以圖報然天下久安則政必有弊者三王所不能免公將刪以歲月而人不知爲悠久之道也上方銳於求治間數命公條當世急務求公始末奉詔每辭以事大不可忽致於是露熏降手詔再遣內臣就政事堂督取開龍圖閣給紙扎令立疏者各一日面詰者不可數退曰吾君求治如此之切其暇歲月待耶卽以十策上之蓋取士課吏減任子更衛兵擇守宰謹勑令厚農桑之類者又先時別上法度之說甚多皆所以抑邪佞振紀綱扶道經世一一可行上覽奏襄納益信公忠耿不爲身謀卹也遽下二府促行論者漸齟齬不合作謗害事公知之如不聞持之益堅明年秋邊奏疑若有警者公慮帥臣恃和而懈因懇請按邊卽命河東陝西宣撫使麟州向者亦被寇掠邈然在賊腹中本道帥病無供給奏欲棄之曰麟棄疆場日蹙不可請復廢障使民耕于鄙於是得不棄又代郡西四州軍附邊有廢地尤廣著令禁不得耕郡縣以敵嫌不敢正視前歐陽修來使盡籍其利害請弛禁許人耕以輸可代轉輓之勞以帥議不協罷公至於其利大且亡所嫌者屢奏如脩議便後止耕岢嵐一境而塞粟已充矣公旣度陝以西羌好難保而邊計尙缺疏手奏願解政事復領四路以總護諸將卽除授資政殿學士知邠州兼陝西四路安撫使以疾請鄧州遷給事中三年又請淵郡因得厝先人之墓移杭州加禮部侍郎祀明堂復遷戶部又移青州兼東路安撫使幾歲病疾又請潁肩輿至彭門遂不起年六十四公爲學好明經術每道聖賢事業輒跂聳勉慕皆欲行之於己自始仕慨然有康濟之志凡所設施必本於仁義而將之以剛

決未嘗爲人屈撓。歷補外職。以嚴明馭吏。使不得欺。於是民皆受其賜。立朝益務逕雅。事有不安者。極意論辯。不畏權倖。不慙憂患。故屢亦見用。然每用必黜之。黜則忻而去。人未始見其有悔色。或唁之。公曰。我道則然。苟尙未遂。棄假百用。百黜亦不悔。噫。如公乃韓愈所謂信道篤而自知明者也。在陝西尤爲宣力。以儒者奉武事。又邊備久廢。忽而王師新敗。剝喪破漏。而莽乎無所取濟。公周施安集。坐可守禦。蓄銳觀釁。適圖進討。會羌人復修貢。朝廷始議息兵。乃從其請。於是不能成殄滅之功。然其閱武練將。可以震敵。城要屬雜羌。可以扼寇。此後世能者。未易其過也。至於墾田阜財。立法著信。愛民全國。體赫赫在人耳目。皆可爲破賊之地者。又可道哉。其歷二府。纔歲餘而罷。若夫天下至重。久安之弊。至深而欲以一二歲臨之。而望治。雖愚者知其不可得。况所奏議阻而不行者。十八九行者。又卽改廢不用。茲所以重主憂。而生民未得安也。宣撫之初。讒者乘間鋒起。蓋以奇中造端飛語。無所不及。甚者必欲擠之以死。而後已賴上寬度明照。知公無他。始終保全。獲歿牖下。嗚呼。道之難行也。而至是乎。愴人苟欲伸己志。而不志乎邦家。此先民所以甘藜藿而蹈江海也。公天性喜施。與人有急。必濟之。不計家用有無。旣顯門中。如賤貧時。家人不識富貴之樂。每撫邊賜金銀甚多。而悉以遺將佐。在杭盡以餘俸買田於蘇州。號義莊。以聚疎屬。而斂無新衣。友人醵資以奉葬。諸孤無所處。官爲假屋韓城以居之。遺表不干私澤。此益見其始卒志於道。不爲祿仕出也。作文章。猶以傳道名世。不爲空文。有文集二十卷。奏議十七卷。兩府論事三卷。娶李氏。故參知政事昌齡之姪。封金華縣君。卒於鄱陽。今舉而附焉。四子。純佑。守將。作監。主簿。少有氣節。以疾廢于家。純仁。進士第。光祿寺丞。純禮。太常寺太祝。皆溫厚而文。識者曰。范氏有子矣。三女。長適殿中丞蔡交。

次適封丘主簿賈蕃諸孫三長正臣守將作監主簿一男純粹一女二孫幼銘曰公之世系源于陶唐晉會食范厥姓始彰睢壅蠡增滂寧雲質茲惟聞人間代而出或霸或季所有何述粵自得姓千五百年獨公挺生爲天下賢涉聖之餘揭厲泗沿道尊德雄事公日繁人獲一善已謂其難公實百之如無有然遭時得君位亦顯焉耀此讖志莫究宣元元辛艱噫嘻乎天

文正公傳

張唐英

范某字希文蘇州人武寧軍掌書記贈太師墉之子幼孤母適朱氏祥符八年登進士第曰朱說者是也累遷大理寺丞上相府書極陳天下之利害當時皆以王佐許之宰相晏殊薦其文召試祕閣校理上欲以冬至率百僚上太后壽抗疏言不可遂罷出通判河中府遷陳州屢上疏言內降之弊引韋后爲戒章獻厭世擢爲右司諫言楊妃不當稱太后郭后不當廢降知睦州遷蘇州召爲禮部員外郎天章閣待制論事益切執政忌之命知開封府欲處以煩劇而不暇他議某明敏通照決事如神京師謠曰朝廷無憂有范君京師無事有希文每上殿奏事多陳治亂以開悟人主歷詆人臣不法言者以某雖間君臣落職知饒州事司諫高若訥言貶黜太輕歐陽脩上書責之亦得罪余靖尹洙皆坐朋黨被紓蔡襄作四賢一不肖詩以詳其事不肖指若訥也寶元初元昊叛上知其才兼文武復職知永興軍道授陝西都轉運遷龍圖閣直學士時延安新被圍朝廷擇帥皆畏不行某奏請兼領延安軍以待寇至上嘉而從之閱兵得萬八千遷六將俾領之日夕訓練號爲精兵焉賊聞之第戒曰無以延州爲意今小范老子腹中自有數萬兵甲不比大范老子可欺戎人呼知州爲老子大范謂范雍也城青澗開營田招屬羌及請戒諸路養

兵畜銳不宜輕動賊許以書請和某以元昊國之叛賊不可俾朝廷報賊乃自作書與陳逆順賊尋陷水某益信報賊書爲是而執政以其擅報當誅上以爲閫外之事專之不足罪止移知耀州尋起知慶州兼經略招討未幾賊兵三萬叩城某屢兵血戰賊兵奔北遂戒諸將無追奔既而果有伏兵又奪賊馬砦爲大順城及築細腰復葫蘆等砦招明珠滅賊二強族萬餘人及命環州种世衡招千餘帳自是屬羌皆爲用久之王師再喪於定川某晝夜領兵赴援初關輔人心動搖及見某耀兵號令嚴明威震戎落人心遂安第相賀曰邊上自有龍圖公爲長城吾屬何憂初上聞定川之敗頗以關中爲憂曰若得某出援可無慮及聞某出師甚喜時議黔鄉軍某惟令刺其手及兵罷環慶路皆復得爲農上尋以四路都招討委之開府於涇某與韓琦叶謀必欲收復靈夏橫山之地元昊大懼稱臣明年春召爲樞密副使以鄭戩代之秋拜參知政事乃上取士課吏減子更衛兵擇守宰謹赦令厚農桑之策塞僥倖之塗開公正之路天下側耳以聽太平凡所措置十未行一而權勢者大惡之明年契丹與元昊爭銀甕旋而麟府奏警某自請出爲河東陝西宣撫二虜聞之皆不敢動懇以邊事爲請以資政殿學士復總四路之師開府邠州以疾請鄧州移杭州青州遷戶部侍郎又請汝陰至徐州而薨年六十四奏至上嗟悼泣下曰朕方將大用不謂其早死贈兵部尙書謚文正子純佑有才識以疾廢于家次純仁登進士第有父風今爲都官員外郎



# 褒賢祠記卷之一

淄州長山縣建范文正公祠堂記

古之治天下所謂不賞而民勸者非謂絕而不賞之也賞一善而百善進也何哉自京師至於郡縣郡縣至於鄉黨其間有德行節義可稱者取而旌之爵於朝廷死表其門閭如此風俗莫不勉勵也漢唐之間雖不及於三代而以號爲治者此道素行也且今之天下何異乎古之天下然而風俗未厚於古者得非此道之廢歟故文正公范希文之子於陵也豈特德行節義而已矣夫公家世姑蘇幼而孤弱無父所怙而後隨其母氏來居茲土留而不出遂爲邑人及其長也卓有所立鄉人奇之嘗廬於長白日自諷誦雖刻苦不暇每患其寡友一日超然遐舉四走方外求老師巨儒以成就其業不數歲間大通六籍聲名傾動當世祥符中會明天子詔天下舉賢者能者公素擅鄉閭之譽爲卿大夫之所賓興一上而中殊科尋補職任驟歷臺諫不功碩惠加乎生鯁鯁議讜言許於當國天下之人無賢不肖不謀而同辭曰范公如登輔相太平可期及乎領邊郡握兵權談笑樽俎之間折衝方面之難威聲遠布坐鎮獷俗以致疆場塵清投烽釋警虜不敢犯邊盜不敢入寇天子倚之如金湯視之如腹心何患乎西戎何憂乎北狄時以海內既安邦國無事乃擢貳樞府參預機務天下之人驩然相語曰范公用矣但翹首跂足以俟太平爾公自是負上重責以謂其功不可亟成也必待馴致故其所爲志在遠大移風易俗釐革頽弊下輯臣儀上裨衰職欲行之以人而冀效於後也大易稱漸以正邦公實用之矣惜乎其不能終之而薨設使而終之

則周召伊傅曷以加此。嗚呼天之生公將以輔世功未及宣何速寡之詩云彼蒼者天殲我良人此之謂也。公沒之後邑里無傳焉噫古之人有德行節義取而旌之猶能以厲其風俗况有功於天下者乎治平中澤出宰是邑訪公之跡得公之實因謂邑中諸君子曰范公爵位如此其達功烈如此其顯豈非茲邑之勝事耶何久而不爲之祠諸君從容而語曰今日之議允符夙昔之願蓋邑素有是心而患在位者未嘗注意旣聞澤言翕然樂從爰飭梓人構堂宇命繪工圖儀形一之日二之日經始三之日四之日告成財斂餘羨用不漁民旣而修虔誠謁偉像洋洋乎如在使夫十室之民朝夕耳傾而目屬自非嵬瑣之類得無聲激薄者敦懦者立如是何患風俗不及古也故曰不賞而民勸謂此矣愚之所以建公祠者非止爲乎公也爲民也非止爲乎民也爲天下也澤竊邑茲久慙無異政聊述其美以傳之後公之能事大參歐陽公襄賢之碑詳矣此不覩縷舉其梗概而已治平二年三月四日記尚書虞部員外郎知縣事上騎都尉賜緋魚袋韓澤述將仕郎守縣尉兼主簿事劉鼎三班奉職監酒稅徐士安宣奉郎守殿中丞知縣事兼兵馬都監郭概同立石鄉貢進士王特篆額郊社齋郎韓郭仁書丹刊者董選

范公泉記

洪範五行一曰水混混然利物源泉爲本養老愈病醴泉爲上昔宋皇祐中范文正公嘗帥青社有德於人而州之乾方洋溪醴泉出焉後人目之曰范公泉其與戴公山嚴公瀨邵伯塘鄭公渠埒美儼踪矣以經兵革遂致湮絕鞠爲園蔬踰五十載耆老過之靡不興嘆迺者連帥完顏公思欲發前賢之跡慰青人之意乃按圖誌詢故老得其故處畚鍤清泉復出方池流溝作亭蘆木巨壑層城映帶左右屈曲靖深蕭

然如屏蒼巖翠阜間。又且築臺開軒。西崖缺處。招引西山。秀色可攬。朝烟夕霧。四時有之。物外勝絕。紛綸全集。邦人萃止。神明還觀。滋液甘寒。宜藥宜茶。嗚呼。物有否而泰。物有塞而通。醴泉之瑞。感而應地。不愛寶。是造物之無盡藏也。范公以善政致之于前。今公復以善政致之于後。前後相望。如蹈一軌。可謂異世同流者矣。他日芝封趣公歸朝。後人思之。亦如思范公也。古者思其人。愛其樹。僕於斯泉云。□城王□譜。南麓任詢書營丘王樞篆。大定辛丑十一月朔輔國上將軍山東統軍使。

范文正公書堂記

傍鄆邑山也。費山處其東。長白峙其南。聖王諸山。連峯委會於其西。聖王之南。有山曰會仙。其峯壁立特起。蒼翠可愛。其中有堂。故基曰書堂。世傳以爲文正范公之別墅也。公復有上書堂。在會仙之南。費堂山之上。費堂之得名者。亦以公嘗讀書於其上故也。因爲之嘆曰。自開闢以來。不知其幾千萬年矣。而山之名。由公而得。自公而歿。又幾三百年矣。聞公之名。其猶如生。其果何似而然哉。嘗試推公之出處矣。憶昔公之始來居是山也。非爲棲身遁迹之舉。必也讀天下書。窮天下事。以爲天下之用耳。其出也。非爲肥身榮家之計。必也幼而學壯而行。以伸平日之蘊耳。惟公有是心也。故能一旦立於朝廷之上。忠犯天顏。恩流海內。歸然爲一代宗臣。及其歿也。復使斯人聞風而作興慕義而感動者。然歟。此公之德所以盛也。仲元忝爲邑人。來游堂下。慨然有感於中。乃爲之歌曰。鄒邑之陽兮。聳列羣山。會仙特起兮。秀色可餐。有峯兮峨峨。有水兮潺潺。松風兮蕭颯。白雲兮往還。公之游兮水曲。公之居兮山顛。公之誦兮林下。公之歌兮雲間。瞬千古兮易往。仰高風兮莫攀。德巍巍兮山之高。心休休兮雲之間。凜兮孤松之操。淵兮巨浸之瀾。

誰復繼此遐踪兮躋斯民於壽域之安金國翰林學士劉仲元記

池州范文正公祠堂記

文正范公以勁節大志盛德壯烈卓然爲宋名臣凡宦游人懷其惠莫不有祠池陽雖非公所仕之地而亦祠之學宮蓋以其少長於長山朱氏也國史本傳及歐陽公撰神道碑俱云公生二歲而孤母貧無依改適長山朱氏然人漫不知長山爲何地朱氏爲何人而公之寓於其家幾何時也天台丁君木宰池之青陽政成暇日討究先賢遺事慨然慕之長山去縣僅十五里朱之族故在遂訪求其家得公之續譜遺墨及公與母謝夫人之畫像又從好古博雅之士根據其本末源流旣畢委故人程君爚過黼而言曰將爲祠堂願有述焉黼謝不敢其請益堅有不得辭凡公之立言立功具載方冊不必贅敍獨以其在長山之事言之謹稽諸記錄公之父墉從吳越錢氏入朝歷成德成信武寧軍掌書記以卒元妃陳氏繼室以謝氏其卒于徐也歸葬於吳中之天平山陳氏祔焉謝氏無以爲生改適朱君文翰公生于端拱二年猶在襁褓而鞠於母朱氏云族有在應天府者故公以及冠辭母絕江逾淮學於應天蓋景德之末祥符之初也閱五六歲登進士第則在祥符之八年欲便親養授廣德軍司理參軍迎母以往攝集慶軍節度推官辟泰州西谿鹽稅再辟興化縣令徙楚州糧料院母終于楚天聖五年公復如應天府晏元獻公知之表掌府學服除乃歸宗易名越明年晏公再薦召試爲祕閣校理始克請于朝追贈父母遷奉母喪葬于河南尹樊里萬安山下參考歲月公之從朱姓幾四十年登科記用今氏名後人改之耳朱氏之譜則文翰以景德初嘗任淄州長史後以公贈典得太常博士公之手帖與博士之孫延之在明道二年乃改郡

至丹陽時猶稱延之爲秀才而待以子姪禮又一帖在慶曆五年者則稱之爲官人蓋已受公奏補而帖中頗及延之兄之子求異姓恩澤事由此觀之公留止往來長山歷時最久其親愛顧念朱氏情義最篤皆以母故也公之宦游遠者三四歲近者一二歲猶皆立祠長山獨無祠可乎此丁令君所以拳拳不能已也倣禮諭經法施於民以死勤事以勞定國能禦大災能捍大患皆所宜祀公於數者殆無愧焉其神氣精爽如五行麗天芒寒色正不可晦蝕中國夷狄所共瞻仰豈特其平生經歷之處宜奉祠事而猶區區於是邑之長山者蓋祀國之大節邦政之所成可以興起人心可以扶持教化此不特爲公設也祠堂擇地之爽垲且與朱氏附近爲屋十楹有室以奉遺像有堂以嚴祭享有東西廂以居守祠者憩侍祠者固以門扁繚以周垣夾道以松杉而直達于通衢規模邃潔不侈不陋費從官給役不民勞委學職王震董其成朱氏近族守其祀是亦可矣令君又云去長山數里有滕子京待制墓公與滕爲同年進士生嘗薦諸朝死嘗銘其竊欲以配祀黼嘗聞公之守嚴修子陵祠而以唐隱士方干配况滕既奇才而公與之同時共事情好款密以配公祠爲宜遂并書以贊其決且諗來者勿廢云紹定二年九月二十有二日朝請大夫丁黼記

增修范文正公祠記

太中大夫參議中書省事張養浩題額

奉訓大夫僉燕南河北道廉訪司事劉從禮書

古今仕其貴同何古人聲震天下事業巍巍而後世不能也吁能者未必得爲得爲者未必能者也雖然

長白張臨撰

能者不難其人得爲者每難其時文正公先生范公事業巍巍者屢進屢黜卒之攢斥難其時如此使先生終爲之事業巍巍爲何如嗚呼俗因五季之後廉恥道喪士昧出處賢不肖漫漶先生以剛大毅決之資拔出衆人之中進退迢邁委靡之世爲變尊王黜霸明義去利凜然有洙泗之風其後真儒輩出聖學復明如發洙泗之堙先生實指其處其可不謂之有功於聖門乎事業巍巍者不足爲先生道長山視先生情比桑梓宋治平二年邑人韓澤知縣事首率邑中祠祀先生石刻無恙金亡祠燬至元己卯邑士故江南河北道廉訪簽事韓居仁兄居貞唱邑中新之淫祠猖熾祈氓悉往先生祀爲之寂然今膠州同知歷下莫侯文淵尹縣始舉祀典居貞洎今富寧庫同提舉王居敬偕邑中十餘鉅姓助牲醴費距今三十餘年不輟朱氏賴先生庇猶奉酒掃居其傍縣爲之蠲泛賦延祐六年寧夏子俊順昌監縣濟陽楊侯僖爲尹滕陽左侯備勾稽俱慕先生者也深以祠廢不治縣甚恥一日同謁祠下覩釤剥俱曰盍葺之各捐俸金若干邑士皆以楮錢助忽楊侯遷西臺御史去子俊亦瓜代次年秋左侯偕繼政燕山蒙古忽台汴梁梁侯至始鳩匠腐者易之缺者補之危者崇之象服非者更之增內門三楹廚二楹東西隙木悉植柏左侯詣余曰先生記之惟先天下之憂而憂後天下之樂而樂孟子所謂樂以天下憂以天下先生志也士大夫居相君之位視天下赤子之樂不以人理待吮剝之困苦之乃曰吾能爲君實倉廩充府庫聞先生之志如何故讀岳陽樓記至此未嘗不三復莊誦久爲之感慨承左侯之命余雖老不覺壯心如昔是以不讓樂爲之書云至治元年八月己巳日記

天聖間文正范公爲是邦作灌纓亭於南谿之上賦詩曰笑解塵纓處滄浪無限清公之意豈特挹滄浪之清以滌我塵垢而已邪君子目擊而道存矣中更兵燹蕩爲莽區後有重建於稅務之南者尋亦圯廢耆老云鄉校前迺故址也余旣登適學之路卽故址爲亭而扁之以舊名亭並谿當邑東西之中眼界軒豁荷汀蘋渚鷗鷺翔集風帆露檝朝夕往來景物互變而俱宜草色際天綠波瀰漫則於春宜冰輪浮空商灑沆砀則於秋宜宜酷暑南薰徐來夏無南閨涼徹肌骨宜隆寒黃蘆旅鴈粧點雪意如展畫圖凡是諸景昔也散漫而不屬今皆萃列於斯亭之上足以廣吾胸中之雲夢而助筆下之波瀾夫名所以詔是實也斯名也其義則夫子取之孟子屈子發明之而文正范公昭揭之青青子衿藏修之暇於是而遊息焉對景而自得因名而心會吾知是邦人物自今未易量矣紹興癸丑良月承直郎知高郵軍興化事苕谿吳莘記并書冬至日修職郎主簿眉山孫之奇立石

### 高郵軍興化縣滄浪清風記

文正范公先生吾道之元氣也蓋夫子之道不行於春秋戰國而爲萬世師公之道際運文明措之華夏而爲萬世法興化最幸涵濡於相業問津之始嘉定十七年塲既建學以祠明年築城立四門門祠縣望南白馬將軍北金吾將軍東得勝龍母西昭陽君陰陽家之說龍角宜亢卽城爲樓樓獨軒偉公端冕學宮從夫子以詔多士矣想其晝日垂簾琴之清堯舜之曲也野渡橫舟纓之潔莘渭之志也清風徐來吟情夷猶滄浪之歌童舞冠詠瞻之仰之斯道如存其敢生一忽心乎敬像公燕游書清風鳴琴馴鷗三詩于壁而以滄浪清風名之塲之城化雜費取於酒蠹役先於湖當尺三杙而杵千堵萬甃而匠百其能築

斯城而祠公與羣望於門也亦公與神陰賜也不敢忘永矢堅珉後之權酷於斯譏征於斯栖旅於斯攜妓於斯不畏神寧不畏公神之不予以禍止一時公之不予以愧垂千古滄浪不足以洗其愆清風不足以掃其鄙可不戒哉鑰于學以嚴啓閉徑于學以杜游襲邑士民與來者尙恪守之於是賦迎享送神之章誓以斯文而刻焉詞曰學以用世何幽明星斗千載炯所臨我文正公世典刑滄浪之水天與清水哉水哉灌吾纓衰衣赤舄同此心堯舜之曲宓子琴絃歌更入清風吟冠童風雲詠至今民懷吏聳神顧歆後二百年築斯城城高水闊峙孔庭佑公舍奠春秋丁公相我民金湯成四墉之望中耆英穹樓龍角甘棠陰芒寒色正欄更橫羣祠翼從森效靈鷗翔南溪悅逢迎月明滄州冉雲乘秋菊寒泉醉德馨儼如侍公敢不欽歌闔旅揚酣與征環而歿之咨爾神二三子兮同鑰局嚴以公道折未萌公亦福汝邑里寧峨冠曳履龍嶧嶧三山陳垓撰

高郵軍興化縣重建縣學記

詔天下州縣皆立學仁宗朝參知政事范公仲淹請也然國初文治已盛如周黨遂有賢守令學校必興按泰州圖經魯易占建如臯縣學錢魯望記之實祥符八年時公爲西溪鹽廩繼令興化如臯均泰邑也要終而原其始卽彼而得於此正使學不待公而創非公所作成者耶垓後公二百載當嘉定十六年九月辛丑朏以祇事告夫子一殿歸然與重門峙立於水天莽蒼中諸生謂垓令鄭簿章以公灌纓滄浪二亭故址爲學學未備者十七八先生尙嗣成之垓謝不敏意此學之興必仁宗皇帝初政公試民事之日也文明之運輔宰所臨學重於天下而士得師矣垓雖愚敢不力請無煩民無擾士以令始至供堂

緝五百佐是役。新第吳君應西辱主學。袁門殿餘緝千。縣累酷羨數月緝二萬有奇。合三者鳩材庀工。七年春爲崇化堂五間。軒三。挾二右官位。左學職。東西廊二十二。前列從祀。若土祠。若祭器。若書籍。若錢穀。皆有所後分四齋。曰博文。曰敏行。曰貫忠。曰篤信。齋有爐亭。殿加兩挾。周以陛楯。植屏中門。列戟十二。東祠范公屋三。鑿方池亭其對。復濯纓名益東伉。便門祠亦廡二。總公廚。福溷創屋五十合。門殿共六十區。堂之崇二十尺。袤一百三十尺。翬棟沈沈。他率稱是。門納湖光。城築環之。閣道連複。清淑扶輿之氣萃焉。明年夏五月以成。增田架餼。月割酒量錢十四。補弟子員。食日三十歲元正長至。縣載酒三行。闔蓋艾與縣官序拜崇化堂。定爲比。於是吳君率諸生請記之。石塈嘗謂講學師友之職也。興學守令之職也。幸不乏事。何記然。塈嘗爲學官。永嘉昔語人者。不敢不以告夫子曰。十室之邑必有忠信如丘者。不如丘之好學也。孟子曰。學則三代共之。皆所以明人倫也。學非外求也。教非外立也。忠信夫人之天姿。人倫夫人之天性。諸君以爲外乎。內乎。上以學明之下以學成之。而天之所以予我。我之所以日用常行者。豈能越於忠信。忠信又豈能越於君臣父子兄弟夫婦朋友之間哉。我國家學以明人倫。旣同符於三代。文正公忠信而好學。又一本於夫子。塈謂諸君得師者此也。公刻苦而學成。以忠信大節受知仁宗。自西溪議海堰。請邑興化以成之。與京口之麥舟。吳郡之義莊。信也。爭郭后。抗呂相。主西事。而夏人款塞。登政路。而身任太平忠也。諸君拜公於鄉校。得公於詠游。不以公自期得乎。塈濫宰於斯。勉焉不盡。築城浚河。振貸扞禦。修堤岸立義阡。必賴諸君講行之。詎無意哉。詩曰。高山仰止。景行行止。必以范公之學爲學。斯無負國家。教養天下之至恩。允蹈孔孟垂世立訓之格言云。寶慶元年七月甲子承議郎知高郵軍興化縣主管。

勸農營田公事賜緋魚袋三山陳垓謹記。

高郵軍興化縣重建范文正公祠堂記

盛德必百世祀。文正范公天聖間嘗宰興化。遺德在民。永久弗忘。寶慶乙酉。邑令三山漫翁陳君垓。始創祠堂。附于學之左。歲久弊漏。凜兮欲壓。淮東總管高沙陸君元齡。攝令年餘。慨然捐錢市木。甓撤而新之。以舊祠在大成殿東。兩廟並峙。未當於禮。乃徙堂基與齋堂並。郡太守姜公聞而嘉之。亦遣木材相其成。凡爲屋三楹。前序稱是。規模視昔頗高敞。立棟於良月旦日之乙未。工三旬而畢。堊飾俱備。邑庠士友舉酒慶成。大發時以簿職領學事。諗于衆曰。昔文正公爲士時。已有澤民之志。每謂士當先天下之憂而憂。後天下之樂而樂。初仕西溪鎮官。卽請于朝。築捍海堰。爲承楚泰三州民田無窮之利。作小官時。志慮力量已如此。異時勳名滿宇宙。皆自此發之。觀大節必於細事。觀立朝必於平日。前輩謂士自一命以上。苟存心於澤物。皆可有濟。吾儕學古入官。當志文正公之志。彼囊帛匱金。笑與秩終身寵而載高位。家肥而食厚祿。止自爲溫飽計。念不及吾民者。蓋少愧哉。維陸君慙爲攝承。又當邊事孔棘之時。象弭魚服。靡不日戒。而能景慕先賢。載立祠宇。爲前治邑者之所不暇爲。是可尚矣。今特取文正公滄浪三詠。濯纓亭兩詩。刊諸石。兼以漫翁祀公詩。列寢堂之東西。以補闕典。用成陸君之美。使後之登斯堂者。景先哲之高風。以勵壯志。激滄浪之清波。以滌塵襟。鼓金玉之遺音。以發幽趣。廉貪立懦。則五詩昭揭。庶亦少補於世教云。時景定庚申長至日。九華葉大發記。

# 褒賢祠記卷之二

## 文正公祠堂記

孟子之言氣曰至大至剛以直養而無害則塞乎天地之間夫直之爲言大公至正之道也以大公至正之道固守而力行之不爲富貴貧賤威武之所搖奪雖乘田委吏之卑亦必盡吾誠充吾職卒而至於立國家定社稷安邊境服羌戎其功烈與日月爭光而精神折衝萬里之外謂之氣塞乎天地之間可也後世見古人功名之盛以爲類出於偶然不知蚤正素定於胷中者未嘗無所從來而其銘鼎彝書竹帛者非一日之積也文正范公未第時已慨然有天下之志不以死生禍福動其心逮遭明天子有爲於時其立朝如史魚汲直其憂國如賈誼劉向其守邊如馬伏波羊叔子雖庸人孺子莫不知之獨筮仕之初有卓然大過人者國史失其傳故不得而不紀也公以進士釋褐爲廣德軍司理參軍日抱具獄與太守爭是非守數以盛怒臨公公未嘗少撓歸必記其往復辯論之語于屏上比去至字無所容貧止一馬鬻馬徒步而歸非明於所養者能如是乎獄官有亭以公名之者舊矣公卒二十年而高郵孫覺莘老爲廣德軍始以詩志公之事而刻之亭中又六十九年丹陽洪興祖慶善來守讀莘老之詩而慕之初廣德人未知學公得名士三人爲之師於是郡人之擢進士第者相繼于時慶善乃求公遺像繪而置之學宮使學者世祀之而屬予記其事嗚呼公之盛德豈待文而後傳而藻亦豈記公者哉昔段秀實盡忠於唐世徒以爲一時奮取功名之人而不知居官必有可書之事柳宗元爲撫其實上之史官今所以知段太尉逸

事者宗元發之也秀實固不足以擬公而余幸從慶善得公之詳與夫徵夏無且畫工爲無所愧安知後世不采此以補史官之闕乎然慶善爲政而首及公可謂知所本矣柔亦不茹剛亦不吐文正公有焉好賢如縉衣慶善有焉其可以不書紹興九年六月新安汪藻記

重建文正范公祠記

文正范公勳業在國史其祠於廣德則已具見於內相浮谿汪公之記茲以祠宇久圯不修從弟鏞以嘉定二年爲郡博士撤而新之求記於鑰語之曰文正公盛德絕識才兼文武非贊揚所能盡然大要在立志不苟而已矣方在貧約則朝莫甘蠶粟之味既已富貴而子弟均布帳之清在海陵爲一倉官而築海堤數百里在桐川爲一獄掾而所立已卓然如此一馬微矣居則鬻以養士去又鬻之徒步而歸其跋乞米帖云顏魯公唐朝第一等人而餧粥不繼非所謂君子固窮者歟又有家書云老夫平生屢經風波惟能忍窮故能免禍公之所存類如此此其所以大過人者故曰志士不忘在溝壑勇士不忘喪其元公之自處直欲追古人而及之故其見於行事亦非今人所能及也學旣奉公之祠則爲士者無徒慕公之名位當求其所以致此者鑰旣爲推公之所以致此者而爲之記又因以勉吾弟與同黨之士鑰雖老尙當相與思古人與稽之義云三年仲夏望日四明樓鑰記并書鏞篆額

義田記

錢公輔

范文正公蘇人也平生好施與擇其親而貧疏而賢者咸施之方貴顯時於其里中買負郭常稔之田千畝號曰義田以養濟羣族族之人日有食歲有衣嫁娶凶葬皆有贍擇族之長而賢者一人主其計而時

其出納焉。日食人米一升。歲衣人衣一縑。嫁女者錢五千。娶婦者二十千。再嫁者三十千。再娶者十五千。葬者如再嫁者之數。葬幼者十千。族之聚者九十口。歲入粳稻八百斛。以其所入給其所聚。霈然有餘而無窮。仕而家居俟代者預焉。仕而之官者罷其給。此其大較也。初公之未貴顯也。嘗有志於是矣。而力未之逮者二十年。既而爲西帥。以至於參大政。於是始有祿賜之入。而終其志。公旣沒。後世子孫至今修其業。承其志。如公存也。公雖位充祿厚。而貧終其身。沒之日。身無以爲斂。子無以爲喪。唯以施賢活族之仁。遺其子而已。昔晏平仲敝車羸馬以朝。陳桓子觴之曰。君位之上。卿祿之百萬。而敝車羸馬。是隱君之賜也。晏子曰。自臣之貴。父之族無不乘車者。母之族無不足於衣食者。妻之族無凍餒者。齊國之士待臣而舉火者三百餘家。如此爲隱君之賜乎。彰君之賜乎。於是齊侯以晏子之觴而觴桓子。子嘗愛晏子好之賢。孟子曰。親親而仁民。仁民而愛物。晏子爲近之。今觀文正公之義。其與晏子比肩矣。然晏子之仁止於生前。而文正公之義。垂於身後。其規模遠舉。又疑其過之。嗚呼。世之都三公位。享萬鍾祿。其邸第之雄。輿馬之盛。聲色之侈。妻孥之富。止乎一己。而族之人弗得其門而入者。豈少哉。況於施賢乎。其下爲卿。爲大夫。爲士。而廩稍之充。奉養之厚。足乎一己。而族之人操壺瓢爲溝中瘠者。又豈少哉。况於賙人乎。是皆文正公之罪人也。公之忠義滿朝廷。事業滿邊陲。功名滿天下。後必有良史書之者。予可無書也。獨書其義田以警世云。公諱某。字希文。

昔逮事忠宣公。親聞緒論。嘗云。先文正置義田。非謂以斗米疋縑。使能飽煖族人。蓋有深意存焉。

時年尙少未甚領略縣歷三紀當宣和末避亂南渡紹興乙卯自嶺海被召至行闕丙辰春出使至淮上始過平江時義宅已焚毀族星居村落間一旦會集于墳山散亡之餘尙二千指長幼聚拜慈顏恭睦皆若同居近屬以家譜考之自麗水府君下逮良字諸孫蓋十餘矣然後見文正之用心悟忠宣之知言也紹興己巳十月辛未曾孫直方記

范氏義莊申嚴規式記

中奉大夫權尚書吏部侍郎兼權給事中兼侍講劉榘撰朝議大夫權尚書禮部侍郎兼中書舍人兼太子左諭德兼同修國史實錄院同修撰兼國子祭酒曾從龍書并題蓋朝散郎左司諫兼侍講范之柔立石

物本天人本祖閭閻之人有視其祖之子孫如路人相毀訾相并兼如仇敵者不知本爾榘少讀文正范公遺事公平居語子弟曰吾吳中宗族甚衆於吾固有親疎然吾祖宗視之則均是子孫固無親疎也吾安得不恤其飢寒哉且自祖宗來積德百餘年始發於吾得至大官若貴富而不恤宗族何顏以入家廟榘斂衽歎曰公之行百世之標的公之言薄俗之鍼砭也吾鄉居家遇有不如人意事卽因公言以自媿歎玩不去手司諫公因言先祖所創義田今幾二百年聚族數千百指雖甚寢者賴以無離散之患義莊故址曩因兵火爲居民侵據之柔與吾兄良器極力經理爲屋以棲義廩餘以待族人之無家者浸還吾

祖之舊惟是義莊規式歲月易隳請之朝屬之鄉郡勒之堅珉俾世守而傳之無窮者吾猶不敢懈也幸備位諫垣當具本末奏陳乞申嚴行下庶不負文正公所以責望子孫之意暨得旨如請屬架以記不容以不敏辭抑聞之士尚志志有小大功業利澤亦如之方文正未遇讀書長白山凍粟糜而食人不堪其憂而公貫通古今經濟之略已具於此時及率言官叩閣爭事自請鎮靈夏迄破戎人之膽功烈焜耀則斂而惠宗族者抑餘事也忠宣公致身台輔忠賢是侶想其捐所載麥歸毫時文正公已心知其有子矣嗚呼有文正則有監簿忠宣左丞侍郎數賢子厥後不熾昌競爽尙得爲有天理邪諫垣所以立身承家固已無媿於乃祖願益以文正忠宣之弘猷大節自勉公之族人又當相與扶植以成諫垣之志則范氏之門益大義廩之儲益闢義居之族益貴達富盛相望將不止如今之所見云嘉定四年三月一日架謹記

### 范氏復義宅記

吳門范氏自唐柱國麗水府君居于靈芝坊今在雍熙寺之後五世孫文正公少長北地皇祐中守杭始至故鄉訪求宗族買田千畝作義莊以贍之宅有二松名堂以歲寒閣曰松風因廣其居以爲義宅聚族其中義莊之收亦在焉中更兵燬族黨星散故基榛蕪編民豪據爲居宇爲場圃僦直無幾甚失遺意粟無所儲寓於天平山墳寺倍有往來給散之勞尋復圮廢改寘城中反寄他舍病此久矣自公長子監簿而下又五世而至良器一日謂二弟曰先君奉議念此有年齋志而歿吾儕當有以振起之慨然自任思圖其新於是歷告居民盡除僦直約期而遣之不服者訴于郡于監司以至上達臺省提刑臨川何公異

太守四明鄭公若容咸義此舉力爲主張由是悉得故地周一千四百四十八丈首捐私帑繚以垣牆創建一堂仍扁歲寒以祠文正結屋十楹以處貧族就立新倉寢復舊觀庇役於慶元二年之季夏中秋告成不愆於素觀者無不歎息親掌出納一年以爲後式選族子之廉謹者二人繼之詳具要束以補舊規揭于堂上田籍之傳遠者俱刻之石以爲永久之計介弟之柔續世科於百二十有四載之後尤勇於義旣力贊其兄謀之屬鑰爲記始末鑰不佞先祖少師收卹宗族有意於此而歲不與伯父楊州始爲之雖不及文正公之盛而寒宗之貧者賴以自給亦四十餘年于茲先工部欲附益之清貧終身猶未果也見范氏家法爲之媿歎是舉也衍文正公累世之遺澤伸先奉議九原之餘恨又以綿范氏無窮之休豈不偉哉嗚呼文正公奮身孤藐未嘗賴宗人毫髮之力旣達則閩族受解衣推食之恩天佑范氏三子鼎貴皆以宏才高誼上繼父風後人得維持馮藉以保其家良器一布衣而決意興起不惟義宅載新義莊亦復整飭剔蠹省費又爲數世之利用心如此後其興乎嗚呼文正公初立規矩止具給予之目僅設預先支請之禁不數年忠宣公已慮其廢壞故治平奏請聖旨違犯義莊規矩之人許令官司受理又與右丞侍郎自熙寧以至政和隨事立規關防益密今之規約又加密矣一門同姓爲此義事其難如此况天下之大思所以爲億萬世之計者又可忽乎嗚呼衣冠之族不免飢寒者甚衆願如范氏之宗派而不可得今坐享飽燠者幾人若人人如良器用心更相扶持以永其傳則善矣若曰是我所當得者而不思自力甚者反爲蠹於其間則文正諸公實臨之其聞於有司曰公元者蓋今之族長云三年立秋顯謨閣直學士太中大夫提舉江州太平興國宮奉化縣開國男食邑三百戶樓鑰記并書

文正公讀書堂記

今名溪東書院

范文正公讀書堂乃湖右常平使者兼澧守料院董侯所建也。初文正公少孤且貧從其母歸朱氏。朱宰澧之安鄉。公侍母偕來。嘗讀書于老氏之室。曰興國觀者。寒暑不倦。學成而仕。爲時名卿。邑之士咸知敬慕。築堂祠之。旣燬于兵。慶元初。憲使范公處義復創于觀側。因陋就簡。將頽圮矣。侯謂問學精勤。立大志於窮約者。莫如范公。名節不屈。成大勳於顯用者。亦莫如范公。學者所宜宗師。將徒書堂于近城。庶使四邑之士。仰其高風。而景其遺行。乃卜澧之陽。惟東食彭山。突兀其前。諸峯環列左右。旁挾兩水。東西來朝。氣象軒豁。勝景畢露。豈地靈顯晦。自有時耶。於是度材庀工。分畫經始。中建一堂。旁列兩廡。設四齋。以育士植。五間以爲門。後創一樓。扁曰通經。蓋取文正公讀書十年。大通六經之旨之意。立文正公祠於堂之東偏外。又闢一門。繚以周垣。克壯形勢。棟宇華麗。輪奐鼎新。實一郡偉觀也。斯堂之役。郡博士鄭自得。掌籍吳杰。直學張轍。實董之。以底成績。堂成。士未有養。乃括沒官之田。有數百畝。拘而籍之。貳車馬公壬仲。又助金千緡。增鬻田爲不朽計。侯命友龍記之。友龍嘗讀國史。見文正之勳名事業。鏗鏘宇宙。蓋不特著見於參預大政之時。而實根本於窮居江湖之日。其言先天下之憂而憂。後天下之樂而樂。此志已定於素。故能入贊萬機。出破西賊。而致我仁祖四十二年之盛治者。公之力也。噫。以文正公之立身行己。視聖賢爲無慊。而建功立業。又書之青史而不愧。蓋其窮之養。卽達之施。幼之學。卽壯之行。猶火然泉達。有不容禦。澧之士。其可不知取則哉。雖然。鳶飛戾天。魚躍于淵。氣使然也。士氣消長。亦在居民上者。有以感發之耳。今文正公之遺躅懿範。旣爲澧人所敬慕。然非侯振揚而尊顯之。其何以聳人心而激士氣。俾強於

爲善以振文正之絕響乎哉。侯之心亦勤矣。士登斯堂。苟篤志好學。切磋講貫。紹文正之事業。以副侯之所期。則可以無負。不然。安坐而食。既飽而嬉。不能克志厲行。追蹤前哲。得無媿乎。堂建於寶慶丙戌之秋。成於是歲之冬。費於公帑撙節之餘。而無毫髮科斂之擾。是皆可書。故併記之。以誌來者。侯名與幾字。叔存。番易人。明年丁亥上元日。承直郎澧州軍事推官任友龍記。朝奉郎通判澧州軍州事賜緋魚袋羅源書。朝請郎大宗正丞兼金部郎官聶洙隸額。

吳郡建祠奉安郡守潛公講義

咸淳十年。平江府太守潛說友。以公鄉郡建專祠。爲邦人式。得地于公義莊義宅之傍。祠宇數十楹。以奉公祀。奏請于朝。撥田以供春秋二丁祭祀。朝廷從其請。奉安日。潛公講魯穆叔答范宣子不朽之說。太上有立德。其次有立功。其次有立言。此謂之不朽。

春秋魯穆叔答范宣子不朽之說也。亦嘗因不朽之義。而遡古人之所自立者乎。易曰。立天之道曰陰與陽。立地之道曰柔與剛。立人之道曰仁與義。人之所以與天地並而爲三者。以其能立於仁義故也。天之立不根乎陰陽。則職覆若爲而不息。地之立不因乎剛柔。則職載若爲而無疆。人之立不本乎仁義。則盛德至善。若爲而民不能忘。何則。德以仁義而立。則德爲純德。功以仁義而立。則功爲宗功。言以仁義而立。則言爲格言。固未有無所立而能不朽者。亦未有外仁義而能卓然有立者。是故本諸身。證諸庶民。建諸天地而不悖者。仁義而已矣。富貴利達不與焉。夫子曰。君子疾沒世而名不稱。豈教人以好名哉。謂其不知所以立。而無善之可稱耳。君子而能立萬世不可忘之德業。則天下自有萬世不能忘之人心。夫舜以

孝禹以功臯陶以謨皆非有意於立而自爾立者其仁至義盡弗可尚矣後乎夷之清惠之和管仲之一正天下史佚周任之有言亦皆隨其所立傳於來世彼晉楚之富趙孟之貴非不自視哆然也往往於榮華之飄風不踰踵而莽爲遊塵矣曾子曰彼以其富我以吾仁彼以其爵我以吾義夫仁義理也萬形皆有弊惟理獨不朽宣子乃以世祿爲不朽不知物之至易朽者莫世祿若也故穆叔之對以立德爲上立功次之立言又次之且證之曰臧文仲旣沒矣其言立由是觀之則德也功也言也苟立其一亦可不朽而况三者俱立有如文正范公者乎公生我朝盛時實鍾天地間氣光明俊偉二三十年後猶使人竦然起敬况當時乎考亭朱子論本朝人物或歎其初或議其小獨於公而稱其傑出之才夫才而謂之傑出則必有參天地之化關盛衰之運者矣蓋公之於仁義如飢渴之於飲食須臾不置其見於脩身齊家處宗族待閭里居官行事愛民利物浩如也此非富公所謂道大德具者乎我是以知公之德之立皆仁義之所充拓陳宮壺之戒弭朝廷之憂腹中甲兵西賊破膽而天章一疏實將振起我宋一代之治若使盡見施行則後來者無所用其紛更而國家蒙福莫之與京矣此非韓公所謂大忠偉節者乎我是以知公之功之立皆仁義之所成就公在天聖中遺宰相書無慮萬言經濟規模大抵略見其後爲牧守爲將帥爲執政平生所爲無出於此蓋言之必可行也雄文大冊小篇短章靡不燦然一出於正此非蘇子所謂有德有言者乎哉我是以知公之言之立皆仁義之布濩流行天地付公以不羣之資而公能自立其與天地相爲不朽之事而富貴利達固不足爲公輕重也嗟夫孰不爲德而立德難若存若亡德烏乎立孰不爲功而立功難倏成倏墮功烏乎立孰不爲言而立言難可無可有言烏乎立惟立始能不朽惟不朽

始可言立。若公則言非徒言而功皆酬其言功非徒功而功皆本於德無他仁義以爲之主也。德立則功與言俱立矣。是又合穆叔之所謂三者而一之此之謂不朽。信乎其爲不朽也。彼皇皇汲汲於富貴利達而不知可大可久者之爲何事。卒於下同衆人泯滅澌盡者何可勝紀。其視公之所立果何如哉。凡公宦轍所至皆祠而奉之。吳父母國也。乃無專祠以慰里人不朽之思。說友景行高風久矣。濫茲分牧亦且踰朞始克肇新斯堂儼設公像以補此邦之闕典是役也上而朝廷中而士大夫下而閭巷之耄倪莫不謂宜然則公之所以深服乎人心而莫間於今古者只是就仁義上立脚做了天地間第一等人而已。做好官易做好人難誰謂華高企其齊而敢因穆叔不朽之說試從諸君評之庶相與立乎其大者。

幕官廬陵劉垣陪講孟子曰聖人百世之師也。伯夷柳下惠是也。故聞伯夷之風者頑夫廉懦夫有立志聞柳下惠之風者薄夫敦鄙夫寬奮乎百世之上百世之下聞者莫不興起也。非聖人而能若是乎。而況於親炙之者乎。蓋謂公兼此夷清惠和聖人之德而可爲百世之師也。

文正范公祠記

中奉大夫江南浙西道肅政廉訪使徐琰譏朝列大夫治書侍御史行御史臺事李處巽書并篆額。至元壬辰予奉命廉訪浙西蒞吳中是爲文正范公之鄉尊賢勵俗政所當先既仰慕其餘烈獎進其後人仲秋次丁有司以故事告將舍采于公祠予肅然起敬日至當偕僚吏拜祠下與觀盛典是日成禮訪義莊登歲寒堂家園之碑歸然獨存祠正在其左門堂寢室嚴整合度蓋宋郡守潛公說友所建牲牢器幣則撥田以給之俾公子孫世守而歲祠焉薦奠儀文皆當時所定乃甲戌建祠旋被兵意有所增廣而

不遂亦未暇有所記也。一日主祠邦瑞踵予門求記，且曰：「祠雖建於前代，禮實存於今日，有一言而可以有底荒墜者，繫我公之靈，實永賴之。余固辭弗獲，辭移治錢塘，凡再歲，徵踐言益勤，謹按釋奠必有合也。」獨非故有之夔夷乎？而石守道慶曆之詩，固已指公輩爲夔禹矣。又按鄉先生歿而祭于社，社稷民以生，先師民所以生，師法公獨不祭於鄉乎？矧公爲政所去見思，慶鄧數州之民往往生祠，畫像既歿，後祠于長白于海堰，于睢陽于廣德，于鄱陽。公蘇人也，郡學以建學祠。公天平山先壇僧寺舊有祠，然稽協古典，必專祠于此，而後愜於人心，夫亦何爲而然耶？致君之志，動物之誠，放諸四海而準百世而下，聞者莫不興起也。是豈區區富貴利達以銜耀於須臾者可同言而語哉？昔宋人定五代軍鎮之亂，以儒立國，儒而見用者何限？以公而不得相其君，展其憂天下致太平之略，彼一時也，非可爲之時乎？自其入館閣爲諫官，諫則必黜，黜而益諫，陳善閉邪，寧以身蹈不測而不悔，非直以言語侍從爲職也。故雖當路不容委之，邊鎮才兼文武，適受主知，正己而不求人，相與解仇讎，力卒臣夏人，以安中土，爲所當爲。一自信其屢爲守帥，又豈尋常多議論少事功者哉？晚參大政，請倣周官六職，分任輔相，漸復古制，開陳未終，權倖惎間，不得安于朝廷之上，雖其國家盛衰由此而分，而君子小人迭爲勝負，常使人躊躇鑒戒而未已也。嗚呼！尙論其世，不知其人，可乎？或以爲王佐，或以爲傑出，要其平生，則以爲有德者。又公光明俊偉之本原，歟！留心聖賢，弘毅力行，漢唐人材鮮克進於是矣。初公買田以贍族，而族滋大，立塾以教其人，而子孫類份份焉，遭聖朝仁恕，恤其科徭，祭前古忠烈，比有事於公源深流長，天佑善人。於公蓋無爽者。昔晁仲約

之款賊完城。公不肯加誅。文忠富公服其絕識。蔡確詩獄。公之子忠宣公謂責之太重。元祐諸賢亦以自悔。卽其存至公全大體。世之研幾成務。不當如是耶。人有古今道。有顯晦。瞻相儀形。是豈一家一鄉所得私者。遠惟者成人宅心。知訓而予也。曾何足以發之。至元三十一年正月廿日記。

### 義學記

前朝奉大夫牟巘譏。集賢直學士朝列大夫前江浙等處儒學提舉趙孟頫書并篆額。

古者二十五家爲閭。閭左右各設塾。鄉先生爲之師。裹衣博帶。晨坐閭門。教其民之出入田畝者。有教有養。誠爲良法。自井田廢。閭左發古制。盪除漢以來。或爲講堂。爲精舍。而養則未之聞也。范文正公嘗建義宅。置義田。義莊。以收其宗族。又設義學。以教教養咸備。意最近古。夷攷厥初。宋時天下有四書院。應天府書院爲首。先是郡人戚同文。聚徒講授。士不遠千里而至。文正公亦依之。以學同文爲人質。而尙信義。宗族貧乏。則賙給之。喪則賑卹之。不積財。不營居室。或勉之。輒曰。人生以行義爲貴。安用是義之一字。實與公意合。暨公登第立朝。爲守爲帥。以至大用。名位日盛。祿賜日厚。遂成義莊。義學爲其宗族者宅。於斯學於斯所耕者。義田所由者。義路。何適不宜。嘉遺後人。可謂篤至。繼繼承承。亦惟成規。是守。舉乙亥。兵戈倣擾。未遑茲事。至元丁丑。主祭邦瑞。提管士貴。共議興學。卜地于吳縣三讓里。距祖塋二里。所涓目。庀工爲屋三十楹。祀文正公於其中。會講之堂。扁曰清白。東齋曰知本。西齋曰敬身。外闢室爲教諭。假息之處。庖湦廩廡。蔬茹之圃。咸在外爲周垣。扁其大門曰義學。清溪松竹之間。昉聞弦誦聲。是役也。義莊掌計之勞。爲多。提管又撙節助濟。浮用增田山僅百畝。備師資束脩之禮。子弟筆札之費。一有以勸。大德戊戌。朝旨

以義莊義學有補世教，申飭攸司禁治煩擾，常加優卹。無復干吾藩者可肆志於學矣。至大戊申，提管馳書來，俾爲之記。昔錢公輔嘗記義田巘也，何敢與斯文竊聞。文正公早歲就學應天時夜以繼旦，冬月憊甚，以水沃面，食糜度日，人不堪其憂。其苦心勞形者如此，博通六經，尤長於易。學者從之叩質，樂與往復，無微弗究。其難疑答問者，又如此用力，何啻十倍。今人耶？咨爾來學，書爾佩衿，盍亦追思先志，俛焉孳孳，毋以寒暑而爲作輟。庶幾他日業精行成，式克有立，得名爲儒，以應選用，以副二范君惓惓興學之意。其年七月旦日記。

### 忠烈廟記

前朝奉大夫牟巘譔集賢直學士朝列大夫前行江淵等處儒學提舉趙孟頫書。中奉大夫淵東道宣慰使都元帥李果篆額。

文正范公忠烈廟今在姑蘇三讓里天平山。公自睦移守鄉郡，再省三世松楸。不但漢人過家上冢之榮而已。嘗卽白雲菴奉香火，洎登政府，得追封三世，置墳寺，始奏改菴爲白雲寺。祀徐國公、唐國公、周國公，蓋慶曆時也。猶未有忠烈廟之名。先是元昊據靈武，納旗節，僭位號，威脅諸羌，肆爲邊患。朝議舉兵攻討，遂以邊事付公。首用种世衡築青澗城，扼衝要，大營屯田，聽民互市，鄜延乃異時。西夏貢路，但嚴備不出，以示招納。又築大順城以捍環慶，築細腰胡蘆十二寨以制明珠，滅臧二族。元昊勢漸折，乃命公及諸號知兵者分領要害，爲持久計。以待其弊。已而昊卒，納款如公言。而公在廟堂以議論不同，均佚南陽。旣遂謝事矣。公外剛內和，恩威迭用。當時邊人相語：此小范老子。智中有數萬甲兵，不比大范老子。大范指雍

也或又以龍圖老子稱之其爲人所畏愛如此邪慶諸郡與屬羌皆立生祠繪像以事其終也屬羌曾數百舉哀僧舍哭之如父三日乃去宣和間慶帥宇文虛中以郡人思公不忘祠事甚謹奏賜額忠烈廟他有舊額皆易新榜紹興失秦隴慶陽廟貌邈在他方始改奉於天平山每歲上巳三司率僚屬郡博士率前序偕來致祭廟久頽毀至元乙酉主祭邦瑞提管士貴共議重建取義學餘米歸之義莊爲土木費司計邦翰宗遜等佐之其年四月旣望新廟成丙戌二月旣望率族奉安前設文正公神像內設三國公神儀廟凡十楹黝堊丹漆備極壯麗供具皆完好大德甲辰行省聞于朝禁治煩擾崇奉尤嚴於是士貴以書抵讞俾記厥成謫焉未學固辭弗獲惟昔文正公在朝聞延州危急自請代張存直欲委身不測之地人以爲難讞竊謂未若公上百官圖詆宰相爲張禹雖觸盛怒坐以越職曾不少沮爲尤難蓋不顧其一身之利害禍福故能內肅朝綱外亢方面謚曰文正廟號忠烈如是之偉也夫士大夫則知尊祖矣尊之者何銘其德善也是宜作爲銘詩刻石列廡下其辭曰

南陽諸葛蜀漢再造志決身殲民哭陌道乃廟沔陽成都夔子號曰忠武西人悲喜相傳尙記讞雙誅邵於惟文正異世同轍雖老益壯雖死不忘精忠盛烈夏日秋霜昔討靈武皇威遠加聲勢震燁摧其角牙忠烈有廟參錯西土公像在堂莫予敢侮天平之山白雲之泉公歸自西廟貌宛然誰實新之偉矣柱石上公之服揚休山立內祀先公爰備廟制維垣啓宇光榮三世式濟世美忠宣弟昆粵至斯今代有賢孫迺厚義廩迺廣義學同志合慮新廟攸作潔我牲醪率我宗黨揭虔妥靈默通肸蠁公在帝旁玉虬旣駕神遊委迤馭風來下佑我後人俾熾而昌廟祐是保千載奉常

有際天人之學。斯可以服天下之望。有擴宇宙之量。斯可以成天下之務。有堅金石之操。斯可以任天下之重。隆然曠然震耀于世者。則文正范公其人也。夫大聖大賢必曠世而一見。天之降材不偶然也。唐虞之盛邈矣。孔孟之聖。而不能得時以行其道。三代以來。唯伊尹周公之道。能施於用下。此則子房之於漢祖。不屑盡其用。孔明之於漢室。不克盡其用。魏鄭公裴晉公之於唐。粗見於用。而公於宋。慶曆皇祐之間。雖用之。猶未究也。然而公之精忠大節。正言直氣。固已昭三光而徹兩儀。亘千萬年。凜然猶生。非學際天人。量擴宇宙。操堅金石者。其曷能與於此。公諱仲淹。字希文。范氏。世爲蘇州人。蚤歲讀書長白山祠于山之醴泉寺。舊矣。惟公功業在世。名聲在人。與天壤爲不朽。固無待乎祠而存。而祠之屢壞屢葺。閱歷如一日。有以驗人之慕公之深。而其來游來歌者。慨其風烈。有以興起。則是祠也。於名教風厲甚大。尙論公之平。昔俾來者有所法。公服勤茹淡。篤行力學。堅彊刻苦。壁立初載。信道不屈。守職敢言。屢貶屢復。謇謇益勵。絕迹凡近。宅心高明。窮達無間。始終一致。其操其學爲如何。書條政務至萬餘言。迨其得位。舉見於用。立朝奏陳。皆可垂憲。崇化厚俗。敦尚風義。救荒惠貧。所部晏然。出帥西師。夷夏聳服。熟羌來歸。卒臣元昊。及參大政。請明黜陟。抑僥倖。精貢舉。擇守宰。均公田。厚農桑。脩武備。減徭役。蠲逋負。重命令。更蔭補之法。嚴監司之選。皆經國遠圖。嘗自誦曰。士當先天下之憂而憂。後天下之樂而樂。其自任以天下之重。而方於成天下之務者。爲如何。公輕財好施。尤厚宗族。恩例俸賜。常均及之。置義田宅。聚族以給。在邊恩賚。皆以上意分賜。諸將坐呂相貶。至其再起。驩然相約戮力平賊。其量爲如何。民饗公利。以范爲姓。公所履歷。

民多立祠。中國外夷。莫不喜稱公之姓字。而樂道其善。夏師之擾。關輔搖動。聞其出鎮。人心遂安。夏人謂公腹中自有甲兵數萬。至有破膽之謠。仁宗聞其往援定川。喜曰。吾固知范某可用也。及登政府。一以太平責之。降手詔。開天章閣。賜坐。趣條具天下事。天下之人。視其去留。以驗治否。其所以繫天下之望者。又何如哉。蓋嘗論之。公生于宋。仕于宋。而其人品器量風節。則偉然三代之臣也。宋儒言本朝人材。以公爲第一。蓋確論之不可易者。起巖齊西晚生。東瞻長白。不遠五舍。逕拜祠下。惕然興懷。旣併其蹟。復繫以辭。俾歌以祠公。其辭曰。

繫真材之間出兮。羌兩儀之效靈。在地則爲山嶽兮。在天則爲列星。膺半千之名世兮。必興運之是丁。開一王之盛治兮。示四海之儀刑。復隆古之泰道兮。措羣生于敉寧。惟公之生。允無愧于是兮。固已揭日月而奮雷霆。蹟效著于人心兮。劇金石之勒銘。威於外夷兮。忠赤簡于大廷。不希世以詭隨兮。唯大猷之是經。上方軌于三代兮。下垂譽于千齡。沒而凜乎不亡兮。功烈貢乎汗青。復元氣於太虛兮。佐玄造於冥冥。尚斂福以錫民兮。驅疫癘而殄蝗螟。瞻故山之陳迹兮。鑒醴泉之清冷。俯岫幌兮。款巖局息。風馬兮。駐雲軒。薦松醪之釀郁兮。擷野蔌之芳馨。仰精爽之來下兮。庶肅然之一聆。儆鄙頑與貪懦兮。將如寤而如醒。恍神遊之無方兮。眄荒祠而涕零。耿英靈之如在兮。齊長白之亭亭。

范公慶州祠堂碑陰記

范公之名。與其施設。天下之人。無智愚稚耄。皆所以想聞。而懼一不得知者。垂四十年。旣薨。則墓銘神道表記公終始。尤得其詳。今龍圖閣直學士汝南周公。因慶民之思。又爲作祠堂。命屬僚書其實于廡下。然

公之惠愛及民之多有不士大夫之聞者文亦不克究日月之光猶或晦焉昔西事初慶以賊羌臣屬日久忽於儲備一旦重兵宿墾亡所取濟鳳翔府天興令持監司符檄來攝州事以芻糧數百萬計暴加於民促圖已功沸若羹鼎至有力不堪弊羣竄他邦甚者斷吭絕脰死以期免公是時方經略四路請留延安民聞之亟相提挈馳告麾下公卽日走符檄放天興令者還任凡百苛斂一切罷去未幾公卽受命專本路之師竄者還危者安里巷相保卒如平時之樂及朝廷欲驅邊人而戰先墨以著軍籍獨公所部之衆改涅其手非講習攻鬪各聽處田墾故上不糜廩食而得其用下不失爲良農此略從三代之法較之他路歡感斯可計矣先是賊焰狂熾日虞竊增屯士馬殆十數倍民坊佛廟皆得而止之公恤其非便乃圜視內外得州之北隅拓城樹宇分列營校工興之日有畚鍤發及枯骸者詢之卽昔之廢壠焉公命索其所餘以俸金賈近阜民田聚而墾之喪具祭品必親視而後給是歲久旱已而復雨僉謂公之陰德故天報之郡以處高艱於井飲舊矣公至乃以地勢迹之命匠氏直城之西北鑿及甘泉凡百餘井人無一金之費日用以足前此戍守多關輔之卒往往三數歲不能得其歸公謂人久勞則怨且惰將何以固衆心而取完力也自爾更相戍役止一歲爲限推此五事實公始未至與旣至而所爲者雖體有小大蓋不獨善士所悅若庸夫悍兵皆骨髓其賜迄今無忘公嘗出使江淮守七州歷四帥爲開封內史以至參預大政柄率皆除大害興大利由一方訖四海父荷子戴固縷縷有條目或薦紳先生暨太史氏未能盡其傳諒亦然也汝南公方將博采遺烈以盡力祠之意會郡進士劉頌件右來獻且曰此而不書大懼舌語所傳不足以信後世因爾次其說請刻于碑之陰時嘉祐五年五月十一日文林郎試祕書省校書郎權

儀州軍事判官監環州折博務塞周輔記。

內殿承制慶州兵馬都監兼在城巡檢雷周輔書并題額。龍圖閣直學士朝散大夫尙書兵部郎中環慶路馬步軍都部署經略安撫使兼知慶州軍州事及管內勸農使護軍永安縣開國伯食邑八百戶賜紫金魚袋周沆。

義渠荔菲彬刊。

文正書院記

吳郡祀范文正公舊矣。自公貴顯時置義田義學以淑其族之人。公歿而子孫世守之不廢。然而未有專祠也。咸淳甲戌郡守潛公說友始請建祠而割田以供祀事。公之子孫亦世守之不廢。然而未有書院也。至正丙戌郡守吳公秉彝建議請以書院易祠。僉憲趙公承僖按行吳中是其議遂得請于行省行省上之中書中書議以茲事有關世道且不設教官而以其子孫之居嫡者世主之於事便乃下從其請。公入世孫文英適主祠事。轉力殫慮改制增擴亦既宏且遠矣。祁時佐領江浙儒學以公事來謁祠下式睹其成衆謂不可以無紀而祁也幸際其會宜爲文辭旣不獲則取其家傳而徵之。公之生當宋端拱己丑其歿也以皇祐壬辰至潛公爲守時二百二十年天下郡縣凡公之所至蒙其澤而聞其風者率爲公立祠而於吳獨爲缺典。至吳公爲守時又七十年他郡縣且有以祠爲書院者矣而於吳尙仍舊規蓋吳爲公父母之邦公之父祖墳墓在焉子孫居焉族之人比屋而羣處焉所以表異而褒崇之者宜有加於他郡而反若不及者是宜賢郡守之有請也是宜廟堂之上之從之也。昔公以正大之學卓冠羣賢以忠義之氣振厲天下其功之被當時而澤後世者固不可徧舉獨舉其切而近者則公於所在開設學校以教育

多士至吳郡，則以己地建學，規制崇廣。迨公之子恭獻公復割田以成公之志。當是時，天下郡縣未嘗皆置學也。而學校之偏天下，自公始。若其察泰山孫氏於貧窶中，使得以究其業。延安定胡公入太學爲學者，師卒之泰山以經術大鳴于時。安定之門，人才輩出。而河南程叔子尤遇賞拔。公之造就人才已如此。其後橫渠張子以盛氣自負，公復折之以儒者名教。且授之以中庸。卒之關陝之教與伊洛相表裏。蓋自六經晦蝕，聖人之道不傳。爲治者不知所尊，尙寥寥以至于公。而後開學校，隆師儒誘，掖勸獎以成就天下之士。且以開萬世道統之傳，則公之有功名教。夫豈少哉。夫以公之有功名教如此，則後世之宗而祀之爲學校以廣之，固宜與夫子之道相爲無窮。蓋夫子之道與天地爲無窮，而公之功則與夫子之道爲無窮也。此書院之所以立也。雖然，祠則改矣。書院則旣立矣。凡范氏之子弟與夫四方之來者，宜何如？亦曰：誦其詩，讀其書，爲其人之爲而已。公之爲夫人之所能爲也。以公爲不可爲而不爲者，自棄也。爲之而弗力者，自畫也。高山仰止，遺貌凜然，必有寤寐我公於千百載之上者。承務郎江浙等處儒學副提舉李祁撰。嘉議大夫中書禮部尙書郡人于文傳書。翰林侍讀學士中奉大夫知制誥同修國史泰不華篆額。李

至正十年八月 日立。



# 朝廷優崇

古者一代帝王之興必尊禮昔賢以獎勸風俗文正公之勳德其在宋時固宜優禮至于皇元歲命郡守致祭省部諸司每有優恤范氏子孫之文於此見大朝之盛治所以培植風俗教化之意遠矣然則仕於是邦者盍亦體朝廷之意而加之優禮蓋所以爲風俗教化之楷範而豈私於范氏

## 置功德寺

中書門下牒蘇州白雲寺右諫議大夫參知政事范仲淹劄子奏蘇州天平山有白雲泉南有寺寺中有刺史白居易詠白雲泉詩明古寺也臣本家松楸實在其側常令此寺照管准先降條貫應寺院及五十年間已上至乾元節並得賜額上件古寺屋宇已應得條貫伏望特賜一名額取進止牒奉敕宜賜白雲寺爲額牒至准敕故牒慶曆四年四月二十五日牒

右諫議大夫參知政事范  
右諫議大夫參知政事賈

刑部

尙

書平章事章

工部

尙

書平章事章

觀察推官夏有章權節度推官汪仲權節度掌書記蔡抗殿中丞通判軍州事朱壽隆著作郎直集賢院知軍州事呂濤原武鄭方平篆臨安錢德範書山門住持僧擇梧立皇祐元年夏四月初一日當寺講僧

遇明。

建置祠堂

浙西提舉司申照會說友蒙恩守吳懼無補報竊見先賢文正范公本郡人也道德文章功名事業載在國史實爲我朝第一流人物身沒之後近二百年凡公過化之地無不尸而祝之獨本府未有專祠附庸學宮而已其於崇祀勵賢見謂缺典郡雖窘乏而事關風化曷敢弗力乃卜范氏義莊之東義宅隙土鳩工度材爲屋六十楹以奉公祠仍撥沒官田土拘收租米充春秋二祀之費其祠密邇學道書院春秋二祀太守率其屬親蒞及遇月朔則山長率諸生往拜焉先擇公之後賢者一人爲掌祠若郡計稍舒別圖收教其子弟并以附于書院已涓九月十一日立木候成舍采奉安外所合具申朝省照會仍乞劄下本府照應伏候指揮

省劄

照得知平江府潛提舉申先賢文正范公本郡人也獨未有專祠今卜范氏義莊義宅之東隙土爲屋六十楹以奉公祠仍撥沒官田畝拘收租米充春秋二祀之費已涓日立木候成奉安外申乞劄下本府照應合議行下

右劄付平江府照應仍具所撥田畝數目尙書省准此

咸淳十九年九月

日

與免科糴

提領浙西和糴所據吳縣申具致范令公義莊田八百九十七畝每畝勸米三斗計米二百九十二石一斗呈奉台判范文正公義莊迺風化之所關與免科糴仍帖報兩縣收冊拘錢須至行遣右今帖吳縣勸糴官仰照所判速便拘收范令公青冊并糴本錢具狀一併差人解發赴所支納不得違滯嘉熙四年閏月日帖吳縣勸糴官

提領浙西和糴所據長洲縣申具范令公義莊田二千二百七十一畝三角每畝勸米三斗計米六百八十一石五斗二升呈奉台判范文正公義莊迺風化之所關與免科糴仍帖報兩縣收冊拘錢須至行遣右今帖長洲縣勸糴官仰照所判速便拘收范令公青冊并糴本錢具狀一併差人解發赴所支納不得違滯嘉熙四年閏月日帖長洲縣勸糴官得違滯

祠設教諭

省府范文正公祠

照會本祠見闕訓導小學教諭一員今帖請李前職夢文充本祠教諭請照應日下供職具遵稟狀申至元十三年閏月日帖

帖

中書省劄差充平江府儒學教授兼學道書院山長提督范祠袁

中書省劄差充平江府儒學副教授兼學道書院山長提督范祠石

江浙等處行中書省據范士貴狀告年壯無疾係先賢范文正公嫡孫見充平江路學職兼管本族義莊

義學勾當卽日在天平山住坐先世文正公捨宅爲路學作養人材置買義莊田養贍宗族及剏義學以教子孫有墳山梯己田地並隸本路屬縣亡宋時及歸附後俱蒙軫念先賢後代本處官司會驗舊例除納稅石外一切差役科折並行蠲免後因吳縣及長洲縣司吏朦朧科折懦苗士貴狀告本縣次經本路俱蒙受理行下合屬改正止納一色造粳又於至元十七年六月內有各鄉里正人等欲將義莊與民田一例科助役米遂經本道宣慰司并按察司陳告蒙追索本路文卷檢照得范文正公置買上項田土初非私已正欲永遠養贍宗族子孫義所難及自前至今旣不會設著科役難同民田一例施行牒本路行下合屬除免間再具狀經行中書省陳告蒙受理行下本路照勘是實依上蠲免毋得科率違錯總府除已遍榜合屬外又於二十年三月內經省府陳告給蠲免文據奉省府鈞旨送浙西道宣慰司照勘依例施行毋得違錯奉此蒙宣慰司照勘是實劄付本路行下合屬依例施行除免一應科役就便出給文憑付士貴收執照驗外近欽奉聖旨節該在籍秀才做買賣納商稅種田納地稅其餘一切雜泛差役並行蠲免所在官司常加存恤仍禁約使臣人等毋得於廟學安下非理搔擾欽此凡は儒人旣例蒙存恤蠲免况本家裔忝先賢世居吳郡先文正置立義莊義學以教養宗族凡冠婚喪葬咸有所助迄今三百年流傳不朽人皆慕之本處官司尙以義關風化每歲舉行祀典實與其他儒戶不同但士貴雖已經行省陳告行下合屬蠲免止是本路備舉出給文憑付士貴收執竊慮歲月深遠官吏更易仍不准行雷例科率搔擾告乞出給公憑事得此省府除已行下平江路依例除免本戶雜泛差役外合行出給者

右付范士貴收執准此

爲范士貴告科擾事

至元二十七年月日

江浙等處行中書省近據平江路申准本路總管董嘉議關伏見先賢范文正公世家吳郡勳德事業著在青史以地建學撥田養士實其剏始吳士德之其三世祖父墳墓俱在本路管下皆封太師國公曾賜忠烈廟額每歲本路致祭甚虔置立義莊義學至今三百餘年規模如故若加旌表實爲砥礪風俗之本移淮江南浙西道肅政廉訪分司牒如准所言允當申乞照詳得此移咨

中書省照詳去後今准回咨送據禮部呈照得至元三十一年四月准集賢院關備國子監呈范士貴狀告先賢范文正公六世孫提管本族義莊義學養贍宗族垂三百年世守弗墜歸附以來蒙官司軫念先賢之後除納稅石外依例與免差役後因司縣官吏更替不常其間不無動搖雖蒙江浙行省行下合屬欽依聖旨事意蠲免一切差役及出給公據付士貴收執有長洲縣司吏仍復以和買爲由攬擾不安終未有都省存恤明文司縣得以玩視告乞優加存恤施行本監參詳范文正公以文武全材實爲當時之名相置買田宅養贍宗族足爲後世之良規三百年來子孫猶在若加存恤實爲聖元仁政伏乞照依先降聖旨除商稅地稅其餘一切雜泛禁止相應得此本院議得范文正公古之名相置買義田子孫世守不墜如准國子監所擬實爲相應准此本部議得范文正公前代名臣置田贍族垂教後世不爲無補如准集賢院所擬移咨行省照勘如委係范文正公親族欽依聖旨除免雜泛相應

具呈都省照詳去訖今奉前因本部議得宋相范文正公致君澤民之術具載方冊所設義莊義學資給宗人教育後裔至今規模不墜其於世教不爲無補宜咨行省禁治諸人無得煩擾所司常加優恤外據旌表一節既有忠烈廟額似難別議具呈照詳得此都省咨請依上施行准此省府劄付平江路總管府依上禁治令所司常加優恤外合行出榜禁治諸人毋得煩擾所有榜文須議出給者

右榜曉諭諸人通知

大德年月日

泰州據前安慶路儒學正朱景新謹呈竊見西溪范文正公祠堂係是宋時天聖年間文正公監西溪鎮買納鹽倉之日因見瀕海田土被海水侵鹹有妨耕種乃相度此地宜剏捍海堰以救護良田遂作程度計料文書申覆上司達知朝省就任遷范監倉知興化縣監督人夫剏築捍海堰於西溪之東計長一百四十六里零六丈六尺其高一丈其闊二丈爲則用磚包砌截海水於外護良田於內自後海陵興化鹽城等縣田土皆得種蒔不特百姓有糧及諸鹽場亦賴以培養剪燒氣力者今三百餘年矣亡宋年時鄉人告於官而立文正公祠堂於西溪以報范公之德已經年深至歸附後毀廢祠堂大德四年間前任海陵縣丞白將仕等收買屋料興復起蓋祠堂重新裝塑賢像彼時蒙海陵縣曾出榜文禁約諸人毋得沮壞祠堂一節今爲年深前榜不在一等不畏公法之人在祠堂毀壞牆壁塞澆糞草地土掘取泥土多端侵損卽日再行修整若不呈乞出給榜文付祠堂張掛省諭諸人毋得似前沮壞誠恐日漸毀壞前代名賢遺迹不便據此合行具呈

右泰州西溪書院禁約

據前真州儒學學錄朱景新狀呈竊見泰州西溪范文正公書院昔因通泰兩州之地東臨大海每遇風濤大作直抵城下人被其苦亡宋天聖間公監西溪鹽倉之日遂築捍海堰橫截潮水自後鹽農俱受其賜爲此立祠於西溪歲時致祭積有年矣自歸附後廟貌頽圯迨今未整若不重爲修理恐負上司美意今欲興工慮有一等不知禮法之人攬擾沮壞未便乞出榜禁約施行得此使州合行出榜如有違犯之人仰指名告官取問是實痛行斷罪所有榜文須至出給者

大德五年二月 日

右泰州榜文

中書省准河南省咨言泰州海陵縣西溪鎮前宋范文正公仲淹所建書院在焉當其還朝民爲立祠以報其德經二百餘年至元歸附學遂廢弛大德間姜國英以己財重建祠宇乞令本儒主領相應中書送禮部議旣經本道廉訪司體察舊有祠堂委係前賢合設書院宜從所請

延祐二年 月 日



# 遺文

文正忠宣父子諸公道德充積於中著於勳業見于文章其片言隻字皆有裨於治道世教非若世之文士徒枝詞琢句務爲工而已故今於諸公之文雖有數語亦必記錄使人知范氏之不朽者蓋在於穆叔之所謂立言而非宣子之所謂世祿云

## 與中書論責劉琦事

忠宣公

今日忽聞詔命以臺官劉琦等言多失實事輒近名擅去官曹規喧朝聽各落御史降充監當者聞命之際中外震驚蓋人臣以率職爲忠人君以納諫爲美是以仁宗開言路優容諍臣執政不敢任情小人不能害政以致太平日久億兆乂寧先帝容納直言未嘗變色是時呂誨等與純仁爲御史亦嘗擅納告身皆蒙慰諭主上思紹先烈而因二三執政不能以道致君教化或失其後先刑賞或乖於輕重中書藏其本末但致外議喧騰凡居言責之臣敢不卽時論奏旣許風聞言事卽是過失得陳而柄臣遂據摭其罪主上將何所賴且參政以文學自負議論得君專任己能不曉時事而又性類率易輕信難回舉意發言自謂中理欲求近切忘其舊學捨堯舜知人安民之道講五伯富國之術尙法令則稱商鞅言財利則背孟軻鄙老成爲因循之徒棄公論爲流俗之語異己者指爲不肖合意者卽謂賢能所以薦薛向爲周才指呂誨爲無用主上無從諫之美時政有揠苗之憂曾相公年高不退廉節道虧但欲見容雷同苟且舊好拘文守法今則一切依隨趙參政心知其非而辭辯不及凡事不能力救徒聞退有後言此皆朝廷大

臣所爲安得政令無失。按此篇亦見言行錄中。但彼以爲上神宗而此以爲與中書兼詞語亦多不同。故重出之。

論王觀不當責疏

陛下臨御以來未嘗嚴責諫臣。一旦行之恐傷仁化。又慮來者或多各一一竄逐。浸失朝廷清淨之體。所有先降貶責王觀文字。臣未敢簽書。若陛下決以臣言無取。乞謫臣補外臣。雖一身斥遠。若遂決朝廷大疑。則是猶有所補。不幸秉拔。則死之日猶生之年。

王氏語錄序

忠宣公

先生名伋。字孔章。希逸子其號也。自唐中葉世司天文。能先見藝祖祚曆之象者。先生之世祖也。族居京師有年矣。以議金鷄曆出江西。故先生爲江西人。明經取青紫。佐雍熙者。先生之志也。不幸試南宮偶遺。乃蘊所學。以紹箕裘。交遊中有以功名勉之者。則曰。植黨蔽賢。象數已著。吾人苟獲漏網。亦幸矣。未幾。王介甫出焉。朝野咸服其明。嘗病卜相之術。雖可與醫同試。見效然於人事。不加損益。醫與營居送死。雖皆曉。迷釋惑。愈爲有力。異乎太史公所謂流者遠矣。又有醫書二十四卷。行于世。此又可以見先生之博物也。一日葉叔亮集其語錄以示丹陽叟。嘉其純正不爽。時譽出處之節。無愧古人。因援筆以書左界焉。叟謂誰。范其姓。純仁名。堯夫字。先生故人也。

〔論太廟增室事云〕書曰。七世之廟可以觀德。則禮記謂天子七廟。三昭三穆。與太祖之廟而七也。蓋七

世定於廟數之中不緣所事之人所謂有天下者事七世云者特因廣數以經禮言之也國朝自禧祖而下至仁宗始備七世故英宗祔廟則延順祖神宗祔廟則遷翼祖三昭三穆合於典禮今來太行皇帝於神宗父子也如禮官所議更增一室則廟中當有八世四昭三穆考於典禮未有合者况唐文宗卽位則遷肅宗以敬宗爲一世故事不遠在後無違將來大行皇帝祔廟當以神宗爲昭上遷宣祖以合古三昭三穆之義

「恭獻公議南郊合祭云」南郊合祭天地不見於經神宗皇帝考援古誼詔罷合祭元豐六年止祀昊天上帝於圓丘唯是北郊先帝未及躬行然詔旨明甚所宜遵守者也又言春爲陽故以正月迎於東郊秋爲陰故以七月迎於西郊聖人有作莫之能改也今使迎春則在西郊而用秋之時迎秋則在東郊而用春之時樵夫野叟猶怪以駭而况於鬼神乎天之與人非有異也今應祭方澤也而合於圓丘用夏至也而用冬至益何以異此合祭肇於漢末其言不經朝廷近制考之方策告之宗廟行之天地布之天下以憲萬世或委聖言而從不經不可也

「龍圖范純粹論西事當改圖云」元祐六年九月奏准樞密院劄子夏國旣失恭順又復已絕恩必須輕忿日以擾邊爲計更須別圖方略元祐以來朝廷之所以御夏人處邊畫者莫非以禮義爲本以恩信爲先一切容貸期于息兵然六七年間戍兵之卒未嘗減罷金穀之費未嘗省羨備禦之計未嘗簡弛耳且彼所求我必與之不知眞足以厭其所欲不爲它日之患乎失要害之地濟無厭之求虧國體勢墮賊計謀養虎開端不可不謹臣願並以元頒詔書從事如其偃蹇置而不問戒飭吏嚴備如昔希功造事固所

不可護邊待敵宜無甚難以區區內亂之小羌尙能與中國久抗乎以歲月決可竟事在朝廷不惑而已  
〔又論熙延與夏國所畫封疆事云〕臣聞熙延兩路與夏國所畫封疆至今未決外議謂朝廷務在息兵不無虧失自二聖臨御之始夏人來朝繼秉常訃至乾順自立使者係道往返五六賈販貿易隨已豐富雖脩甚恭蓋亦爲自資之計耳朝廷卽遣使往加封冊欲速之意爲賊所窺果聞侮慢使人不卽稱謝興兵入寇延渭破殘反覆不恭宜在殊絕後日復有所請但可只委邊臣謂之要約示以閑暇使之望望然惟恐拒而不納則輕重之權在我事旣審決邊臣始以謝罪請盟之狀聞于朝廷然後明詔中外貸彼旣往之罪聽其乞盟之請歸吾陷賊之人賜汝旣許之地如是則朝廷之體豈不甚尊而制寇之策豈不甚簡歟昨不爲此計聞其有請卽許造朝使人旣至朝廷酬對寧不知皆廟堂謀臣之言乎是顧接太重許可太輕旣許以陷虜之衆易新造之壘人有品色多寡之異地有形執遠邇之差約當素明謀當素定皆著于書然後受人割地交相付與則彼尙何所能爲乎今謀約不素明定彼以疲殘百餘人塞責而來我乃不復較問亟以四壘付之四壘卽付卽以平轍熙延二境始議畫疆顧不晚乎旣已然者固不可追今可爲者審究徐圖尙未晚也如聞夏賊於塞門金城之城重有邀求又聲言與西鄰爲合從之謀將以重我外議謂朝廷不以爲重而輕棄之信如是則欲速已甚矣朝廷所以謂金城塞門爲不可棄者非以兩孤壘之爲利也謂其形勢險阻足以藩籬邊徼土田沃壤足以贍給邊兵也故不在賜給之限今乃欲局目前之小休棄形勢之要地舍數千戶已耕之土斷數百里斥候之衝屏蔽無餘出門過敵道路梗澀運

餉艱虞孤壘僅存我將安用詔旨不與之地徒虛名耳彼乃愈益猖狂邊患滋甚固宜朝廷之改圖也聞梁乙通用事之久元祐二年三寇涇原而漢兵十一將拱手城中不出一騎使席卷而歸後乃悉得前後所積歲賜金帛每語人曰嵬名家人管國事有此功否我之所以連年點兵者欲使朝廷憚我而爲國人求罷兵耳昔元昊叛時雖數遣人求和而故爲悖慢難從之議朝廷旣不從則語衆曰我求罷兵而南朝不許用此以歸怨激衆衆戰咸力乙逋今乃効之今朝廷旣議貶絕宜作邊帥草檄以淺近易曉之言具道乙逋無厭犯順之詳朝廷用兵于不得已之意令諸路多作木印棄于賊疆不惟可以伐狃衆怨之謀又足以激怒其衆使知禍自梁氏始庶有衆怨新叛之理朝旨但欲使近邊之人不能著業臣已謂未足繫彼國之要害使一國之衆奔命不暇而莫知所備斯可矣欲如是當令諸路帥臣公心叶力謀議相關一路將有所舉則諸路陽爲點集出兵之勢以留對境之備則實出路分賊無併兵拒敵之患諸路更守迭出則彼所備者勢分而力勞矣又自來諸路多招納降人自元豐以來諸路所納不爲不多若謂可以耗彼力戰之人則夏賊舉必數十萬豈招降之可耗也若謂可以助戰緣降人出入將帥豈敢全然倚仗計口給食坐耗邊穀借有地土可給亦妨占弓箭手請射之田其間仍多姦細緩急漢界有所舉動則猝然逸去致漏機事有害無益將求漢兵迭出宜悉止絕以清久弊朝廷如果令諸路互出銳兵撓賊當密戒諸路帥臣每有所舉不用過爲祕密略使兵聲先出勢若大舉使彼衆得以遠避我鋒然後出偏師以信其聲則其誰敢當要使數百里野無得耕之土衆無休息之期而已又申嚴博易之法以絕市貨則困賊之策在其中矣是不待多殺而爲利也

〔又乞修明元頤戰守約束云〕國之所以前坐制西夏者誠由連城北帥並統重兵利害相同左右相援首尾相副聲勢相接心一而力同氣遠而勢重如一身之有手足上下交相爲用而無有偏廢此我之所長而彼之所畏者也昔寶元康定用武之時先臣仲淹嘗統兵往援隣道破元昊長驅深入之謀救涇原屢衄可憂之患見於已試理勢灼然朝廷後來參定戰守約束頤降諸路實用其策非因徐禧計議邊事輕有改張遵行之初自擢其害蓋兵家張耀聲勢左牽右制古所不廢固未聞兵寡兵乏不假聲援而能獨勝者也今邊事未平虜情難測伏望朝廷深賜詳度檢會臣前奏及元頤戰守約束再如修明

〔又奏答訪問所問邊防機事云〕准詔諸路探報自秉常身死梁氏族人侵擅國事遂致諸部酋豪往往不服變亂交攻日相屠害若有投來西人仰相度可否收留仍更切厚與賞物募人遠探目今邊情向去利害縷細詳究措置聞奏臣除已依朝各施行外伏詳詔旨所問邊防機事而繫中外安危之本者如臣之愚顧何足以語此臣早膺使任久在邊徼採撫審料在朝廷正宜安不妄動用觀成敗之變息兵止殺重農務本太平之迹始於今日尙何此策之議哉彼之部酋若有以梁氏之禍來告者若請兵于朝者若據地而願附者若挺身以降者朝廷使邊臣諭之曰若主不幸爾乃臣子當盡死節之義善爲若主討賊而已尙何來告耶何但欲脫身而內附耶我之邊兵方備他盜不爲爾捕寇也臣觀戎狄之性以種族爲貴賤故部酋之死其後世之繼襲者雖雛稚之子亦足以服老長之衆秉常父子有國繇久國人歸心今諸路譏者之言雖曰秉常之死不明梁氏之族侵擅國事若謂遂能滅李氏之宗而有其國則臣未之信也蓋一國之衆豈無豪傑推李氏族子以主其國者乎豈遂甘心爲梁氏子臣屬乎

「又奏乞那差將兵云」紹聖二年呂大忠乞赴闕願早降指揮始朝廷劄下熙河范純粹預行措置建汝遮堡有如修建定遠城之類相機便行以乘伺間隙修建之時卽趁時併功興役伏奉指揮昨修定遠城下除本路將兵盡數調發照應防托外更蒙朝廷指揮下秦鳳路那將兵三二萬於通渭砦側近擇利駐劄照應萬一西賊犯境於本路將兵共力枝梧及下涇原環慶路各於本路差定兵將頒及萬人已上沿邊擇利駐劄大張聲勢使賊疑懼不敢併於一路作過將來萬一遂舉汝遮之役除本路兵馬斟量調發防托外乞朝廷預降指揮下秦鳳涇原環慶路經略司各令密切依昨來修定遠城例差那將兵預作準備候見本公司關報卽於逐處沿邊駐劄照應

貼黃稱仍乞下逐路帥臣別以他事爲名密切爲備雖弟子官屬並不得預聞庶無漏落

「又奏蕃官李忠傑等事云」准樞密院劄子蕃官包順包誠李忠傑趙懷義趙永壽許時暫赴闕臣赴任之初准朝旨體探招納邈川河南人戶等蓋自范育在本路日曾有遣納趙嗣忠之議又种誼還自京師昌言被旨招納緣日有阿里骨般次買賣向者謀議不容不知今醇忠之子被召恐多猜疑於臣所放機事有害兼懷義永壽資才無可取未敢遣赴闕并免與功多蕃官別有形迹及李忠傑見體量將入界捉來首領却送過天都等事臣輒從宜將行出文字節去李忠傑趙懷義趙永壽姓名止將包順包誠差使臣押伴赴闕其包順包誠今來朝見如欲示旌勸只乞賜與金帛願留官爵差遣以責來效及乞不以邈川河南情僞詢訪遂人恐有漏泄詔阿里骨見差般次赴闕進貢所有前後經營青唐指揮更不施行李忠傑三人別聽朝旨其體量李忠傑事狀如無顯迹卽不得少有枝蔓漏落致使危疑不安

「又奏牽制西夏事云」牽制之要當於平日先探知彼界人戶團聚虛實之所遇事決策前去指其巢穴攻其必救則解圍制寇不致虛發緣諸路帥司所出牽制之兵止於一路而賊之大衆勢必十倍旣衆寡不敵則牽制兵馬所行分須與賊兵聲勢相遠彼犯我東我出彼西進退之際不相逢迎庶無取困之慮今熙河秦鳳路地如犬牙兼秦鳳一路止有雞川兩寨之地係有邊面受敵之處若西賊舉衆欲秦鳳兩寨須經由看都川淺井川羅和市一帶山谷分頭南來此外更無他路如此則賊兵未至秦鳳已先逼近本路通遠軍通渭砦一帶邊面地形道路披圖可見除通遠軍蕃漢兩將人馬自須戒嚴以防侵軼不惟難以內自空虛引兵它出外所有熙河蘭岷等處漢兵蕃馬雖是可用緣本路對境惟東北天都山南牟會打繩川剴子一帶方是西界人戶團聚住坐之所指此而進卽行兵之路却須自看都川淺井川羅和市或石硤子等處結陣前去乃在賊兵歸路之外聲勢甚逼彼雖已犯秦鳳若探知本路兵行不遠必是引衆而還遂出我師之後卽見我之歸路立見梗絕甚非安全之計蓋本路在夏國西南極盡之處除天都等處路與賊相近不可經畫外捨天都而西卽全無人戶住坐如蘭州正北屢經漢兵討蕩具見的實決雖無利可乘恐徒有塞命之名枉致勞弊以此推較蓋諸路地形遠近不同而夏人團聚居止疎密有異故攻取便利理難一體本司今相度除賊寇河東鄜延環慶如探得天都一帶別無大段人馬會聚本路可以出兵牽制外如西賊併兵寇犯秦鳳路卽本路兵馬止可於白城谷災竿堡左右照應相度賊勢便伏緣今降朝旨定本路不許策應只令牽制有此利害深慮緩急申請不及伏乞朝廷更賜詳酌指撝

貼黃熙秦兩路既相隣接則形勢一同今秦鳳之於熙河既不可牽制只可策應即熙河之於秦鳳利害不殊並乞驗會本路前後所供對境圖籍卽見逐地名道路形勢利害牽制策應之法中間久廢因臣在環慶累曾論列方蒙朝旨下諸路頒行臣等曾預先探知西界人戶團聚之所後因賊犯鎮戎係在涇原西北與環慶相去三百餘里臣曾搗虛破賊於曲六律掌俘馘甚多遂解鎮戎之圍比其歸護巢穴則我師還塞方纔一日僅免阻扼轉戰之患是時若賊勢稍相附近卽歸師難保伏乞朝廷更賜照察

〔又奏分兵守汝遮云〕樞密院檢會已降朝旨下熙河蘭岷路乘機會修築汝遮去訖近節次據本司奏乞修展蘭州西城及定西定遠城雖已各降指揮依奏三處所用功役萬數不少慮本路於修建汝遮有所窺避將來以此爲名致失機會昨者本以三處城圍全闢增展或見今人馬暴露或緩急矢石交通無計保民日憂招寇念汝遮大役旣須候可乘之機則廂兵數千不當廢他壘之用兼汝遮役所地里非遙候其進築有期立可移兵前去愚慮偶爾及此於理合具奏心實無他事屬兩便臣所以且以修築蘭州定西定遠爲名分擧役兵前去使衆人明見逐處興作庶解夏人之疑比至汝遮有機可乘則役兵皆在隣近委實安便

〔又奏蕃官改姓云〕契勘本路蕃官自來有因歸順或立戰功朝廷特賜姓名以示旌寵如嵬名山爲趙懷順朱令唆爲朱保忠是也後有蕃官無故自陳乞改姓名經略司不止遏據狀申解省部亦無問難遂改作漢姓如乙格爲白守忠兀乞爲羅信是也亦有不會陳乞衷私擅自改作漢姓如盧唆之子爲周俊

明是也。見今更有蕃官扳援陳乞，無故自便，衷私撰改漢姓，竊詳古者賜姓氏者皆朝廷所以酬功德，別忠勤也。今反使夷狄醜類無故自易姓名，混雜華人。若年歲稍遠，則本源汨亂，無由考究。漢蕃弗辨，非所以尊中國而別異類也。欲乞諸路蕃族除係朝廷特旌寵賜與姓名外，卽不許。陳乞改作漢姓有今日不因朝廷賜姓之人並行追改，各依舊如允所奏，只乞作朝廷訪聞立法行下。

「又論交移生口事云」樞密院言：環慶路將兵與夏人戰，俘馘老幼婦女，范純粹選留，仍揭榜諭其親族，以舊掠漢人對易。其引導者人賞以絹三四十歲已下二匹，交換生口。若施之於講和罷兵之時，則名體俱順，無所不可。緣夏國方爾悖慢，興師盜邊，在朝廷宜明示棄絕，戒諸路邊臣整兵聽命，或間出奇兵，使其應敵不暇，或擾彼農事，使其地不得耕，或反間用權，或旁行招納，必使彼衆勞厭，人意動搖，則其凶會必使改輒。然後邊釁可期於止息也。若於此時便議將生口與之交換，卽恐體勢不重，有害事機。廉訪聞得西界凡是捉虜到漢界人口，並一一赴衙頭呈納，多是於近裏去虜監防羈管。今來本路所獲老小人口，止是橫山一帶人戶，縱有逐家骨肉丁壯願遵朝命，亦何緣於近裏取得羈管之人前來交易，以此推之，恐徒有輕動，必無實利。

「又論治平兵馬與今不同」元祐三年癸亥詔以治平臣僚所上互進方略授逐路帥臣，講求困賊之策。竊詳治平年兵馬數目以至將佐頭項，遣應次第，卽與目今全然不同。臣仰悉朝旨大意而已。使西賊於逐路山界各有所畏，分兵待敵，不敢併兵一路，則我計可行。邊機難以預定，貴在臨時處決，卽先事無可預陳。所有准備西賊，互有酬賽防庇邊民一節，卽不異見今備寇之策。

「又奏乞訪問州縣闕食去處云」臣訪聞得本路州縣民間甚有闕食去處及逃過主客人戶數目不少蓋緣累年不熟又自軍興以後調發顧卒凋弊爲甚而保結團教之法方此推行兼民間以邊事未平妄意私變加之向春闕食遂此流散深慮關陝根本益致殘弊所繫不經如蒙施行只乞作朝廷訪聞內賜指揮

「又奏乞榮賞曲珍」昔年雖有隣路牽制應援之法多是兵將官不務公心不以隣路被寇爲已職或量以少少軍馬或故爲迂遠備禮塞命遂致永樂之禍臣自領漕關中至忝今任累累論列三年間方蒙朝廷定議再立牽援之制昨來九月初五日晚得涇原路報賊公牒臣於是特遣委曲珍已下點兵束裝翌日長驅出境外三百餘里大破賊巢賊衆到漢界三數日解而去者珍之功也今來受指揮臣並未敢輒以語人欲望聖慈只遣近下使臣依涇原例就慶州勞問出界將官曲珍已下支押賜合得銀盒茶藥見朝廷勸賞不忘功之意在朝廷無所增費而於本路士氣足以激勵稍厭人情不爲小補



# 諸賢贊頌論疏

〔韓魏公遺事云〕魏公謂挺然忠義奮不顧身師魯之所存也。身安國家可保明消息盈虛之理希文之所存也。敢問二公曰立一節則師魯可也考其終身不免終亦無所濟若成就大事以濟天下則希文可也。韓公與孫元規龍圖書云近方知希文留徐將治已差下人致書藥詣徐及裁記爲慶遞中忽領來教且承希文疾遂不起聞之驚慟數日不能飲食忠正大賢天下屬望平生素蘊未得紓盡遂至于此深可哀哀痛痛所幸者到公治所後事得仁者盡力幹辦亦賢者之先識希文瞑目無憾矣今專差人致奠如公未發告令一幹吏同辦之幸甚。

富鄭公稱之爲聖人

石徂徠比之爲夔禹

張橫渠謂才氣老成

〔歐陽公撰公神道碑云〕自公坐呂公貶羣士大夫各持二公曲直呂公患之凡直公者皆指爲黨或坐竄逐及呂公復相公亦再起被用於是二公驩然相得戮力平賊天下之士皆以此多二公然朋黨之論遂起而不能正上旣賢公可大用故卒置羣議而用之歐陽公手自記曰修學道三十年所得者平心無怨惡爾修初以范希文事得罪於丞相坐黨人遠貶三峽流落累年比呂公罷相始被進擢及後爲范公作神道碑言西事呂公擢用希文盛稱二公之賢能釋憾而共力於國家者希文子純仁大以爲不然刻

石時輒削去一節云我父至死未嘗解仇每歎曰我亦得罪於丞相者惟其言公所以信於後世也嘗聞范公平生自言無怨惡於一人兼其與呂公解仇書見於范集中豈有父自言無怨惡於一人而其子不使解仇於地下父子之性相遠如此邵氏聞見錄曰歐陽作碑辯不可則自削去驩然勳力等語歐陽殊不樂謂蘇明允云范公碑爲其子弟擅於石本改動碑中文字令人恨之

〔歐陽公論小人讒沮范富諸賢云〕韓琦仲淹富弼等遇陛下聖明可謂難逢之會陛下有仲淹弼等亦可謂難得之臣陛下旣已傾心待之仲淹等亦各思報臣謂事無不濟但顧行之如何耳况仲淹弼是陛下特出聖意自選之人初用之時天下已皆相賀然臣所慮者仲淹等所言必須先絕僥倖因循姑息之事此等之事皆外招小人之怨怒而奸邪未去之人須時有讒沮若稍聽之則事不成矣臣謂當此行事之初尤須上下戮力凡小人怨怒仲淹等自以身當浮議陛下亦須力拒待其久而漸定日見成功

〔歐陽公論范公爲衆所推云〕韓琦與仲淹皆是國家委任之臣材識俱堪信用然仲淹於陝西軍民思信尤爲衆所推今若令仲淹外捍寇兵而琦居中應副必能濟大事若陛下以新用仲淹責其展効則且令了此一事俟邊防稍定不兩三月可以還朝既先弭於外庶可漸修於缺政

〔歐陽公論四賢不當罷疏云〕杜衍韓琦范仲淹富弼天下皆知其可用之賢而不聞其有可罷之罪自古小人讒害忠賢其說不遠欲廣陷良善不過指爲朋黨欲搖動大臣必須誣以專權其故何也去一善人而衆善人尚在則未爲小人之利欲盡去之則善人少過難於一一求瑕唯指以爲朋黨則可以一時盡逐大臣不可以他事動搖惟有專權是人主之所惡故須此說方可傾之臣料杜衍等四人各無大過

而一時盡逐必有朋黨專權之說上惑聖慈臣請詳言之杜衍爲人清審而謹守規矩仲淹則恢廓自信而不疑韓琦則純正而質正富弼則明敏而果銳四人爲性旣各不同雖皆歸於盡忠而其所見各異故於議事多不相從至如杜衍欲深罪滕宗諒仲淹力爭而寬之仲淹謂契丹必攻河東請急修邊備富弼料九事力言契丹必不來至如尹洙亦號仲淹之黨及爭水各城事韓琦則是尹洙而非劉滬仲淹則是劉滬而非尹洙此數事尤爲彰著陛下素已知者此四人者可謂公正之賢也平日間居則相稱美之不暇爲國讓事則公言廷爭而無私以此而言臣見杜衍等真得漢史所謂忠臣有不和之節而小人讒爲朋黨誣矣陛下於千官百辟之中親選得此數人一旦罷去而使羣邪相賀於內四夷相賀於外此臣所以爲陛下惜也

蘇子美聞京尹范希文謫鄱陽尹十二師魯以黨人貶郢中歐陽永叔移書責諫官不論救而貶夷陵令因此詩以寄且寬其遠邁也

朝野蔚多士衰然良可羞伊人秉直節許國有深謀大議搖巖石危言犯采旒蒼黃出京府憔悴謀南州引黨俄嗟尹移書遽竄歐安慚言得罪要避曲如鉤郢路幾來馬荆川還泝舟傷心衆山集舉目大江流遠動家公念師魯父作牧於東川深貽壽母憂歐陽永叔之母垂老橫身罹禍難當路積仇讎衛上寧無術亢宗非所優吾矣思正士莫賦畔牢愁

「蘇子美上文正公書云」舜欽觀古之烈士受人一言一顧之重不計己之能否事之重輕隕命捐軀無問而不入或促其禍敗累於所知者多矣然史氏裨說皆掇之以稱述其事而警厲偷淺舜欽竊謂其勇

敢敦氣節則有餘。至于成就大計。趣道與權則不足矣。故舜欽自少小迨於作官所爲不敢妄必審處己之才能而傳會于道人雖不知自信甚篤且久矣。昨者朝廷以閣下才謀絕世負天下之重望倚之以究西事。閣下開置幕府收策志慮英犖之士以自廣蓋以兵者重器資羣材以共舉一失其任則折衄報之而閣下誤有采聽將引猥瑣置於左右委言垂意發於顏色舜欽非不知依閣下之重可以取先價而自振起設臨機事不能有所建弼恥也有所建弼而不合於義不行焉亦恥也况於傾撓哉及是則不惟虧損閣下之望舜欽終身可廢無所容焉。是以上犯盛德懲激避辭者蓋在此也然舜欽雖至冥愚內荷閣下之顧夙夜感慨思有所報昨聞閣下以張存不才自求守延州物喻喧然以閣下領經略之權自可往來陝右進退在己延州逼近賊鋒而能舍安逸以就危險雖古人不逮也又或云閣下居長安統貳於人不能明白立功名將高舉遠去以自異此二除未必中閣下之度以舜欽觀之旣自張存則不得不自請但裁授之際有所未安何者以閣下爲經略則自陝西以至於邊徼斥候皆可處置在延則局于一州於他郡不接矣他郡不接或可不能仰制關中事則可慮也蓋關中之俗大抵强悍豪忍又形勢險固出於天下方今盡取鄉民藉之爲兵得操弓矢以自肆習往來道路與寇賊不辨小人少思慮加之氣俗又得此利器幸而歲常豐父兄家老聚居可約束不幸小歉父兄不能保有其子弟必將人人依險以自快則其將奈何耶况煩細迫而驅之以向敵人頗失望有天下而失人以信後將何所恃焉昨者延安鎮戎殺害民畜不可勝紀死氣結戾不判必能變化陰陽之和今雖稍稔恐來年宿麥不登民必狼顧矣弱者流轉強者化而爲寇賊則心腹自有疾矣閣下居延州雖能制昊賊之命係虜其種族逐之絕漠而遁亦何

救關中之事耶。故舜欽謂西羌不足憂於關中也。近日竊聞隣郡數勝頗得馬畜屠其柵壘火其積聚朝廷卽時越次以賞其勞使人得自有其所軍聲稍振士百其勇以舜欽觀之古之善禦戎者豈特是哉蓋務訓撫吾民使安其業不以非義動扼其衝塞絕其互市閉之沙漠之外俟其隙且困則破散之晨鈔夕咨與競尺寸之地非大國之體也。舜欽返慮將佐不知此事銳而少思狃豪髮之勝中其詭譎而所喪必大蓋兵家之法必以餌驕人而後取之况羌虜常以伏奇包衆勝中國當此之際閣下能部勒諸將分乘險阻不使習小利以爲功持重其體而死其奸謀不憚曠日而使之內潰此孫武所謂善之善者也。况夫體幽靜則謀精而威氣張銳則令頓而墮閣下立謀而首令者也以身繫安危可不慎哉若能去延州之狹以自任撫關中之水以示信而又沉遠變動則何敵之敢亢耶懸料古人所難况舜欽淺識而欲上贊遠略然區區之誠膈臆于內萬冀一得以補高明撫斷之餘特賜省閱幸甚幸甚窮邊寒苦乞加練護不任懇激之至

〔又答范資政書云〕道遠且阻不得上記以候起居家兄封到閏月所賜手教一通訓愛切至情義並隆懷感益深不言可喻舜欽昨得罪後都下沸騰未已其謗皆出人情之外而往往信而傳之自念非遠引深潛則不能快讎者之意又以世居京師墳墓親戚所在四方茫然無所歸始者意欲重去不得已遂沿南河且來吳中旣至則有江山之勝稻蟹之美兗州有田數頃郡中假回車院以居之親友分俸伏臘似可給豈敢更求贏餘以足所欲日甚閒曠得縱觀書策及往時著述有未備者皆得綴緝之治易頗有所得苦與處無人商論乃知君子理身格物之道自有本也險難萌而不之見宜其悔焉况舜欽性疏且拙

疏則多觸時忌。不能防閑小人。拙則臨事不敏。無所施爲。因此遂得退藏。蓋亦自幸。苟致之劇地。責其功績。徒自勞困而無補於時也。衣食之勿止此而已。今得心安舒而身逸豫。坐探聖人之道。又無譏察而責望之。何樂如是。攝生事素亦留意。今飲食起居皆自適。內無管而外無勞。斯莊生所謂遁天之刑者也。歲餘來能飲冷而少病。此其効歟。舜欽旣廢于世。本當於江湖之上。與魚鳥麋鹿同樂。不欲使聲問踪跡。一至於人間。因閣下之教。丁寧委析。不得不具道所懷。幸閔察焉。

「又答」去冬捧策問條目甚備。深明幽患之故。寘之坐右。一食三誦。嚴然如臨師保之前。雖未能盡其要處。而粗忘隕穫之苦。專人至。又承親筆。伏審坐鎮之暇。體力平裕。且謂某窮道著書日。與聖人語於堂奧。晏然自居。得易良象。時行時止。而其道光明也。此閣下教之愛之之過實也。夫適其時之動靜。使其道之光明。此大君子之行。藏屈申。非罪戾人之所可爲也。本以不知時之可止。而遂於行蹈此機窪。今旣止。而雖欲行。莫可得也。閣下前視卿輔之地。不欲處謙讓。引去偃息藩鎮。以閑放自喜。此正得時止之道也。處此至靜。益宜思念康世尊本之術。充於胸中。因時而發。大芘天下。則其道卷舒而光明矣。放廢者。安有此理。但守六五一爻之義而已。庶乎語言有序。悔吝稍亡。不貽知己之所憂念耳。閣下其察之。

「又上范公書云」五月日。舜欽頓首獻書于參政諫議閣下。舜欽伏觀自唐至于本朝。賢者在下位。天下想望傾屬。期至公相。聲名烜赫。未有如閣下者。自閣下作諫官。天下之人。引領數日。望閣下入兩府。使天下被其賜。及閣下受譴。天下之人。識與不識。皆歎息怒罵。以謂宰相蔽君。怙權不容賢者。在朝將日衰弊。無復太平之期。當是時。無此言者。衆指以爲愚。唯是險姦凶殘之人。嫉閣下聲名。出入甚於讎寇。然駈於

羣議暗嗚伏毒不敢開口但日日窺伺閣下之失將以快意相決羌賊不庭西方用武策畫顛倒兵師敗沒衆謂非閣下之才不能了此事天子采閣下之議用閣下於延州果能使士卒奮厲逆寇聞之不敢窺境有求和之請時堂上有沮陷者議者欲食其肉舜欽嘗靜思閣下功業未及天下而天下之人愛而美之非人之盡受惠也由閣下蘊至誠以康濟斯民爲己任故誠之感人如四時之氣鼓動萬物遠近無不被也去年天子又采天下之議召閣下入政府天下之人踊躍詠歌若已得之皆曰朝廷用人如此萬事何足慮日傾耳拭目望閣下之所爲未及半年時舜欽自山陽還臺已聞道路傳云閣下因循姑息不肯建明大事時尙竊竊私語未敢公然言也舜欽始絕不之信必謂怨惡之人扇成此謗談者好奇易傳耳及至都下言者稍不復避人矣舜欽始疑之是何知於前而昏於此耶而又爲辯之曰治久疾者不可速責以效苟以捍劑暴藥攻之死生未可知也談者或然之已而舜欽又當閣下之薦不復可與衆辯矣與之合倡實不忍爲但惻然愧羞暗不復言退而念慮終夕不能去懷乃知古之烈士爲知己死者以此也舜欽又竊觀閣下所爲於時亦孜孜數有建白未堪爲曠是何毀之多也豈誠之少衰不銳於當年乎豈施設之事未合羣望乎豈以爲高世之名未見爲高世之事乎愚者不可曉但聞論議之衆皆云教訓監工更改磨勘復職田定贖刑之類皆非當今至切之務譬如倒懸者饋之以食大餒者飲之以漿徒益人之忿耳舜欽受閣下非常之知日思所報欲閣下之譽復加於當年念之無他術焉必取衆議而用之則皆厭然而服不復有所詆訾矣今輒條數事布於左右非出於淺見寡識蓋得之羣言焉若閣下擇其一二上聞而行之於國實利人又甚樂故非刻薄僥一時之利今議稍喧矣閣下若更畏縮循嘿顧望而不

爲則不唯國計漸隳亦恐禍患及身矣如此則使姦纖之人得以藉口而快意天下之人疑惑有名之人又天子不肯采議而用人是不爲來者之地閣下其念之今所建之事不合指極不過於免位則天下之責不及若不建事而無所爲天子將采天下責而免閣下若天子未免閣下安能肆然久當天下之責乎必因事求免含胡而退則人無後望平生令名至此盡之矣夫建事而免絕異遠甚苟建而得行位自不免於朝廷之利甚大閣下之聲名復還不亦美乎所建之事不必某之所陳其術在衆論之長者閣下納而行之無憚其大且難矣嗚呼歲月有去而無回功名難成而易隳此古人所以珍重寸陰而皇皇於立事也若蹉跌失時齋泊前志則抱恨萬世爲來者所笑戮無復自明亦已痛哉亦可惜哉幸閣下留意焉「又諫乞不責范孔二公疏云」孔道輔范仲淹剛直不撓致位臺諫後雖改他官不忘獻納二臣者非不知緘口坐得卿輔蓋不敢負陛下委注之意而皆罹中傷竄謫而去使正臣奪氣鯁士咋舌目覩時弊口不敢論昔齊侯問叔向曰國家之患孰爲大對曰大臣持祿而不及諫小臣畏罪而不敢言下情不得上通此患之大者故漢文感女子之說而肉刑是除武帝聽三老之議而江充以族肉刑古法江充近臣女子老人愚耄疏隔之至也豈以義之所在賤不可忽二君從之後世稱聖况國家班設爵位列陳豪英當責其公忠安可教之循默賞之使諫尙恐不言罪其敢言孰肯獻納物情閑塞上位孤危軫念于茲可爲驚怛覬望陛下發德音寢前詔勤于采納下及芻蕘可以常守隆平保全近輔若詔榜未削欺罔既成則不唯堂下遠於千里竊恐指鹿爲馬之事復見於今朝矣

〔蔡君謨奏乞遣范公巡邊云〕聞已差范仲淹宣撫陝西近又除參知政事未有巡邊之日竊以西賊不

朝其言驕慢必無可從之理。范仲淹久留邊郡，威名在敵。若早令經制事宜，關中百姓有休息之期，故邊將雖多莫如朝廷。輶柄臣以臨之，柄臣之中莫如仲淹。自行望於西人未行之間，早遣巡邊無使後時，以失大計。

「又論范出於韓之右」又伏見陝西路招討使韓琦范仲淹各除樞密副使並以西寇未寧懇辭恩命，朝廷再賜手詔督令赴闕。臣竊私料琦等必再有陳論辭讓於未決之間而異同之說有三焉。曰：使琦仲淹皆來也。曰：一內一外也。曰：皆留在邊也。臣竊謂仲淹作招討使羌戎既畏其威名今在樞府正議兵謀其畏必甚。况在陝西民旣倚賴在樞府必陳利病而行之所賴者愈大。以物議言之二臣之忠勇其心一也。若以才謀人望則仲淹出韓琦之右故仲淹宜來琦當留邊於理甚當。其韓琦范仲淹伏乞朝廷不聽辭讓各授恩命。

「段少連諫范仲淹不當責疏云」臣因義激心以職獲譴天容地載蒙幸何深然理有所未伸情有所未達鬱悒之心不得不盡陳之道輔仲淹與臣等議皇后不宜廢是以羣詣殿閣上疏而執政進說使臣等不獲面對道輔仲淹出守外郡臣等蒙罰中外皆以爲非陛下之意特宰執假天威以斷來者之說不報又上疏曰：臣伏準戒諭自今不得羣詣殿門請對且伏閣上疏自有故事昔唐陽城王仲舒伏閣雪陸贊之枉崔元亮叩殿陛理宋申錫之冤今陛下未忍廢黜皇后而兩府列狀議降爲妃諫官御史敢廢伏閣之事乎陛下深惟道輔仲淹等所言爲阿黨乎爲忠亮乎不報。

「閣瀕撰公真贊曰」英英如神巖巖如山仁義道德蓋於顏間大忠臯夔元功方召以贊中樞以尊嚴廟

佑我仁祖格于皇天是肅是虔不傾不騫維慶有祠邦民瞻思慶山可夷茲堂巍巍。「元遺山贊曰」文正范公在布衣爲名士在州縣爲能吏在邊境爲名將其材其量其忠一身而備數器。在朝廷則又孔子所謂大臣者求之千百年間蓋不一二見非但爲一代宗臣而已丁酉四月獲拜公像於其孫圓曦爲之贊云以將則視管樂爲不忝以相則方韓富爲有餘其忠可以支傾朝而寄末命其量可以際圓蓋而蟠方輿朱衣玄冠佩玉舒徐見于丹青英風凜如古之所謂垂紳正笏不動聲氣而措天下如泰山之安者其表固如是歟。

「呂中論文正公爲本朝人物第一云」先儒論本朝人物以仲淹爲第一觀其所學必忠孝爲本其所志則先天下之憂而憂後天下之樂而樂其有所爲必盡其力曰爲之自我者當如是其成與否有不在我者雖聖賢不能必此諸葛武侯不計成敗利鈍之誠心也觀其論上壽之儀雖晏殊有不能曉寬仲約之誅雖富弼有所不能知而十事之規模雖張方平余靖之諸賢有所不能識仁宗晚年欲大用而范公已卽世矣豈天未欲平治天下歟。

「呂中論韓范同心云」元昊所以敢於憑陵者人皆以爲寶元康定積弱之故而不知其志已萌於德明與中國易馬之時元昊所以終於帖服者人皆知其一韓一范之功而不知其夷簡之功也蓋當夷簡未入相之前張士遜在政府王鬷在密院夏竦帥涇州范雍帥延州爲相則無補君務而不免韓琦政府養病之譏本兵則不習邊防而忘曩日曹瑋元昊必反之言爲帥則師無功而徒以墮虜人詐和之計當夷簡旣入相之後與仲淹釋憾於朝廷而協力於西事前日之蔽賢固可罪今日之補過亦可書此仲淹所

以樂爲之用也。自夏竦未罷帥之前，師惟不出，出則致敗。寇惟不來，來則傷殘。劉平之敗，范雍奪節，任福之敗，韓琦罷經略，而竦爲四路統帥。三歲擁握大師，未嘗身履行陳。自夏竦既罷帥之後，付秦鳳於韓琦，付涇原於王沿，付環慶於仲淹，付鄜延於龐籍，分爲四路，各任經略，聲勢相援。此元昊不復有深入之謀也。韓琦所上之攻守策，其意則主於攻，故不免有好水川之敗。至於仲淹所上攻守策，則言攻有利害，守有安危，攻宜築近邊城，取其近，而兵勢不危；守宜開屯田，用土兵，圖其久，而民力不匱。是則攻不至於輕戰，守不至於示弱，而舒徐待其斃也。然至於協謀以取靈夏之地，則韓范同此心也。惜乎志未遂，而二公歸矣。

「東萊先生治體論曰」蓋自李文靖抑四方言利害之奏，所以積而爲慶曆元祐之緩勢。自文正范公天章閣一疏不盡行，所以激而爲熙寧之急政。吾觀范文正之於慶曆，亦猶王安石之於熙寧也。十事之奏，實慶曆三年九月矣。始於明黜陟重命令，當時之言見用。明黜陟之法，則以十月丙午行。擇官長之法，則以十月丙午行。任子之法，則以十一月丁亥行。館職之法，以癸未行。公田之法，以壬戌行。貢舉之法，以明年三月行。減繇役之法，以明年五月行。其餘厚農桑、覃恩信、重命令，皆悉用其說，或著爲令，行之未及一年。而陳執中之徒已不悅矣。嗚呼！使慶曆之法盡行，則熙寧元祐之法不變。使文正之言得用，則安石之口可塞。今文正之志不盡行於慶曆，安石之學乃盡用於熙豐。神宗銳然有爲之志，不遇范仲淹，而遇王安石，世道升降之會，治體得失之機，於是乎決矣。

「楊龜山龍川志曰」范文正公篤於忠亮，雖喜功名，而不爲朋黨。早歲排呂申公，勇於立事，其徒因之矯

厲過直公亦不喜也。自饒州還朝出領西事。恐申公不爲之地。無以成功。乃爲書自咎解仇而去。故歐陽爲文正神道碑言。二公晚年歡然相得。由此故也。後生不知。皆咎歐陽公。予見張公言之。乃信。

「朱文公言曰」。范文正公作成忠義之風。本朝范質人謂其好宰相。只是欠爲世宗一死耳。如范質之徒却最敬馮道輩。雖蘇子由議論亦未免。此宋朝忠義之風。却是自范文正作成起來也。潘時舉

范文正經理西事。看得多是收拾人才。李儒用載法語會元

「朱文公曰」。天地間氣第一流人物。

「朱文公跋范文正公與姪帖云」。右范文正公與其兄子之書也。其言近而易知。凡今之仕者。得其說而敬之。亦足以檢身而及物矣。然公所自謂未嘗營私者。必若公之先天下之憂而憂。後天下之樂而樂。然後爲能充其名實。而其所論親僚友。以銷壅蔽之萌。明禁防以杜交私之漸者。引而伸之。又非獨効一官之守者所宜知也。候官大夫陳君焯得公此帖。刻寘坐隅。以自警省。烹蓋三復焉。而歎其指之遠。而不可窮也。敢竊識其說於左方。庶幾覽者有以發焉。年月日新安朱熹謹書。

「朱文公論文正公振作士氣曰」。問。本朝如王沂公人品甚高。晚年乃求復相。何也。曰。便是前輩都不以此事爲非。所以至范文正方厲廉恥。振作士氣。曰。如寇萊公也。因天書欲復相。曰。固是。朱子類語

又問。先生前日曾論。本朝惟范文正公振作士大夫之功爲多。不知便范公處韓公受顧命處事亦能如韓公否。曰。看范公才氣亦須做得。又曰。祖宗以來。名相如李文靖王文正諸公。只恁地善亦不得。至范文正時。便大厲名節。振作士氣。故振作士大夫之功爲多。問。范文正作百官圖以獻。其意如何。曰。他只說如

此遷轉卽是公如此遷轉卽是私。呂許公當國有無故躡等用人處。故范公進此圖於仁宗。因舉詩云。誨爾序爵人主此事亦不可不知。假如有人已做侍御史。宰相驟擢作侍從。雖官品高。然侍御史却緊要爲人主者。便須知把他擢作侍從。如何不把做諫議大夫之類。

〔又論文正公解仇事云〕近得周益公書。論呂范解仇事曰。初范公在朝。大臣多忌之。及爲開封府。又爲百官圖以獻。因指其遷進遲速次序曰。某爲超遷。某爲左遷。如是而爲公。如是而爲私。意頗在呂相。呂不樂。由是落職。出知饒州。未幾。呂亦罷相。後呂公再入。元昊方犯邊。乃以公經略西事。公亦樂爲之用。嘗奏記呂公云。相公有汾陽之心之德。仲淹無臨淮之才之力。後歐陽公爲范公神道碑。有歡然相得。戮力平賊之語。正謂是也。公之子堯夫。乃以爲不然。遂刊去此語。前書今集中亦不載。疑亦堯夫所刪。他如聚談所記。說得更乖。烹謂呂公方寸隱微。雖不可測。然其補過之功。使天下實被其賜。則有不可得而掩者。范公平日胸襟豁達。毅然以天下國家爲己任。旣爲呂公而出。豈復更有匿怨之意。况公常自謂無惡於一人。此言尤可驗。忠宣固是賢者。然其規模廣狹。與乃翁不能無間意。謂前日旣排申公。今日若與之解仇。前後似不相應。故諱言之。却不知乃翁心事。政不如此。歐陽公聞其刊去碑中數語。甚不樂也。問後來正獻。亦及識范公否。曰。正獻通判潁川時。歐陽公爲守。范公知青州。過潁謁之。因語正獻曰。太博近朱者赤。歐陽永叔在此。宜頻近筆硯。異時同薦三人。則王荊公。司馬溫公。及正獻公也。其知人如此。又曰。呂公所引。如張方平。王拱辰。李淑之徒。多非端士。終是不樂范公。張安道過失更多。但以東坡父子懷其汲引之恩。文字中十分說他好。今人又好看蘇文。所以例皆稱之。介甫文字中有說他不好處。人旣不好看。看亦

不信也。

「又論范文正高處云」呂申公斥逐范文正諸人至晚年復收用之范公亦竭盡底蘊而爲之用這見文正高處忠宣辨歐陽公銘志事這便是不及文正又曰范文正傑出之才熹嘗謂天生人才自是得用豈可厚誣天下以無人自是用不到耳且如一個范文正公自做秀才時便以天下爲己任無一事不理會過一旦仁宗大用之便做出許多事業今則所謂負剛大之氣者且先一筆勾斷秤停到第四五等人氣字懶懶布列臺諫如何得事成故熹向謂姓名未出而內外已知其非天下第一流矣道夫

「又論夷簡無相業云」熹嘗說呂夷簡最是個無能底人今人却說他有相業何者善處置爲相正要以進退人才爲先使四夷聞之知所聳畏方其爲相其才德之大者如范文正諸公旣不用下而豪俊躑躅之士石曼卿諸人亦不能用其所引援皆是半間不界無狀之人弄得天下之事日入於昏亂及一旦不柰元昊何遂盡挨與范公文正若非范文正公則西方之事決定弄得郎當無如之何矣今人以他爲有相業深所未曉子蒙

「又論文正有好議論云」德粹以明州士人所寄書納先生因請問其書中所言先生曰渠言漢之名節魏晉之曠蕩隋唐之辭章皆懲其弊爲之不然此只是正理不明相衰將去遂成風俗熹問已前皆衰纏成風俗本朝道學之盛豈是衰纏先生曰亦有其漸自范文正以來已有好議論如山東有孫明復徂徠有石守道湖州有胡安定到後來遂有周子程子張子出故程子平生不敢忘此數公依舊尊他因說前輩如李泰伯門議論只說貴王賤伯張大其說欲以劫人之聽却是矯激然猶有以使人奮起今日須要

作和中將來只便委靡了。如范文正公作子陵祠堂記云。先生之志出乎日月之上。光武之器包乎天地之外。微先生不能成光武之大。微光武豈能遂先生之高哉。胡文定公父子極喜此語。大抵前輩議論。麗而大。今日議論細而小。不可不理。會烹問此風俗如何可變。曰。如何可變。只且自立。可學

「又論文正公氣貌如何云」苗劉之事。今人多責之。朱呂當時他也是自做未得。古人定大難者。不知是如何。不知范文正寇萊公人物生得如何。氣貌是如何。平日飲食言語是如何。樣底人。今不復得親自看。且得箇依稀樣子。看是如何地。如今有志節擔當大事人。亦須有平闊廣大之意始得。可學

「又論文正公精密云」富韓公召來。只是要去語人云。入見上坐亦不定。豈能做事。烹云。韓公當仁廟再用時。與韓魏公在政府十餘年。皆無所建明。不復如舊時。曰。此事看得極妙。當記取。又問使范文正公當此。定不肯回。曰。文正却不肯回。須更精密似前日。

「又論文正公待士」因論李泰伯曰。當時國家治時節好。所論皆勁正如此。曾南豐攜歐公書。往餘杭見范文正公。文正云。歐九得書。令將錢與公。今已椿得甚處。錢留公矣。亦欲少款。適聞李先生來。欲出郊迓之。云云備。

「又答周益公論范碑曲折書云」蓋嘗竊謂呂公之心。固非晚生所能窺度。然當其用事之時。舉措之不合衆心者。蓋亦多矣。而又惡忠賢之異己。必力排之。使不得容於朝廷。而後已是。則一世之正人端士。莫不惡之。况范歐二公。或以諷議爲官。或以諫諍爲職。又安可置之而不論。且論之而合於天下之公議。則又豈可謂太過也哉。逮其晚節。知天下之公議。不可以終拂。亦以老病將歸。而不復有所畏忌。而慮失天

下之事或終至危亂不可如何而彼衆賢之排去者或將起而後用則其罪必歸於我而并及吾之子孫是以寧損故怨以爲收之桑榆之計蓋其慮患之意雖未必盡出於至公而其補過之善天下實被其賜則與世之遂非長惡力戰天下之公議以貽患於國家者相去遠矣至若范公之心則其正大光明固無宿怨而惓惓之義實在國家故承其善意旣起而樂爲之用其自訟之書所謂相公有汾陽之心之德某無臨淮之才之力者亦不可不謂之傾倒而無餘矣此書今不見集中恐亦以忠宣刊去而不傳也此最爲范公之盛德而他人之難者歐陽公亦識其意而特書之蓋呂公前日之貶范公自爲可罪而今日之起范公自爲可書二者各記其實而美惡初不相掩則又可見歐公之心亦非淺之爲丈夫矣今讀所賜之書而求其旨要則其言若曰呂公度量渾涵心術精深所以期於成務而其用人才德兼取不爲諸賢專取德望之偏故范歐諸公不足以知之又未知其諸子之賢而攻之有太過者後來范公雖爲之用然其集中歸重之語亦甚平平蓋特州郡之常禮而實則終身未嘗解仇也其後歐公乃悔前言之過又知其諸子之賢故因范碑托爲解仇之語以見意而忠宣獨知其父之心是以直於碑中刊去其語雖以取怒於歐公而不憚也凡此曲折旨意微密必有不苟然者顧於愚見有所未安不敢不詳布其說以求是正伏惟恕其僭易而垂聽焉夫呂公之度量心術期以濟務則誠然矣然有度量則宜有以辨人才之邪正欲成天下之務則必從善去惡進賢退奸然後可以有濟今皆反之而使天下之勢日入於昏亂下而至於區區西夏一方之病非再起范公幾有不能定者則其前日之所爲又惡在其有度量心術而能成務也哉其用人也欲才德之兼取則亦信然矣然范歐諸賢非徒有德而短於才者其於用人蓋亦兼收

而並取雖以孫元規滕子京之流恃才自肆不入規矩皆亦將護容養以盡其能而未嘗有所廢棄則固非專用德而遺才矣如呂公所用如張李二宋姑論其才亦決非能優於二公者乃獨去此而取彼至於一時豪俊蹶弛之士窮而在下者不爲無人亦未聞其有以羅致而器使之也且其初解相印而薦王隨陳堯佐以自代則未知其所取者爲才也耶爲德也耶是亦不足以自解矣若謂范歐不足以知呂公之心又不料其子之賢而攻之太過則其所攻事皆有顯跡不可掩安得爲過且爲侍從諫諍之官爲國論事乃視宰相子弟之賢否以爲前郤亦豈人臣之誼哉若曰范呂之仇初未嘗解則范公旣以呂公而再逐及其起任西事而超進職秩乃適在呂公三入之時若范公果有怨於呂公而不釋乃閔默受此而無一語以自明其前日之志是乃內懷憤毒不能以理自勝而但以貪得美官之故俛而受其籠絡爲之驅使未知范公之心其肯爲此否也若曰歐公晚悔前言之失又知其諸子賢故因范碑以自解則是畏其諸子之賢而欲陰爲自托之計於是寧賣死友以結新交雖至以爲無有愧負幽明而不遑恤又不知歐公之心其忍爲此否也况其所書但記解仇之一事而未嘗并譽其他美則其斥逐忠賢之罪亦未免於所謂欲蓋而彰者又何足以贖前言之過而媚其後人也哉若論忠宣之賢則雖未易輕議然觀其事業規模與文正之洪毅開豁終未有十分肖似處蓋所謂可與立而未可與權者乃翁解仇之事度其心未必不深恥之但不敢出之於口耳故潛於墓碑刊去此事有若避諱然者歐公以此深不平之至屢見於書疏非但墨莊所記而已墨莊文正公五世孫况龍川楊龜山先生志之於此又以親聞張安道之言爲左驗張實呂黨尤足取信無疑也若曰范公果無此事而直爲歐陽所誣則爲忠宣者正當沫血飲泣貽

書歐公具道所以然者以白其父之心跡而俟歐公之命以爲進退若終不合則引義告絕而更以屬人或姑無刻石而待後世之君子以定其論其亦可也乃不出此而直於成文之中刊去數語不知此爲何等舉措若非實諱此事故隱忍寢默而不敢誦言則曷爲其彼之明白而直爲此黯闇耶今不信范公出處文辭之實歐公丁寧反覆之論而但取於忠宣進退無據之所爲以爲有無之決則區區於此誠有不能識者若摭實而言之但曰呂公前日未免蔽賢之罪而其後日誠有補過之功范歐二公之心則其終始如青天白日無纖毫之可議若范公所謂平生無怨惡於一人者尤足以見其心量之廣大高明可爲百世之師表至於忠宣則見雖狹然亦不害其爲守正則不費詞說而名正言順無復可疑矣

〔論韓范諸公不苟同云〕諸公平居相稱若尙同也而議事則公言無私不害其爲同上前爭事若好異也而下殿則如未嘗爭不害其爲異仲淹欲宥滕宗諒杜公曰不可也非異仲淹也恐紊人主之操柄也富公欲罪晁仲約范公曰不可非異富公也恐導人主以嗜殺也韓公欲擊西夏杜公曰不當擊仲淹謂契丹必攻河東請修邊備富弼料九事且言契丹必不來君實景仁以兄弟自號者也而鍾律之議終其身不相下韓范素號相得者也而城水洛之議互爭沫滬之是非是數公者其漢史所謂忠臣有不和之節而小人讒爲朋黨可謂誣矣

〔文論呂范交隙云〕且朋黨之倡其萌於范呂交隙之時乎謂申公爲小人耶爭宸妃誕育之功而喪於成禮當宮庭避災之頃而願望清光乃拜手疏八事如正朝綱塞邪徑禁賄賂下佞士直得大臣輔相之體而其大者釋仲淹之宿怨容孫沔之直言是未可以小人之訾也謂申公爲君子耶敕有司不受臺諫

夷簡倡之戒百官越職言事夷簡主之罷相之後密表之頻奏內侍之陰結是失大臣進退之義而其大者因私憾而預瑤華之議因北事而忌富弼之能是未純於君子也仲淹之比肩聯事豈能帖帖阿附而爲詭隨之態乎方其姑蘇召還正愞公議待制之除俾伸素蘊而處鈞衡之地者思有以陷之以侍臣噤其口以劇務撓其心然百官之圖四論之獻凜然生言者之氣大臣不堪遂以朋黨目之仲淹於是有鄱陽之行是行也李紘王質載酒往餞而欲附黨以爲幸歐陽修余靖尹洙抗疏力爭而願同貶以爲榮仲淹何慊哉以至韓琦救蔡襄之詩程琳議黨人之誘若谷下君子之類此皆營救仲淹也惜夷簡之黨勝仲淹之黨不勝至使受知薦主方爾從坐同年進士又相繼出諸賢皆以朋黨逐矣至仲淹陝西召還稍愞公議日夜謀畫圖報主知然按察之令嚴磨勘之法密未有愞僥倖之意小人不悅再以黨論之仲淹於是復爲陝西之行是行也身再去國讒者益甚賈昌朝主王拱辰而逐益柔仲淹所薦也錢明逸論章得象而去富弼富弼仲淹所厚也陳執中因孫甫而去杜衍杜衍嘗爲仲淹言也邸獄之起朋黨作仇一網之打私徒相慶雖歐陽公以去國之身懷不自己抗疏力言至謂羣邪相賀于內四夷相賀于外未嘗不忠于國者而大勢卒不可挽矣方仲淹始爲夷簡黨目之所斥諸賢尙有左袒及仲淹再爲夏竦黨論之所貶諸賢皆爲倒戈蓋夏竦用心慘於夷簡此元瑜所以初是仲淹而復希執中也然嘗反覆史傳竊謂黨禍之作固小人之罪而希君子之風附君子之名不得盡其辭責故嘗妄爲之說曰黨論之始倡蔡襄賢不肖之詩激之也黨論之再作石介一夔一契之詩激之也其後諸賢相繼斥逐又歐陽公邢正之論激之也何者負天下之令名非惟人情不堪造物亦不吾堪爾吾而以賢自處孰肯以不肖自名吾而

以夔契自許。孰肯以大奸自辱。吾而以公正自襄。孰肯以邪曲自毀哉。如必過爲別白。私自尊尙。則人而不仁。疾之已甚。攻乎異端。斯害也已。安得不重爲君子之禍。孫復謂禍始於此。仲淹謂怪鬼壞事。韓琦亦謂天下事不可如此。其亦有先見云耳。唐自牛僧孺李宗閔對策至李德裕朱崖之貶。一報一復。凡四十二年而後息。我仁宗在位四十二年。待遇臣下恩亦至矣。夫豈無藥石以碱砭之。湯沐以櫛治之。未幾雲開日出。所廢之人尋卽召用。所罷之官隨已復職。如范文正以忤申公而得貶。其始也。雖爲之下朋比之詔。及西事之興。不惟宥其過。而且大用。杜富歐余以邸獄而盡去。始者所行之人。雖盡廢黜。而陳執中旣罷之後。諸賢復召。而或畀之鈞衡。或列於論思氣類相感。竟不至傷吾保泰之和。諸賢何憾哉。

〔又論元昊所以臣服云。〕蓋自天聖中。曹寶臣嘗語王饗曰。君異日當柄用。願留意邊防。因以元昊桀悍語之。時德明尙無恙也。其言至寶元而驗。寶元以來。逆雛犯順。忘食肉衣綺之恩。肆猾夏亂華之虐。懷敏福平。以將自詭。有先穀剛愎之態。無充國老成之慮。其勇而無謀。不能辦事。當時識者已預占之。矧如夏竦設心措慮。但欲進擊。一聞持重堅守之師。則柄鑿矣。自爲總帥。端坐長安。四路軍政。遙聽節制。其誤國僥倖軍之罪。自不能掩於張方平之一疏。由是好水之役。任福不能嬰其鋒。定川之役。劉平不能遏其勢。遣使至境。范雍不能明其詐。遣人納降。士彬不能察其欺。當其時也。天子不得怡。宰相不暇食。百官不敢退。安於私第。中書置議事之廳。羣策集經略之幙。韓公不肯袖手於大事。當決之時。富公不肯結舌於虜使。可斬之日。小范老子胸中數萬甲兵。略展布於代回國事之頃。請出兵者有呂夷簡。言官兵不如鄉兵者。有田况。身爲體量使。而知四路屯兵之數者。有王堯臣。王守忠監軍之命不行。夏竦通曉厥囉蕃族之議。

復寢。張奎鑄錢之請既上，歐陽修通漕運擢商賈之策復施。我常有以破元昊而元昊終不請降於我也。以鄜延一路觀之，狄青擊之於保安，許懷德破之於永平，入金明則見困於周美，至延州則見摧於王信。以涇原一路觀之，虜寇三川，王珪敗之，沮其兵，虜在自豹任福克之制其兵，以河東一路觀之，在麟州則張元易旗幟以誤敵，其衆大潰，在府州則張旨築城陴以堅守，其賊果遁至環慶一路，所在自爲守備，相爲牽制者又非諸路之所能及。青澗既成，則以种世衡懷瓊州屬羌，自是人精於射，虜不敢近。大順未城，則以范純佑促慶州版築，自是城寨截然，虜不敢入。一韓一范之謠，屹然爲天兩柱。蛇豕膽喪，犬羊屏息，有以也。於是議和之使，至于境上者一至于范仲淹者再，然猶未敢保其無他，而輕許之也。暨夫遣使納款者一遣來奏事者四，然後賜讐之使不得已而出疆，嗚呼！羽檄交馳之間，勉於支擇，拯救之圖玉帛相尋之後，亦不廢惕厲憂虞之心，擇武勇於陝西，選武臣於諸路，諄諄然綸綺之明揚，以和好爲權宜，以戰守爲實務，鯁然搢紳之論奏，募入粟以助邊出內帑以助邊，撙節三司用度之數，蓋其持危益深，而防閑益密，救敗扶傷而經畫多，未嘗窮追遠討以強兵而來懲去備，無大勝亦無大負，未嘗急征暴歛以豐財而量入爲出，不至有餘亦不至不足。每觀夏竦范雍經略西事之日與韓琦范仲淹經略西事之日，勝負利鈍，大略可攷，信守備亦惟其人而已。不然以跋扈之元昊初而帝中而男終而臣者，又豈無所自耶。

劉漫塘先生論本朝人物曰：南渡前范文正公合居第一語錄。



# 諸賢論頌

忠宣公謚議節文

鄧忠臣

議曰。每思捐身而進策。嘗願休兵而息民。祇知扶危而濟傾。寧恤跋前而疐後。方讒言亂國。而明蔡確之無實。洎姦黨投石。而謂大防之可原。義形正色。憤激至誠。非特救當世。正人端士之網羅。直欲戒後世。亂臣賊子之迷惑。循公忘己。爲國惜賢。又曰。父母之國。有時而去。股肱之義。於是或虧放之江湖。忽如草莽。紉蘭澤畔。更甚屈原之悲。占鵬坐隅。已分賈生之死。又曰。側席南望。而抉浮雲之蔽。趣節東歸。而詠零雨之濛。又曰。法座想見其風采。詔書相望於道塗云云。

論忠宣公有量

程氏遺書

予言范公堯夫之寬大也。昔余過成都。公時攝帥。有言公於朝者。朝廷遣中使降香峨眉。實察之也。公一日訪予款語。余問曰。聞中使在此。公何暇也。公曰。不爾則拘束已。而中使暴怒。以鞭傷傳言者耳。屬官喜謂公曰。此一事足以塞其謗。請聞於朝。公旣不折言者之爲非。又不奏中使之禍也。其有量如此。

論忠宣公分資蔭與進士事

龜山語錄

科舉取人不得。間有得者。自是豪傑之士。因科舉以進耳。且資蔭得官。與進士得官。孰爲優劣。以進士爲勝。以資蔭爲慊者。此自後世流俗之論。至使人恥受其父祖之澤。而甘心工無益之習。以與孤寒之士。角勝於場屋。僥倖一第。以爲榮。是何見識。夫應舉亦自寒士無祿。不得已。藉此進身耳。如不得已。何用應舉。范

堯夫最有見識。然亦以資蔭與進士分優劣。建言於有無出身人銜位上。帶左右字。不可謂無所蔽也。其言曰。欲使公卿家子弟讀書耳。此意甚善。但以應舉得官者爲讀書而加獎勸焉。則彼讀書者應舉得官而止耳。豈真學道之人。至如韓持國。自是經國之才。用爲執政。亦了不得。不可以其無出身。便廢其執政之才。曰。堯夫所別異者。莫非此等人否。曰。執政不是合下便做。亦自小官以次遷之。如後來吳坦求等在紹聖中。被駁了學士。以無出身故也。彼自布衣中。朝廷以其學行賜之爵命。至其宜爲博士。乃復以爲無出身奪之。此何理也。資蔭進士中。俱有人。惟其人用之。如一右字。亦自沮人爲善。

論忠宣公以德報怨

元符末。呂惠卿罷延安帥。陸師閔代之。有訴惠卿多以人冒功賞者。師閔以其事付有司。未竟。罷去。曾布爲樞密使。素與惠卿有隙。特自太原移德孺延安。蓋德孺於惠卿亦有隙也。德孺至。取其事自治。有自皇城使追奪至小使臣者。德孺由是大失邊將之心。議者謂有詞於前政事已在有司。德孺乃取以自治。失矣。德孺聰明過人。而爲曾布所使。惜哉。未幾。德孺亦以論役法罷。如忠宣丞相則不然。公帥慶陽時。爲總管。种詰無故訟於朝。上遣御史按治。詰停任。公亦罷帥。至公爲樞密副使。詰尙停任。復薦爲永興軍路鈴轄。又薦知隰州。公每自咎曰。先人與种氏上世有契義。純仁不肖。爲其子孫所訟。寧論事之曲直哉。嗚呼。可謂以德報怨者。以德孺之賢。於是乎有愧於忠宣矣。

論李清臣

邵氏聞見錄

紹聖初。哲宗親政。用李清臣爲中書侍郎。范丞相純仁。與清臣論事不合。范公求去。帝不許。范公堅辭。帝

不得已除觀文殿大學士判潁昌府召章惇爲相未至清臣獨當中書益覬倖相位復行免役青苗法除諸常平使者惇至不能容以事中之清臣出知北京建中靖國初上皇卽位用韓忠彥爲相清臣爲門下侍郎同平章事忠彥與清臣有連故忠彥惟清臣之言是聽清臣復用事范右丞純禮忠彥所薦也清臣罷之劉安世呂希純皆忠彥所重清臣不使入朝外除安世帥定武希純帥高陽張舜民忠彥薦爲諫議大夫清臣出之帥真定其所出與外除及不使入朝者皆賢士清臣素所憚不可得而用者忠彥懦甚不能爲之主曾布爲右相用范致虛諫疏云河北三帥連衡恐非社稷之福劉安世呂希純同日報罷清臣亦爲布所陷出知北京伯溫常論紹聖建中靖國之初朝廷邪正治亂未定之際皆爲一李清臣以私意幸相位壞之邪說旣勝衆小人並進而清臣自亦不能立於朝矣使清臣在紹聖初同范丞相在建中靖國之初同范右丞劉安世呂熙純張舜民以公議正論共濟國事則朝廷無後日之禍而清臣亦得相位享美名矣此忠臣義士惜一時治亂之機爲之流涕者也

又論徽宗不及相忠宣云

王偁

臣偁曰元符末命欽聖定策以立徽宗起范純仁于謫中欲任以相事而純仁以病不能造朝烏乎純仁不得相徽宗于初政此治亂之所以分也夫忠臣進則朝廷尊羣陰用則禍亂作徽宗旣已悞矣於是改過不吝以彰信兆民遜位于子以克謹天戒雖二駕遂狩而大業復興有以也夫

本傳贊

臣偁曰純仁忠厚仁恕宰平天下不澄不撓人莫能窺其際而其愛君憂國之心凜然有仲淹之風噫使

熙寧用其言。則元祐無改更之患。元祐行其說。則紹聖無黨錮之禍。孟子謂仲尼不爲已甚者。臣於純仁見之矣。

跋文正公道服贊

希道比部借示文正詞筆。觀之若侍其口之左右。令人旣喜而且凜然也。熙寧壬子夏丙寅陵陽守居平雲閣題石室文同與可。

論忠宣公不當與安燾同除

王巖叟

王巖叟言。伏覩畫黃除同知樞密院安燾。知樞密院試吏部尙書范純仁同知樞密院者。臣謹按燾資材闢茸器識猥庸。立朝以來。無一長爲人所稱。燾之不材。舊位且非所據。况可冠洪樞。顧兵柄所有書命。謹繳連封進其范純仁除命。伏乞分爲別敕行下。又言臣聞古人有言曰。賞當賢則臣下親罰當罪則姦邪止。陛下一日逐章惇於汝州。可謂罰當罪矣。一日擢范純仁爲執政。可謂賞當賢矣。燾之進則未有所當。此臣所以當力爲陛下言也。又言陛下用范純仁雖驟。何故無一人有言。蓋當賢也。一進安燾。則諫官御史交章論奏。蓋非公望所與也。

送范德孺知慶州

黃魯直

乃翁知國如知兵。塞垣草木識威名。敵人開戶玩處女。掩耳不及驚雷霆。平生端有活國計。百不一試蘊九京。阿兄兩持慶州節。十年麒麟地上行。潭潭大度如臥虎。邊頭耕桑長兒女。折衷千里雖有餘。論道經邦正要渠。妙年出補父兄處。公自才力應時須。春風旆旗擁萬夫。幕下諸將思草枯。智名勇功不入眼。可

用折筆答羌胡

德孺五丈和之字詩韻難以愈工輒復和成可發一笑

黃魯直

且然聊爾耳得也自知之獨笑直成夢狂歌或似詩照灘禽郭索燒野得伊尼早晚來同醉僧窗臥虎皮

次韻德孺新居病起

黃魯直

潭潭經略府寂寂閉門居京洛聖賢澤江湖魚鼈瀦官如一夢覺話勝十年書積喜過從近扶筇不駕車

次韻德孺惠貺秋字之句

黃魯直

少日才華接貴游老來忠義氣橫秋未應白髮如霜草不見丹砂似箭頭顧我今成喪家狗期君早作濟川舟漢家宗廟英靈在定是寒儒浪自愁



# 諸賢詩頌

廣德司理詩

維持狴犴下。枉直情必通。太守異趣舍。挺然不曲從。有事爭論之。粉屏記其終。官小俸祿薄。家居率窮空。賣馬以自給。徒步氣彌充。

游百花洲盤礴文正祠下以生存華屋處零落歸山丘爲韻賦十詩

其一

憶昔昭陵日。傾心用老成。成功歸仁祖廟。政得一書生。

其二

羊生但著鞭。勿哭西州民。故有不亡者。南山相與存。

其三

慶州自不惡。籍甚載聲華。忠義可無憾。公今有世家。

其四

公歸未百年。鶴巢荒古屋。我吟殄瘁詩。悲風韻高木。

其五

傷心祠下亭。在時公燕處。臨水不相猜。江鷗會人語。

孫莘老

黃魯直

其六

公有一杯酒。與人同醉醒。遺民能記憶。欲語涕飄零。

其七

委徑問謠俗。高丘省仙作。昔游非苟然。今花幾開落。

其八

在昔實方柄。成功見圓機。九原尚友心。白首要同歸。

其九

人去洲渚在。春回花草班。清談值淵對。發興如江山。

其十

落日噏城壁。祠東更一游。悲來惜酒少。安得董糟丘。

次韻其一

神文秉周禮。廟樂奏九成。當時夔一足。不待魯諸生。

其二

嘖嘖雀噪屋。愔愔蛛網門。我來九頓首。生氣凜如存。

其三

堂堂古遺直。心嚴貌無華。人見不嫵媚。何以娛大家。

其四

樸萩復樸萩。何以棟我屋。風雨莫輕搖。南山無老木。

其五

有酒當自醑。有室莫共處。古今一丘貉。何能坐飛語。

其六

夢回四賢篇。長風吹人醒。嗟哉不我見。淚與秋露零。

其七

百代無幾人。九原何可作。不必溫御史。解令君膽落。

其八

寶元乃多故。公時總戎機。胸中百萬兵。要取橫山歸。

其九

公歸今幾時。遺懿何班班。公議要難沒。言波可懷山。

其十

我心不可規。滔滔誰與游。向來秉大雅。心復成一丘。

懷范樓

初載希文此屈盤。天衢一旦遂高擣。古人直許到夔契。當世猶能並富韓。事與陶朱均日煥。名彰長白倚。

中奉大夫致仕楊用道

天寒何但東坡爲流涕遺編我讀亦汎瀾。

故寧海軍刺史楊中奉才學與蘇黃不相上下近於李舜臣家得公墨跡慮其湮沒命工勒石以傳永久泰和乙丑春休日宣武將軍行主簿都騎尉王國器立石

長山書事

孫弘多詐涴齊人玉石由來各自分汲黯有靈吾可問此山曾見范希文。

至元七年秋七月二十有四日汝水節齋陳祐按部過此故題進義副尉長山縣主簿崔仲元立石。

謁文正公祠堂詩

長白何嵒崿下有讀書室人云小范老於此度辰夕蕭蕭翳荆榛落落臨泉石拳拳往拜瞻赫赫如相及維宋慶曆間多士麟鳳集孰爲天下憂一疏丹心白中朝元有人西夏諒難國力言師出凶深虛手滑失炳幾先見明韓富有慚德柰何時相陋欲碎和氏璧向非仁廟知千載血應碧至今忠義氣高壓萬仞壁所以行業隆要自清苦積功臣何代無名爲富貴役視公平昔懷霄壤邈相隔但能一善兼亦足百歲塞遺容揭日星未覺關塞黑長歌景行詩風林撼秋色

右延祐四年三月廿又七日翰林學士資善大夫知制誥同修國史張養浩偕龐提領拜謁祠下

文正范公祠

吳潛

仁誼功忠一片心兵間招弄更精神當時老上龍庭種豈信江南有此人

長山溪畔蓼莪青想見當年念母情顧我遠游營底事擡頭重感老先生

長山青陽縣東二十里文正范

仲淹幼鞠于朱氏。讀書其地。紹定二年。縣令丁木立祠。朝請大夫丁黼記。

### 池州青陽文正祠

理齋楊少愚纂註

范塘饒州書記歸逕池之青陽謁長山朱文翰留謝歸之越三月公生端拱己丑歲也說名登第於祥符乙卯歸姓於天聖丁卯文翰任淄州長史亦嘗往長白山初仕廣德軍云便迎母家書畀池州朱延之范太師戶置田青陽活朱氏孤遺獨墓碑爲忠宣公諱耳

七子母聖善凱風吹棘薪蒯瞶書世子文姜絕不親詩亡春秋作寧以諱失真人之大倫五克諧信義仁吾身所由出同出先吾身循此而孝弟道與堯舜均異姓聿居三友妻上君臣事母豈殊父母或從乎人從人良有由夫命志莫伸所以謝夫人寄生天麒麟覃恩復歸宗善乎處天倫春秋明時中大經所經綸敢借魯衛書重爲范氏陳

### 澧州路安鄉縣太平興國觀文正公讀書堂東原申屠駢致祭祀辭

維元統三年歲次乙亥六月辛丑朔越十有六日丙寅後學東原申屠駢巡歷至澧州路安鄉縣詣太平興國觀先師文正范公之讀書堂謹以三牲酒饌雜果盤蔬敬祭而昭告曰

惟公有出將入相之才則見諸事業有致君澤民之志則見乎文章捍海濤而築巨堰恤宗族而爲義莊。驄也昔嘗拜公之像於興化今復拜公之像于安鄉蓋非羨公之自寒微而至通顯乃特慕公之秉方正而備賢良也尙饗

### 興祭官

敦武校尉澧州路安鄉縣達魯花赤兼勸農事馬合謀。承事郎澧州路安鄉縣尹兼勸農事呂袁友進義校尉澧州路安鄉縣主簿夏思德縣尉楊宏照略案牘鄧天祐將仕郎吉安路儒學教授致仕羅勉道安鄉縣學教諭張巖儒生李恆周泰劉浚劉南昌青陽賓常德等處榷茶提舉司司吏魯思明

祝辭

維大元至正七年歲次丁亥八月辛未朔越二十有一日辛卯奉議大夫奉元路耀州知州兼管本州諸軍奧魯勸農事東平申屠駢謹以潔牲清酌冥楮淨香致祭于文正范公而昭以告曰  
公昔嘗寵知於耀駢今亦忝知于耀駢也貽勉焉惟前賢之是希庶幾乎追後人之所誚謹告

與祭官

雲南省臨安路建水州儒學正授翟塞仲義陝西省奉元路耀州同官縣儒學教諭韓城程好問  
讀祝儒生沐梁李鼎

# 祭文

富鄭公

維年月日具銜富某謹遣左教練使陳節詣徐州以清酌庶羞之奠恭祭于故資政殿學士戶部侍郎范公六丈之靈嗚呼公乎天之生公實將濟此下民乎功乎未宣何遽奪之而不踐其初乎天乎忍爲是而不自信之甚乎不然何賦公道大德具而罔克終其施乎某愚不文而不能盡揚公之懿聊書其概以寓其悲公幼孤無依零丁自生徒步遊學至于成名奔走銓選益困于行僅改一秩卿寺之丞有宗公宴薦公文章典校圖籍館閣之光獻后誕節姦謀請皇下率百辟北面奉觴公聞駭走出疏于囊雖示民孝君入臣行願得元宰外行故常帝首宗之內宴是將衆爲公慄公膽益張于時非公大節幾忘並悟獻姦過逋于外獻既往矣諫垣召拜夙夜蹇蹇益用不怠帝怒椒掖講從廢殛公率諸僚御史協力伏閤而諫氣直寰域坐是謫去中外失色累易郡璽召尹上京尹職非志志安朝廷連柱柄臣又竄南征忠亮信特天下皆傾有夏不軌西鄙用兵遽召起公來撫方城大將失律關陝震驚延是孤危賊謂己物命者必辭公獨請之人惜公去公馬星馳居未席暖賊遁而歸賊措無所羽書見詒公比尊君不欲中報手爲答書禍福以告旣驛以聞上覽而喜耆明贊云可附于史昧者詆媒嫉其出己胡然守邊宜賜以死常憂邇臣勉徇所啓徙公內藩物論麻起俄建帥旗總護諸將帝心思賢天下是訪擢貳樞筦復參政鈞二府交入萬微日新不設機械不作崖岸坦坦一心惟道之踐讖間得行孤立誰辨因其出撫遂留幽方穰下得請旋

易于杭。又易青社。曾未盈歲。恙起不測。又求潁水。及徐不行。記友以死。嗚呼。公止於是而已乎。昔某初冠。識公海陵。顧我譽我。謂必有成。我稔公德。亦已服膺。自是相知。莫我公比。一氣殊息。同心異體。始未聞道。公實告之。未知學文。公實教之。肇復制舉。我憚大科。公實激之。既舉而仕。政則未諭。公實飭之。公在內史。我陪密幄。得同四輔之儀。公撫陝西。我撫河北。又分三面之寄。公旣罷去。我亦隨逝。從古罪人。以于魑魅。公我明時。咸得善地。自此蠱孽。毀譬如沸。必寘其死。以快其志。公云聖賢。鮮不如是。出處以道。俯仰無愧。彼姦伊何。其若天意。我聞公說。釋然以寧。旣而呶呶。果不復行。於是相勗以忠。相勸以義。報主之心。死而後已。嗚呼哀哉。公今死矣。忠義已矣。萬不仰一齋。恨多矣。世無哲人。吾道窮矣。我雖苟活。與死均矣。嗚呼哀哉。師友僚類。殆三十年。一日棄我。悲何可存。我守蔡印。公薨彭門。我去無所。公來已魂。我慟幾絕。公聞不聞。走使持奠。作文敍冤。嗚呼哀哉。尙饗。

歐陽文忠公

月日。廬陵歐陽修謹以清酌庶羞之奠。致祭于故資政殿學士尙書戶部侍郎范文正公之靈曰。嗚呼。公乎。學古居今。持方入圓。丘軻之艱。其道則然。公曰。彼惡。公爲好訐。公曰。彼善。公爲樹朋。公所勇爲。公則躁進。公有退讓。公爲近名。讒人之言。其何可聽。先事而斥。羣譏衆排。有事而思。雖仇謂材毀。不吾傷譽。不吾喜。進退有儀。夷行險止。嗚呼公乎。舉世之善。誰非公徒。讒人實多。公志不舒。善不勝惡。豈其然乎。成難毀易。理又然歟。嗚呼公乎。欲壞其棟。先摧桷樑。傾巢破穀。披折傍枝。害一損百。人誰不罹。誰爲黨論。是不仁哉。嗚呼公乎。易名謚行。君子之榮。生也何毀。沒也何稱。好死惡生。殆非人情。豈其生有所嫉。而死無所爭。

自公云亡。謗不待辨。愈久愈明。由今可見。始屈終伸。公其無恨。寫懷平生。寓此薄奠。

舒王

嗚呼我公一世之師。由初迄終。名節無疵。明肅之盛。身危志殖。瑤華失位。又隨以斥。治功亟聞。尹帝之都。閉姦興良。稚子歌呼。赫赫之家。萬首俯趨。獨繩其私。以走江湖。士爭留公。蹈禍不憚。有危其辭。謁與俱出。風俗之衰。駭正怡邪。塞塞我初。人以疑嗟。力行不回。慕者興起。儒先曾曾。以節相侈。公之在貶。愈勇爲忠。稽前引古。誼不營躬。外更三州。施有餘澤。如釀河江。以灌尋尺。宿賊自解。不以刑加。猾盜涵仁。終老無邪。講藝弦歌。慕來千里。溝川障澤。田桑有喜。戎孽獮狂。敢騎我疆。鑄印刻符。公屏一方。取將於伍。後常名顯。收士至佐。維邦之彥。聲之所加。虜不敢瀕。以其餘威。走敵完鄰。昔也如至。瘡痍滿道。藥之養之。內外完好。旣其無爲。飲酒笑歌。百城宴眠。吏士委蛇。上嘉曰材。以副樞密。稽首辭讓。至于六七。遂參宰相。釐我典常。扶賢贊傑。亂冗除荒。官吏於朝。士變於鄉。百治自修。偷墮勉彊。彼闕不遂。歸傾帝測。卒屏于外。身屯道塞。謂宜苟老。尙有以爲神乎。孰忍使至於斯。蓋公之才。猶不盡世。肆其經綸。公孰與計。自公之貴。廐庫逾空。夷其色辭。傲訏以容。化于妾婦。不靡珠玉。翼翼公子。弊綈惡粟。閔死憐窮。惟是之奢。孤女以嫁。男成厥家。執壇于深。執鍥乎厚。其傳甚詳。以法永久。碩人今亡。邦國之憂。矧鄙不肖辱公知尤。承凶萬里。不往而留。涕哭馳辭。以贊醪羞。

韓忠獻公

維某年某月某朔某日。具官某謹以清酌庶羞之奠。致祭于資政范公之靈。嗚呼哀哉。上天生公。固爲吾

宋以堯舜佐吾君兮。旣忘身而忠國。以成康期吾俗兮。又竭思而仁衆。升贊樞宰。孰云不用。殿撫藩服。孰云不重。何太平之策。噤而不得施兮。委經綸於一夢。此一人所震嗟。而天下之所深痛。豈止乎平生之交。得訃音而長慟。嗚呼哀哉。僕始立朝。接公尙疎道。同氣合。千里相符。忝帥於西。乃與公俱。協心畢力。誓翦兇渠。義切王室。情均友于。雖千艱而萬險。仗忠信而如無。僕之望公。公驥僕鷺。十駕未逮。敢擬齊驅。人胡不辯。遂連公呼。自顧無有愧。常汗珠繫公是託。終履夷途。叛羌來附。一節同趨。與公並命。參翊萬樞。凡有大事。爲國遠圖。爭而後已。歡言如初。指之爲黨。果如是乎。道卒與于時戾。謂公迂而僕愚。相緣補外。謗毀崎嶇。感公之知。謂死不渝。嗚呼哀哉。定之去青。不遐驛置。自公之東。信問時至。愛顧益深。交朋莫二。蠅頭細書。以時爲寄。珠貝累幅。氣嚴法備。自云釁鑠。以將厚意。謂公康寧。曰保純粹。忽以疾聞。求醫往視。瞿然遣使候公。監寐。會公得穎。肩輿赴治。尙煩公答。親筆數字。意公少瘡。粗以爲慰。方具書藥。詣公所憇。得元規報。云公永逝。讀之駭然。手足具廢。氣填滿膺。食不知味。惟公事君之大端。固始終而一致。有生卽有死。今雖聖智。其安避所惜者。國家待賢而後乂。天胡不仁。而不憖遺。嗚呼哀哉。公之所在。履夔蹈禹。高文奇謀。大忠偉節。充塞宇宙。照曜日月。前不愧于古人。後可師于來哲。固有良史直書。海內公說。瓦億萬世。不可磨滅。此爲天而爲壽兮。信識者之能別。豈於一奠之間。可盡公之德烈。惟是冥然而思。默然而悲。此生未殯。曾無已時。公乎公乎。知乎不知。